

ATTO SAN JUANPA' EÑOTATER YOMPOR ÑEÑTCHA' ATET PERRTSA TSAPATONET EL APOCALIPSIS

Atto Yomporpa' gatyesan Puechemer Jesucristo

¹ Añ ñoñets ñeñtpa' atto Yomporpa' gatyenan Puechemer Jesucristo, allochñapa' ñachña eñotatyese' allohuen ñeñt torra'yetsa Yomporecop. Ñeñtcha' eñotatanetpa' ñeñtpa' ñeñtcha' ahuen atet perra ama't esempo. Atto eñotaten na, ñapa' ahuo't mueñon po'mllañoñeñer, allochñapa' ñach negatyese' na ñeñten sochetsa Juan ñeñten torretsa ñocop, allochñapa' attoch eñoch ñaña allohuen ñeñt torra'yetsa Yomporecop.

² Tarro'mar napa' nach eñotatahuet allohuenet ñeñt e'ñe po'ñoçh ñeñt atet eñotatenen Yompor po'ñoñ ñaña ora ñeñt allpon eñotatenen Jesucristo ama't ñaña ñeñt ora allpon gatyennet.

³ Atarrcha' cosheñtso'tsen ñeñtcha' lleyatene' acheñenesha' añ ñoñets ñeñt huetsa Yomporeshot ñeñt yeñotatene' ñeñtcha' atet perra esempo. Atarrcha' cosheñtso'tsa'yen ñaña allohuen ñeñtcha' e'mñotene' añ ñoñets ñaña e'ñech ayemuetpo' enteñet, ora allpon ñoñets ñeñt aquellcaret arr. Tarro'mar o' çhampoch allempoch etsotuerra añ ñoñets.

*Atto Juanpa' quellcan cançherr ñeñt anetser all
apçha'yena allohuen ñeñt ame'ñenaya Cristo*

4-5 Napa' o'ch nequellconas carta allohuenacpas ñeñtes ap'cha'yetsa e'ñe same'ñeñoñ Yompor all ñeñt po'poñe'ttsocma anets ñeñt can'cherr ñeñt Asio'tsa'yen. E'ñe nehuom'cha'teñoñtespa' o'ch notas: Yomporepa'chña semueraya epuet ñaña Puecamquëñ epuet ñaña Puechemer ñeñt Jesucristo. Ñetepa'chña sebensare'tam'pene'. Añ ñeñtara Yompor ñeñt 'chocma eñall, ama't ahua'otoñ 'chocma eñall ñaña ñeñtara ñeñt'cha' huerrtsa po'pocheño. Ñaña Puecamquëñ ñeñt'pa' ñeñtara can'cherr ñeñt sher'ba'yets e'ñe all po'conaño e'ñe po'poñe'ttsocma sherbenet. Ñaña ñeñtara Jesucristo ñeñt atarr ayemuetpo'yenten ñeñt ora allpon ñeñt eñotateney; ñaña ñeñtara Jesucristo ñeñt ñanom tanerrtsa puerrom'ñoñ ñapa' amach alla rromuerre'te. Attoña pa'm'cha'tare'ter peñ allohuen ama't allohuen am'cha'tare'te'chno a'ñe patsro. Ya'ye'cho'chtatoñepa'ch ñeñtara Jesucristo ñeñt atarr amorrentña, e'ñe ña puemorrenteño'teypa' attoña rroma yocop alloch'ñapa' attoch ashata're'tta po'r'ras e'ñe yocop alloch'ñapa' attoch e'ñe e'shohuare'tterra yo'ch'ñar. 6 Ñaña ñapa' attoña e'ñe cohuen aguëney attochña ya'm'cha'tare'ttapre'tera attochña yesher'ba'pre'terr'ñañ Pompor ñeñt atarr Parets, attey ñerra'm'rrate' ñeñt corneshatets Partsocop. A'cohuentaterrapo'ch Jesucristo, am'cha'tare'ttepa'ch tayoteñ ama't errponohuañen. Ñeñt'pa' attetepa'ch Yompore.

7 O'ch secueñ huerrach Cristo, oscha' a'suata'm'perre'. Ama't allohuen acheñenesha'pa' entuapueretcha' e'ñe pa'clloyotet. Ama't ñeñt

pata'te'pa' entuapueretcha' ñamet. Allempoña ñeñt' shonte' pa'namen acheñenesha' ñeñt' ye'cha'yetsa arr patsropa' ya'na'tapueretcha' e'ñe puellquëño'tet. Ñeñt'pa' e'ñech atet perra.

⁸ Yompör ñeñt' nanac Parets ñeñt' Yepartse-shar yepen ñapa' chocma eñall, ama't ahua'toteñ chocma eñall, ñeñt'pa' ñeñt'ara ñeñt'cha' huer-rtsa po'pocheño. Ñapa' atetña ot: "Napa' e'ñe pa'motroteñ eñallen atten ñerra'mrrate' quellec A ñeñt' pa'moter pen alfabeto. Allempoteñña napa' chocma eñallen esempohuañencha' huañerr ñeñt' allpon eñall, napa' atten ñerra'mrrate' quellec Z ñeñt' all puen alfabeto." Añpa' allohua ñeñt' atet toma'ntatena Cristo.

Atto Cristopa' orrtana Juan e'ñe po'cohuentaño't

⁹ Te' napa' ñeñten sochetsa Juan o'ch alla noterrser. Napa' ñeñten e'ñe semo'nasheñ se'pohuenen sa. Napa' ñeñten semuero'chtapretenaya e'ñe yame'ñeño't Jesús. Ñaña e'ñe yeyemteño't ñapa' e'ñech aco'pa es ya'huanten esheccha' ya'm'cha'tare'tapretera. Ñehua, napa' o'ch neñotatas ñeñt' atet nepena na arr. Ahuañmo'cha napa' e'ñe neserrpare'teño't Yompör po'ñoñ ñeñt' atet eñotatenen Yepartseshar Jesucristo, añña ñeñt' ne'moñe'tene'pa' o' huapore'tenneta' arr atarr alla'par all rro'chpe'chañe'follo ñeñt' otenet Patmos.

¹⁰ Pam'tarr allempo' chapa'muen añe yetro allempo' chocma yeyerpueña Yompör napa' neyerpueño't ñapa' e'ñe machayo'ta chorratna huomenc Yompör Puecamquëñ. Allempoñapa'

machayota ne'm ñoñets huapa necha'ñoť. Atarr huomenc eñen atet ñerra'mrrate' poctor e'morrtetsa huomenc. Ñeñťpa' atet oten añ ñoñets:

11 —Napa' ñeñťen ñanom eñallen, allempoteñña napa' chocma eñallen ama't esempohuañencha' huañerr ora allpon ñeñť eñall, napa' atten ñerra'mrrate' quelled A ñeñť ñanom huetsa alfabetoť, arrohua all huañen alfabeto ñeñť yoten Z. Te' napa' o'ch notař ñeñť ora allpon ñeñťcha' negatyesař añ poctetsa o'ch pequellca'yes pepařllo allotpa' o'ch pemñe all anetsočno ñeñť cančherr ñeñť apčha'yetsa all pa'namen anetso ñeñť ame'ñetsa. Ñeñť ñanom añ pa'so'cheñ Efeso, allotpa' Esmirna, allotpa' Pérgamo, allotpa' Tiatira, ñańa Sardis, ñańa Filadelfia, allotpa' ñańa Laodicea. Ora añečno anetspa' ñeñť Asio'tsen.

12 Allempoña ne'muen atet ñoñetspa' nañapa' neptallsa o'ch neñch esesha'te' ne'ñorana'tenaya. Allñapa' nent cančherr ñeñť all orratenet huerare allo čhoyo'tenet ñeñťpa' oro ayečcataret.

13 E'ñe ročo ñeñť cančherr all orratenet huerare all orrtena puesheñarr yacma ñeñťpa' Jesucristo ñeñťara Ñeñť Acheñetosets. Ashtamať, pa'shtampa' e'ñe čhen pa'tcohua. Achanaret, po'chanarpa' orotommuen ñeñť allo chanena puesomapo. 14 Poñoť pue'chpa' e'ñe ora atarr huallama't atet ñerra'mrrate' carrnero pue'ch ñeñť e'ñe huallama't. Amapa' o'ch not pue'chpa' e'ñe ora huallama't atet ñerra'm senet ñeñť otenet nieve ñeñť atarr huallama't. Pa'ccl'e'pa' atarr poptena atet ñerra'mrrate' tso' po'huorter nanac a'rechatañ. 15 Pa'tacpa'čo'ña attecma poptena

atet ñerra'm aser yachamuen. Allempo eñorena e'ñe atet e'morrtena po'ñoñ atet ñerra'mrrate' shonte' oñ atarr huomenc ma'moreten. ¹⁶ Pot po'cohuenrotpa' orrenan cancherr ranto. Puenamotpa'cho'ña all orrtena cochell ñeñt emoshen'to'mar etsotañtareť. Ora pa'tsa'pot e'ñe atet poptena ñerra'mrrate' atsne' atarr huomenc a'rrechatañ.

¹⁷ Allempo neñchpa' e'ñe nemicha'na'teñoťpa' nañapa' o' nerrmosa patso e'ñe pa'tco. Ney-orñoťpa' ama nepelleno ama't mamesha, cha notena ñerra'mrrate' cho nerromuen. Tarraña ña potot po'cohuenrot a'plla'n, oten:

—Amach pemicha'tatsto, napa' ñeñten ñanom eñallen, allempoteñña napa' chocma eñallen ama't esempohuañencha' huañerr ora allpon ñeñt eñall. ¹⁸ Napa' ñeñten ama arromñateshayayno. Ama't nerromhua ahuaña tarraña te'pa' o' alla nocrrerra, amach alla nerromuerre'te ama't ahuata. Ñaña napa' nechen llave, ñeñt nehuamenc nepen alloch pomnaren nepen rromueñets ñaña ñeñtcha' aguerre' allohuen ñeñt rromuets. ¹⁹ Te' pocoppa' añ poptetsa o'ch pequellca'yes ora ñeñt allpon o' negatyeseť ñaña allpon ñeñtcha' negatyerrperr ñeñtcha' atet perrtsa esempohuañen. ²⁰ Ñehua, te'pa' o'ch neñotatať ñeñt atet toma'ntena añ cancherr ranto ñeñt penten e'ñe notot necohuenrot ñeñt ama eñotenaye' penteno. Ñeñt cancherr rantopa' añ toma'ntena ñeñt cohuañpesyenahuet ora allohuen ñeñt name'ña'yenaya allemeñ ñeñt cancherr anetso ñeñt apcha'yetsa all. Ñaña ñeñt

atet pent ñeñt ayečcatareť oroch all orratenet huerare, ñeñtpa' añ toma'ntena ora allpon ñeñt apča'yetsa allemeñ anetso ñeñt cančherr ñeñt name'ña'yenaya.

2

Atto Juanpa' quellcan carta añecop ñeñt ame'ñetsa anetso Efeso

¹ Ñeñt neserrpare'tatene' ñapa' alla oterrerr, ñapa' atet oten:

—An poctetsa o'ch pequellca' carta añecop ñeñt cohuanpene' allohuen ñeñt ame'ñetsa all anetso Efeso, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt orrene' cančherr ranto e'ñe all pota po'cohuenroť, ñeñtara Cristo ñeñt chope'chets rrocho e'ñe allo'tsen ñeñt ayečcatareť oroch all orratenet huerare.

² Ñaña'pa' atet otenes: ‘Napa' neñotuennas ñeñt ora allpon atet sepa'yena all. Napa' e'ñe nentuennas ñeñt allpon nanac setorra'yena ñaña allpon ñeñt e'ñe cohuen acořa es sa'huanata'huanen. Ñaña napa' e'ñe nentuenes sapa' ama sagueñe ñeñt ama cohuenaye' es pa'yetso. Sapa' atto setpatyeñ ñeñt otetseñ ñetpa' allsensareťeto' tarraña ñetpa' atta shecare'tenet. Attoña setpateñoť o' señotanet ñetpa' atta shecare'tenset. ³ Ñaña napa' neñotuenes ñeñt allpon semueročhtena nocop ñaña atto e'ñe cohuen sa'huanata'huen mueročhteñets, ama semuenme'cheñe allo setorrena. ⁴ Tarraña ama't atteñpa' nentuennas paterr ñeñt ama cohuenaye' nentapretenso. Ñeñtpa' añ atto sapa' o'huañ

e'ñe semorrentna ñeñt atet sepa ahuať allempo e'ñe errte' same'ñerrna. ⁵ Te'pa' o'ch notas, o'ch seyerpuerra atto ahuañmo'cha nanac cohuen semorrentenna. Te'pa' ama atteye' sepeno. Añ pocte' o'ch alla soctape'cherr e'ñe cohuen attoch o'ch alla seperra cohuen ñeñt atet sepa allempo e'ñe ñenmať same'ñenna. Ñerra'm amach ello soctape'cherro cohuen napa' tayecma o'ch ahuen o'ch neprratañperres ñeñt atma'ntataret socop ñeñtara ñeñt all orratenet huerare. ⁶ Tarraña ama't atteñpa' napa' añña e'ñe cohuen nentuennas atto sapa' ama pocteye' senteno ñeñt atet p̄atse'tyen acheñenesha' ñeñt cotene' Nicolás poctañña. Napa'cho'ña ama pocteye' nenteno ñeñt atet p̄atse'tyenet sosya'tsañ. ⁷ Ñeñt e'mñotene' añ ñoñetspa' chapanetepa'ch pueyočhreto ñeñt atet neñotatenanet na Necamquēñoť, ora allohuen ñeñt pame'ñeñoťet chocma apcha'yenet allemeñ anetso'mar. Ñeñt metana'tue' allohuen pa'namen topateñtsočhno, ñeñt ama nepuerram̄perrayo, ñetñapa' naphuerranetcha' ñeñt no'patatenanet ñeñtcha' atarr yom̄a'huerret e'ñe poctacma Nomporešo, allpa' e'ñech cosheñtso'tsenet. Ñeñtña napa' o'ch not, napa' o'ch nemnaterranet attoch o'ch tsomhuerret añ tsach pue'mer alloch corra'huerret e'ñe poctacma amach alla rromuerrete'te ama't ahuaťa.' ” Arrpa' allohua huañ atet ot efeso'marneshacop.

Atto Juanpa' quellcan carta añecop ñeñt ame'ñetsa anetso Esmirno

⁸ Allempoña ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt' cohuam'pene' ñeñt' ame'ñetsa all anetso Esmirna, o'ch pōtanet atet: “Napa' o'ch nequellconas carta attoch neñotatas ñeñt' atet otenes Jesucristo ñeñt' ñanom eñall, allempoteñña ñapa' čhocma eñall ama't esempohuañencha' huañerr ora allpon ñeñt' eñall. Jesucristo ñapa' ñeñt' rromhuats țarraña te'pa' o' alla betterra. ⁹ Ña te'pa' atet otenes: ‘Napa' neñotuennas ora allpon ñeñt' atet sepa'yena. Neñotuennas ñaña atto atarr sa'mueročhtatarettena, ñaña atto atarr huocchañes. Ñehua, ama't huocchañsoñpa' Yomporeshot shonte' esocmañen ñeñt' sechyen. Ñaña ñeñt' se'moñe'tene' neñotuennas atto atarr sasare'tenset. Ama't otenetañ ñetpa' judionesheto' țarraña ñetpa' ama Yomporeye' pueyochresha' penahueto; ñetpa' aña pueyochresha' penahuet oneñet ama't allohuenet. ¹⁰ Amach yore'tatstaso mueročhteñets ñeñt'cha' ahuen sehuapoya. Tarro'mar ñeñt'cha' seyottam'pse' patanta'ttsos, ñeñt'pa' oneñeťeshot huena añecopña attoch topatuas ñerra'm po'ñöchte' same'ñena. Puesheña'ttsos mueročhtatasetcha' e'ñe čharramat. Ama'tcha' muetsasetpa' añ pocte' o'ch serromapes atto same'ñena. Allochña napa' naphuerrescha' ñeñt' no'patatensa alloch socrra'huerra e'ñe socsheñeshocmañen. Ñeñt'pa' ñeñt'ara noten po'poñ ñoñtso naphuerrescha' sepremio ñeñt'cha' socshatuerre' e'ñe poctacma. ¹¹ Ñeñt' e'mñotene' añ ñoñetspa' čhapanetepa'ch pueyöchreto ñeñt' atet neñotatenanet na Necamquëñoť ora allohuen ñeñt' pame'ñeñoťet

čhocma apčha'yenet allemeñ anetso'mar. Ñeñt metana'tue' allohuen pa'namen topateñtsočno, ñeñt ama nepuerram̄perrayo, ñetpa' ama't puesheñarroñetapa' amach amñareñterreto coñcheñtso ama't ahuata. Ñetpa' amach alla rromuerreterro po'pocheño.' " Arrpa' allohua huañ atet ot esmirno'marneshacop.

Atto Juanpa' quellcan carta añecop ñeñt ame'ñetsa anetso Pérgamo

¹² Allempoña ñeñt neserrpare'tatene', ñapa' alla oterrerr:

—Te'pa' o'ch pequellquërrerr carta añecop ñeñt cohuan̄pene' ñeñt ame'ñetsa all anetso Pérgamo, o'ch potanet atet: "Napa' o'ch nequellconas carta attoch neñotatas ñeñt atet otenes Jesucristo ñeñt orrtatene' cochell puenamoť, po'cchellpa' ñeñt emoshem̄to'mar etsotañtatereť. ¹³ Ñapa' te'pa' otenes: 'Napa' neñotuennas ora allpon ñeñt atet sepa'yena.

Napa' neñotenes all seyčhena ñeñtpa' all atarr am̄cha'nočhtena oneñet. Tarraña ama't atteñpa' sapa' ama sequečhpueno atto same'ñenna, ñaña čhocma sa'meten atto same'ñenna, ama't e'ñe allempo muetsennanet ñeñt name'ñenaya ñeñtara Antipas ñeñt čhocma neserrpare'tene' neñoñ sesho, allara ñeñt pa'netser peñ oneñet.

¹⁴ Tarraña ama't atteñpa' napa' nentuennas coñet ñeñt ama pocteye' nentapretenso ñeñt atet sepatse'tena. E'ñe all Pérgamo patanta'ttsos ama semno o'ch sequēchpa' ñeñt pueyčhateñ peť atet yečhateť Balaam ahuat. Balaam ahuatpa' atet cotape'chataneť Balac attoch

shecare'tane't israelena'tarnesha' allochñapa' attoch ñetpa' o'ch p̄atse'tyenet ñeñt̄ ama pocteye' enteno Yompor. Ñeñt̄ atet p̄atse'tyenet ñeñt̄pa' atet pete't̄ o'ch rrallme'chapretan po'poñ acheñ ñeñt̄ po'yomporer pene' ñeñt̄ ayečhcatare't̄, ñerra'm esempo rrenet po'chets ñeñt̄ muetsenet allo sherbeñet pueyečhcatar. Elloña allempo ñetpa' e'ñe pocshapreteño'tetpa' o'ch agapanna'tet ama't ñeñt̄ ama puetaporeyaye, allñapa' o'ch cañoresha'tenet. ¹⁵ E'ñe attecma seshopa'cho'ña patanta'ttsos atarr ashcaretes ñeñtes puesheña'ttsos ñeñtes ama semno o'ch sequečhpoñ Nicolás poctapña ñeñt̄ atet yečhatenes ñeñt̄ ama pocteye' nenteno. ¹⁶ Tarraña napa' o'ch notas, sequēchpa' ñeñt̄ añ cotapñatser, o'ch alla soctape'cherr e'ñe cohuen. Ñerra'm amach ello soctape'cherro cohuen, napa' e'ñe tayecma o'ch ahuen o'ch nečllarenaneta' nocchello't̄ ñeñt̄ nenamo'tsen. ¹⁷ Ñeñt̄ e'mñotene' añ ñoñetspa' čhapanetepa'ch pueyočhreto ñeñt̄ atet neñotatenanet na Necamquēño't̄ ora allohuen ñeñt̄ pame'ñeño'tet čhocma apčha'yenet allemeñ anetso'mar. Ñeñt̄ metana'tue' allohuen pa'namen topateñtsočhno, ñeñt̄ ama nepuerram̄perrayo ñetñapa' napanetcha' maná ñeñt̄cha' pocrram̄ perret ñeñt̄ ama entpahuesho. Ñaña o'ch napanet mapyetoll ñeñt̄ atarr huallamemen allo aquellcare'tena so'chñets e'ñe etserra. Ñeñt̄cha' agapue' ñeñt̄pa' ñap̄ta eñotenan añ so'chñets ñeñt̄ aquellcare't̄ all.' ” Arrpa' allohua huañ atet ot p̄ergamo'marneshacop.

Atto Juanpa' quellcan carta añecop ñeñt ame'ñetsa anetso Tiatiro

¹⁸ Allempoña añ ñeñt neserrpare'tatene' ñapa' alla oterrerr:

—Te'pa' o'ch pequellquerrerr carta ñaña añecop ñeñt cohuañpene' ñeñt ame'ñetsa all anetso Tiatira, o'ch potanet atet: “Napa' o'ch nequellconas carta attoch neñotatas ñeñt atet otenes ñeñt Yompor Puechemer, ñeñtara ñeñt pa'c'le'pa' atarr a'rrechatañ atet ñerra'mrrate' tso' po'huorter, ñaña ñeñtara pa'tacpa' atarr poptena atet ñerra'm aser ñeñt bronce ñeñt atarr cohuen poptetsa.

¹⁹ Ñapa' te'pa' atet otenes: ‘Napa' neñotuennas ora allpon ñeñt atet cohuen sepa'yen, atto atarr semorrentannena ñaña atto atarr same'ñena, ñaña atto atarr seyenpannena, ñaña atto e'ñe cohuen sa'huanta'huen ñeñt atarr echarr senten. Ñaña elloña allo'na sesen atet pa'nmue' ñeñt atarr cohuen enten Yompor.

²⁰ Tarraña ama't atteñpa' eñall paterr ñeñt ama pocteye' nentapretenso. Ñeñt'pa' atto sapa' semnateñ coyanesha' ñeñt sochetsa Jezabel atto ñapa' aña yeçhaten ñeñt ama cohuenaye' nenteno na. Ama't ñapa' oteneñ ño' a'mtene' Yompor po'ñoñ tarraña ama atteyaye, ñapa' atta shecare'tenes ñeñtes torretsañ nocop. Ñaña ñapa' aña yeçhatenes ñeñt atto secañoresha'ten, ñapa' otenes ñeñt'pa' e'ñe pocte' enteñ Yompor. Ñaña aña yeçhatenes ñeñt atto serrapreten po'chets ñeñt muetsenet ayeçcataretecop, ñapa' otenes ñeñt'pa'cho'ña e'ñe pocte' enteñ Yompor. Tarraña Yomporñapa' ama't mameshapa'

ama pocteye' enteñe. ²¹ Napa' atta necueñ allponmat, noten ñato' o'ch cotape'cherran cohuen tarraña teme'ttsenpa' ama mueno o'ch cotape'cherran cohuen. Ñapa' aña atarr cohuen enten atto cañoresha'ten. ²² Ñeñto'mar te' napa' o'ch nemnach o'ch atsna'ten attoch amach cha'nerro po'mayot. Ñaña ñeñt epuet atet penet ñerra'm ama cotape'cherreto cohuen attoch quechpuenet ñeñt atet ye'chatenanet ña, ñetpa'cho'ña o'ch necoñchatanet nanac. ²³ Ama't ñaña puechoyoreshohuen napa' o'ch ne'nuerranet. Allochñapa' attoch allohuen ñeñt pame'ñeñotet ap'cha'yetsa allemeñ anetso o'ch eñochet ñeñt atetpa' ama a'papahuo. Napa' e'ñe nentuennas ama't ñeñt atet soctape'chen seyo'chro. Napa' ñeñtencha' saphuerre' allpon ñeñt poctetsa e'ñe puesheña'ttsocpas, ñeñt allpon atet se'pa'yen. ²⁴ Tarraña po'potantañes ñeñtes tiatiro'marneshas sapa' ama socteññañe ñeñt atet ye'chaten coyanesha'. Ama't ñaña ñeñt otenet oneñe' poctap'ña ñeñt ama eñotpahuoyaye, puesheña'ttsa e'ñe etsotene' — ñeñt'pa'cho'ña sapa' ama seycheñe. Ñeñto'mar te'pa' o'ch notas, napa' amach nenonaso po'poñ ñoñets ñeñt atarr echarr senten. ²⁵ Añña notenes, amach sequechpatsche ñeñt atto soctape'chen cohuen Yomporecop, ama't tayoteñ ñaña esempohuañen allempoch nohuerra. ²⁶⁻²⁷ Ñeñt metana'tue' allohuen pa'namen topateñtso'chno, ñeñt ama nepuerran'perrayo, ñeñt allo'na sets pa'nmue' ñeñt pocte' nenten na, ñetpa' naphuerranetcha' attoch añcha'taret entenanet

allohuen pa'namen acheñenesha' ñeñt̃ yečha'yetsa añe patsro. Ñeñtpa' atet Nompor apuenen naña. Neyoročhenñoch añcha'nočtapreterrnetcha'. E'ñe po'huamencotet ñerra'm ñet muenats atarrcha' mueročhtateret allohuen pa'namen acheñenesha' arr patsro. Ñeñtpa' o'ch netma'ntacha ñerra'mrrate' ñeñt̃ echene' po'carr asreṣ, ñerra'm allo aso'tet patsrro'pa' čhach a'mllo'tstach e'ñe poctacma. ²⁸ Ñeñt̃ metana'tue' allohuen pa'namen topateñtsočhno elloña ñetpa' napanetcha' ranto ñeñt̃ atarr ateshamerr. ²⁹ Ñeñt̃ e'mñotene' añ ñoñetspa' čhapanetepa'ch pueyočhreto ñeñt̃ atet neñotatenanet na Necamquēñoṭ, ora allohuen ñeñt̃ pame'ñeñoṭet čhocma apčha'yenet allemeñ anetso'mar.' ” Arrpa' allohua ñeñt̃ atet ot tiatiro'marneshacop.

3

Atto Juanpa' quellcan carta añecop ñeñt̃ ame'ñetsa anetso Sardiso

¹ Allempoña ñeñt̃ neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt̃ cohuañpene' ñeñt̃ ame'ñetsa all anetso Sardis, o'ch ṗotanet atet: “Napa' o'ch nequellconas carta attoch neñotatas ñeñt̃ atet otenes Jesucristo ñeñt̃ e'ñe chorratena Yompor Puecamquēñ cančherr ñeñt̃ara cančherr ñeñt̃ sherḃa'yets. Ñetpa' po'poñe'ttsočma sherbenet. Naña ñeñt̃ara Cristo ñeñt̃ orrene' cančherr ranto. Ñapa' te'pa' atet otenes: ‘Napa' neñotuennas ora allpon ñeñt̃ seṗa'yen. Naña neñotuennas atto sa

acheñenesha'pa' atet entensetañ ñerra'mrrate' e'ñe cohuen socrena Yomporecop. Tarraña ñeñtpa' ama atteye' sepeno čhaña sottena ñerra'mrrate' čho serromuen, amaña es sesherbenaña Yomporecop. ² Ama't atto same'ñenañ mame' tarraña ñeñtpa' allo'na sen huañuanmats. Napa' nentuenes ama setsotenoña ñeñt e'ñe pocte' enten Nomp. Te'pa' o'ch notas, e'ñechña señoa, o'ch alla setanterra Yomporecop. ³ Chocmachña seyerpueña ñeñt atto aserrpare'tataretes ahuañmo'čoteñ. Amach sepsatsche añ ñoñets ñeñt same'ñataya. Ñeño'marña te'pa' añ poctetsa o'ch alla soctape'cherr cohuen Yomporecop. Ñerra'm ama atteye' sepeno napa' machayořach nohuernasa atet ñerra'mrrate' eñtpa' amach señoa e sempopa' machayořach huaponasa. ⁴ Tarraña ama't atteña' all anetso Sardiso e'ñe puesheña'ttsaña ñeñt ama yečhenaye sosya'tsañ ñeñt ama pocteye' enteno Yomp. Ñetpa' atet atma'ntatarettenet ama't pa'shtamuetpa' ama a'sosyateñeto. Ñeño'mar ñetpa' e'ñe pocte' nentenanet ñaña attochña nemnaterranet o'ch yehope'cherr e'ñe parro țarro'mar ñet ñeñt neshtamtatenanetpa' ama a'sosyateñeto, e'ñe cohuenarer orrtenet e'ñe huallama'țaret. ⁵ Ñeñt metana'tue' allohuen pa'namen topateñets ñeñt ama nepuerrañperrayo, ñetpa' neshtamtaterranet shetamuets ñeñt atarr huallama'ț. Ñetpa' amach ne'sherraneto pa'so'cheñ all aquellcarettenet Yomp po'libro attochña ñetpa' corretsetach. Ñetña'pa' nechme'taterranetcha' ñeñt na Nomp

ñaña allohuen po'millañoñeñnaneshar. ⁶ Ñeññ e'mñotene' añ ñoñets çhapanetepa'ch pueyoçhreto ñeññ atet neñotatenanet na Necamquëñoñ ora allohuen ñeññ pame'ñeñoñet çhocma apçha'yenet allemeñ anetso'mar.' ” Arrpa' allohua ñeññ atet ot sardiso'marneshacop.

Atto Juanpa' quellcan carta añecop ñeññ ame'ñetsa anetso Filadelfio

⁷ Ñeññ neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeññ cohuanpene' ñeññ ame'ñetsa all anetso Filadelfia, o'ch pōtanet atet: “Napa' o'ch nequellconas carta attoch neñotatas ñeññ atet otenes Jesucristo ñeññ e'ñe Parets ñeññ e'ñe po'ñoçh allohuen es oten. Ñeññara Cristo ñeññ allsensaret ñach amçha'taretterrtsa e'ñe atet amçha'tarette't David. Nato' o'ch netma'ntacha o'ch not ñapa' echenan David po'llave. Ama't erra'tsencha' o'ch torampenanet attoch çhapanet Yompor po'cohuenña ama't eseshapa' amach errotenoñt alla epatare'terraneto. Ñaña ñerra'm ñach yottamperre' ama't eseshapa' amach errotenoñt torampereto. ⁸ Cristopa' te'pa' atet otenes sa: 'Napa' e'ñe neñotuennas ñeññ atet cohuen es sepa'yen. Ama't ama tama ahuamencateso Yomporecop, tarraña ama't coñe'ta sehuamenc sepen çhocma same'ñennana neñoñ ñaña çhocma sa'meten atto same'ñenna ama sa'nasotenko. Neño'mar napa' o'ch netoramponas allcha' sa'potennan neñoñ, ñaña ama't eseshapa' amach errotenoñt alla yottampernaso. ⁹ Ñaña añña ñeññ otetseñ ñetpa' judionesheto' — ñehua, ñetpa'

ama Yomporeye' pueyochresha' penahueto
 tarro'mar ñetpa' aña pueyochresha' penahuet
 oneñeñ, ñetpa' atta shecare'tenset. Tarraña ñetña
 te'pa' o'ch name'ñatanet allochñapa' o'ch çhapanet
 pueyoçhreto sapa' ñeñtes atarr nemorrentena.
 Ñeñto'marña ñetpa' o'ch huapuet sesho o'ch
 concorposet allo'tsenes. ¹⁰ Sapa' e'ñe cohuen
 acoña setsoton allpon neñoñ, ama sa'ypo'ñenno
 na, ñeñto'marña napa'çho'ña amach na'ypo'ñaso.
 O'ch necuamperres tarremphua allempoch
 muerochteñsopoterra ñeñtcha' topaterre'
 ora allohuen acheñenesha' ñeñt yeçha'yetsa
 aña patsro. ¹¹ O'ch e'ñe mamerrerrpa' o'ch
 nohuerrnasa. Ñeñt atto allpon same'ñena
 o'ch e'ñe señoñuanem amach sequeçhpatsche.
 Allochñapa' ama't eseshapa' amach errotenoñ
 puerratañpsaso ñeñt no'patatensa ñeñtcha'
 atarr socshaterre'. ¹² Ñeñt metana'tue'
 allohuen pa'namen topateñtsoçhno ñeñt ama
 nepuerramperpayo ñetpa' amate' errotenoñ
 ahupore'tare'tterreto allot, ñetpa' e'ñe attet
 ñerra'mrrate' all orratenet pocoll ñeñt pa'paquell
 pen Nompore' ñeñt e'ñe huomenc echarr aparet.
 Ama't eseshapa' amate' errotenoñ huapore'che.
 Ñaña e'ñe ñesheto napa' o'ch nequellcoñ
 Nompore' pa'so'cheñ, allotpa' o'ch nequellcoñ
 ñaña Nompore' pa'netser e'ñe allara ñesheto,
 ñeñtara pa'netser ñeñt soçhetsa Jerusalén,
 ñeñtcha' sohuerrtsa entoñ e'ñe etserrare'.
 Allotpa' o'ch nequellca' ñaña neso'cheñ all e'ñe
 ñesheto ñeñt e'ñe etserrare' neso'cheñ. ¹³ Ñeñt
 e'ñeñotene' añ ñoñets çhapanetepa'ch pueyoçhreto

ñeñt atet neñotatenanet na Necamquëñoñ ora allohuen ñeñt pame'ñeñoñet apcha'yenet allemeñ anetso'mar.' ” Arrpa' allohua ñeñt atet ot filadelfio'marneshacop.

Atto Juanpa' quellcan carta añecop ñeñt ame'ñetsa anetso Laodiceo

14 Ñeñt neserrpare'tatene' ñapa' alla oterrerr:

—Te'pa' o'ch pequellquërrerr carta añecop ñeñt cohuanpene' ñeñt ame'ñetsa all anetso Laodicea, o'ch potanet atet: “Napa' o'ch nequellconas carta attoch neñotatas ñeñt atet otenes Jesucristo ñeñt ama puenesho po'ñoñ. Ñeñt atet oteney Pomporecop ñeñtpa' atetcha' perrnay, ñaña ñeñt allpon oten, ñeñtpa' e'ne po'ñoñch atet, ñaña ñeñtara Cristo ñeñt ñanom eñall, allotña Pomporpa' yeñcatyesan allohuen ñeñt allpon eñall. ¹⁵⁻¹⁶ Cristoña te'pa' atet otenes: 'Napa' e'ne neñotuennas ñeñt ora allpon atet sepa'yen. Tarraña sapa' seçllañoñetsetsa same'ñenna, ama e'ne huomencaye' same'ñenno. Ñerra'm ama semno o'ch same'ña'na huomencpa' amachña same'ñatsetno ama't mamesha. Tarraña sapa' seçllañoñetsetsa same'ñenna. Nato' o'ch netma'ntacha atet. Sapa' ama atteyayso ñerra'mrrate' oñ ñeñt atarr sose', ñaña ama atteyayso ñerra'mrrate' oñ ñeñt atarr atserrsasen. Sapa' atta sepena ñerra'mrrate' oñ ñeñt mamesha shorrsastetsa ñeñt nanac netsena'ten. Neñto'marña napa' e'ne atet nentenes atet ñerra'mrrate' oñ ñeñt cha aya'pesatañtena. Ñerra'm yorrpa' çhach ya'pesatey o'ch ya'tatstera.

Ñeñto'marña sapa' e'ñe atet nentenes chach nemneñ o'ch nehuapore'tamperres. ¹⁷ Sapa' ama't soteneñ año' es sepallteno e'ño' sechuen ora ñeñt allpon poctetsa socop e'ñe sa setaruasot. Tarraña ñeñt sherbets secamquëñecoppa' ama secheñe ama't coñe'ta. Napa' atfa nentenes atet ñerra'mrrate' ñeñt nanac atsena'taret, atarrcha' amuerochtatarettena ñeñt e'ñe huocchañ ñaña aporo'yet attach muelle'mquën. ¹⁸ Ñeñto'marña na te'pa' o'ch noctape'chatterres sa o'ch notas sapa' ñeñt sepalltena. O'ch senamuen nesho ñeñt po'ñoçh nanac sherbets secamquëñecop. Allochñapa' attoch sechuerr shonte' esocmañen ñeñt e'ñe po'ñoçh sherbets. Ñeñt ama sherbetsopa' o'ch sa'ypo'ñer. Nato' o'ch netma'ntacha atto allempo atserrtatenet oropa' o'ch nohuanña a'yo ñeñt ama sherbetso allempoñapa' o'ch e'ñe orochayama ñeñt nanac sherbets. Ñeñt atarr sherbets atet ñerra'm oro ñeñtcha'ña se'nenña nesho. Elloña napa' o'ch netma'ntatasa atetcha' sepa, o'ch serañta nesho shetamuets ñeñt atarr huallama't. Allochñapa' ñeñtcha' sechorrerra attoch o'huañcha' sepenca ñeñt atto semuelle'mquën. Attoch serañtena ñaña quëllo'yeñtsopar alloch separterr seclle' allochñapa' attoch secuerr o'ch senterra e'ñe cohuen. ¹⁹ Ñehua, allohuen ñeñt po'ñoçh atarr nemorrentenapa' chocmach e'ñe cohuen noctape'chatterranet ñerra'm esempo atpare'tennet. Ñaña erroteno allohuen ñeñt nemorrentena o'ch necoñchach mame', tarraña ñeñtpa' e'ñe ñocpueta allochñapa'

atloch o'ch alla cotape'cherret cohuen nocop, o'ch alla ame'ñerrnet huomenc. ²⁰ Señochepa'ch ñeñtcha' atet netma'ntaterra. Napa' atetcha' nepena ñerra'mrrate' esesha' ñeñt chocma chore'tets yetarrof. Ñerra'm eseshas se'mapuerrnan neñoñ ñaña ñerra'm setorampenen, nañapa' o'ch nebe'tos all, allñapa' o'ch yerrallme'chen parro. ²¹ Ñeñt metana'tue' allohuen pa'namen topateñtsochno ñeñt ama nepuerram'perraye, ñetñapa' nemnatanetcha' o'ch amcha'tarettapreterrnet e'ñe all neconaño. E'ñech attet ñerra'mrrate' na, napa' e'ñe nemtana'tua allohuen pa'namen topateñtsochno. Ñeñto'marña napa' na'mcha'tarettapreteña Nompore'ñe all po'conaño. ²² Ñeñt e'mñotene' añ ñoñets chapanetepa'ch pueyo'chreto ñeñt atet neñotatenanet na Necamquëño' ora allohuen ñeñt pame'ñeñotet ap'cha'yenet allemeñ anetso'mar.' ” Arrpa' allohua ñeñt atet ot laodiceo'marneshacop.

4

Atto Juanpa' entan Yompor po'conaño e'ñe alla pue'ntañ

¹ Allempoñapa' alla gatyerrnerr po'poñ. Necuerrerr, allñapa' nentos yetarr atoraret allcha' nebe'tos o'ch nechap ento. Alla ne'muerrerr ñoñets ñeñt atet e'morrtetsa ñorra' atarr huomenc atet ñerra'mrrate' poctor atarr huomenc eñen. Ñeñtña ñoñetspa' atet oten:

—Apon arr, o'ch pebe'tosam'pesna o'ch negatyesa' allohuen ñeñtcha' atet perrtsa tsapa'onet.

2 Allempoña Yompor Puecamquëñ e'ñe chorrenna, atto nechap ento all nentos puesheñarr alla anen po'conaño. 3 Ñeñt anets all po'conaño'pa' atarr nanac cohuen aspanamcoquëno poptamco'tena atet ñerra'mrrate' mapue' ñeñt atarr cohuen poptetsa ñeñt otenet jaspe. Ellonetpa' po'poñontó atarr nanac cohuen tsamcoquëno poptamco'tena atet ñerra'mrrate' mapue' ñeñt otenet cornalina. Ñaña allo arca'tamñenapa' ñeñtpa'cho'ña atet ñerra'mrrate' ayon tarraña ñeñtpa' atarr nanac cohuen aspano shemashro poptena; e'ñe atet poptena ñerra'mrrate' mapue' ñeñt otenet esmeralda. 4 Ñaña to'pño'mar ñeñt rroçhtamñene' all shonte' po'poñ conañechno. Ñeñt conañechno to'pño'tsa'yen ñeñt rroçhtamñene' allo'tsen epoch çharra' puechena pa'tats. Ñaña ñeñt anorrçhets allohuen conañechno ñeñtpa'cho'ña allo'tsen epoch çharrasheña puechena pa'tats ñeñt sherbene' Yompor all pue'ntaño. Coçhneshareret pa'shtam atarr huallama'tarer, po'choyo'met oro ayeçhcataret ñeñt choyo'mitenet. 5 E'ñe rroçh conañotpa' allot huena meratste', allot huena ñaña tatste'. Allpa' atarr huomenc ma'moreten. E'ñe alla allame'tets po'conaño ñehuapot allot'sen cançherr huerare ñeñt huoretyets all. Ñeñtpa' ñeñt toma'ntenaya Yompor Puecamquëñ ñeñt cançherr ñeñt sherba'yets e'ñe po'poñe'ttsoema. 6 E'ñe alla a'yenet po'conaño' all orrtena erracmañen atet ñerra'mrrate' ñeñt añecmuen rerpat ñeñt e'ñe orrtatuene' ora ñeñt allpon eñall

all.

Allo'tsen po'conañ e'ñe pa'tatsshemñto'marot all tomchen pa'tats ñeññ berrma'ttetsa. Ñeññapa' shonte' pa'cillo'yecho emota cohua'yen. Pa'chco'tago'tpa'cho' shonte' pa'cille' allo't cohuen. ⁷ Ñeññ ñanom ñeññ berrma'ttetsa all, ñeññpa' e'ñe atet ñerra'mrrate' ma'ñor. Po'poñpa' allo'tsen ñaãa atet ñerra'mrrate' toro, po'poñ pa'tsa'pot pa'cloyotpa' e'ñe atet orrtena ñerra'mrrate' acheñ. Po'poñ all orrtena attema't ñerra'mrrate' ñeññ otenet contor ñerra'm esempo anena. ⁸ Ñeññ pa'tatso'mar berrma'tpa' e'ñe apa'pa'yetarerochet, pate'tetspa' echenan pechapa'ttsocmuet pa'pue' penet. Pa'pa'yot enotpa' e'ñe aclo'yetarerochet, puelleca'notpa'cho'ña aclo'yetareret emoto'mar allo't cohua'yenet. E'ñe ellapenete't arepenete't all achoteñet Yompor, ama't mameshapa' ama ameseneto atto achoteñet Yompor. Ñeññpa' atet otenet:

Parets, parets, parets ñeññtara Yompor ñeññ atarr ahuaencat nanac ñeññ Yepartseshar yepen ñeññ chocma eñall. Ama't ahua'toteñ eñall ñaãa ñeññtara ñeññcha' ello huerrtsa po'pocheño.

⁹ Ñaãa ñeññ berrma'ttetsa allpa' cohuentateññañet Yompor ñeññ anets all po'conaño, atarr añcha'na'tpo' enteñet, ñaãa chocma puema'yocheño'tet parasyoso'teñet Parets ñeññ ama arromña'feshayaye ama't ahua'ta. ¹⁰ Ñetpa' ñerra'm esempo aye'chochtateñet Parets, añña ñeññ epoch charrasheña ñeññ puechetsa pa'tats ñeññ sherbene' Yompor allpa'

ñetpa'cho'ña o'chcho' concorpa'rretenet e'ñe all ñesho, o'chcho' ma'yocheñet ñamet Yompor ñeñt' ama arromña'eshayaye ama't errponaña. Allotpa' o'ch a'meyet po'choyo'm' o'chcho' net e'ñe Yomporeshonet ñeñt' anets all po'conaño. O'chcho' aye'chochtateñet Yompor ñamet, ñeñtpa' atet otenet:

¹¹ Yompore, ñeñteḡ Yepartseshareḡ, ñeñteḡ nanac Partsoḡ, ya añ poctetsa o'ch yeco-huentatonapḡ ñeñteḡ añcha'na'tpahueḡ ñaña atarr ahuamencateḡ. Tarro'mar ḡa yechcatyene' ora allpon ñeñt' eñall, e'ñe ḡa pemneññoḡ ahuo't eñalleyesa, e'ñe ḡa peñoñoḡ ahuo't yechca'yena ñeñt' allpon eñall.

5

Atto Juanpa' entan Cristo ñeñt' atma'ntataret Carrnero, e'ñe ñapḡta toran Yompor po'libro

¹ Allempoñapa' alla necuererr ñeñt' anets all po'conaño. Potot po'cohuenrotpa' all nent all orrenan libro apco'nottataret, e'ñe emoto'mar aquellca'huaret o'ponot ñaña enot. Echenan cancherr ñeñt' allo ayomrraret atto e'ñe echarr aḡaret.

² Ñaña all nent puesheñarr mellañoḡeñ ñeñt' atarr ahuamencat. Ñaña' rrana huomenc, ñeñtpa' atet otenet:

—Esha'huaca' e'ñe cohuenare' cotape'chetsña Yomporecop ñeñt'cha' tore' añ Yompor po'libro allo echarr aḡareḡtena.

³ Tarraña ama't puesheñarrapa' ama eñalle ñeñt'cha' tore' Yompor po'libro. Ama't

puesheñarra ñeñt̃ ento'tsen ñaña ama't ñeñt̃ patso'tsen ñaña ama't ñeñt̃ o'pono'tsen patso, ama eñalle ñeñt̃cha' muenatet ñeñt̃cha' tore' Yompor po'libro attoch eñorachet. ⁴ Napa' ñeñt̃ña atarr neyarre' atto ama't puesheñarrapa' ama neñche ñeñt̃ e'ñe cohuenare' es cotape'chets Yomporecop ñeñt̃cha' muenatet o'ch toran Yompor po'libro ñeñt̃cha' eñorate'. ⁵ Allempoña ñeñt̃ epoch çharrasheña ñeñt̃ puechetsa pa'tats ñeñt̃ sherbene' Yompor, puesheñarrña' oten:

—Amach peyahuatsto, tarro'mar eñall puesheñarr ñeñt̃ e'ñe pocte' ñeñt̃cha' tore' Yompor po'libro ñeñt̃ cançherr allo echarr aþarettena, tarro'mar ñapa' ñeñt̃ metana'tue' allohuen pa'namen topateñtsoçhno, ñeñt̃ña' añepa't Cristo ñeñt̃ara atma'ntatare't Ma'ñor. Ñeñt̃pa' judámerena'tar ñeñt̃ara David po'mreneñ.

⁶ Necuererr, allña' nent Cristo ñeñt̃ toma'ntenaya Carrnero. All ten e'ñe rroçho allo'tsa'yen Parets po'conañ ñaña añ pa'tatso'mar ñeñt̃ berrma'ttetsa ñaña e'ñe allo'tsa'yen ñeñt̃ sherbene' Yompor. E'ñe rroçho all ten Cristo ñeñt̃ atma'ntatare't Carrnero. Orrtena atet ñerra'mrrate' carrnero ñeñt̃ amsarettetsa ochñartsocop. Ñeñt̃ carrneropa' cançherr po'ucor, echenan ñaña cançherr pa'c'le'. Ñeñt̃ cançherr pa'c'le'pa' ñeñt̃pa' añ Yompor Puecamquëñ ñeñt̃ara cançherr ñeñt̃cha' sherba'yesets e'ñe po'poñe'ttsoçma ora erracmañen añe patsro allcha' amñare'tetyerret. ⁷ Allempoña añ Carrneropa' o' huapa o' çhap allo'tsen Yompor ñeñt̃ anets all po'conaño. Ñaña' chetsosan

Yompor po'libro ñeñt orren po'cohuenrot. ⁸ O' chetan libropa' allempoña añ ñeñt pa'tatso'mar berrma't ñaña ñeñt epoch çharrasheña ñeñt puechetsa pa'tats ñeñt sherbene' Yompor, allohuenetñapa' concorpa'rreteñet Cristo ñeñt atma'ntataret Carrnero. Puesheña'ttsetpa' orrenet arpa ñaña pajo' ñeñt orotaten all anaret ñeñt atarr eñmosa'ttetsa Yomporcop. Ñehua, añ ñeñt eñmosa'ttetsa añ toma'ntena ñeñt atto ma'yochena ñeñt pueyochresha' pen Parets. ⁹ Añña ñeñt concorpa'rrtetsapa' ñetñapa' morrechenet ñeñt etserra morreñets ñeñt'pa' atet açhoteñet Cristo ñeñt atma'ntataret Carrnero:

Papa' e'ñe cohuenare' es pepa'yen ñeñto'mar e'ñe pocte' p'ach chete' Yompor po'libro, e'ñe pocte' p'ach tore' allo echarr a'pare'tteta tarro'mar p'apa' p'a amsare'ttatsa, perra-soña p'apa' allo petsa'tuonaya yo'chñar allochñapa' attoch e'ñe puechemer perrey Yompor ama't allohueney ñeñtey pa'namen acheñey, ama't erra'tsena mereñtsorey allo't yehuena, ama't ñaña erra'tsena ñoñtsor allo yeñosyen e'ñe po'poñe'ttsoema, ama't ñaña pa'namenana'tarey allohuen errohuanen ñeñt e'ñe ya'netser ye'pa'yen.

¹⁰ Ñeñtey allohueneypa' p'a yemnatene' o'ch ya'm'cha'tare'ttapa'pa' attochña yesherbapretene'p Yompor ñeñt atarr Parets. Attoña yecorneshaten Partsocop. Ñaña attoch ya'm'cha'tare'tterra añe patsro.

¹¹ Allempoña alla necuererr o' ne'muererr mellaño'teñesha' atet eñosyenet. Shontet nanac

che'muechenet all rroçhtam̃peñet a'yohuen errañaren. Ñaña ñeñt̃ berrma'ttetsa all ñaña ñeñt̃ sherbene' Yompor ñeñt̃ allohuenet ma'potanto'maretpa' ñeñt̃ e'ñe rroçhtam̃pene' Yompor ñeñt̃ anets all po'conaño. ¹² Ñeñt̃ mellañoṭeñnesha' ñetñapa' e'morrtenet huomenc all açhoteñet Cristo ñeñt̃ atma'ntatareṭ Carrnero. Ñeñt̃pa' atet̃ otenet:

Cristo ñeñt̃ toma'ntenaya Carrnero ñeñt̃ amtsarettatsa, ñapa' e'ñe cohuenare' es pa'yen ñeñto'marña ñapa' e'ñe pocte' ahua mencat̃ena, agapanepa' shonte' esocmañen ñaña e'ñe pocte' eñotañtepa'ch, ñaña e'ñe pocte' partsotepa'ch, ñaña e'ñe pocte' añcha'na'tpahuo tepa'ch. Ñaña e'ñe pocte' ya yecohuentateñoṭ ya'ye'choçhtatoñepa'ch.

¹³ Allempoña ne'muerrerr atet̃ ama't allohuen ñeñt̃ Yompor pueyeçhcatar aye'choçhtateññañet Yompor ama't ñeñt̃ ento'tsa'yen ñaña ama't allohuen ñeñt̃ patso'tsa'yen, ñaña allohuen ñeñt̃ o'pono'tsen patso ñaña oño. Ama't e'ñe allohuen pueyeçhcatar ñeñt̃ allo'tsa'yen allohuenet aye'choçhtateññañet Yompor, atet̃ otenet:

Ya'ye'choçhtatoñepa'ch Yompor ñeñt̃
 anets po'conaño ñaña Puechemer
 Cristo ñeñt̃ atma'ntatareṭ Carrnero.
 Añcha'na'tpahuepa'ch yenteñ,
 yecohuentatoñepa'ch tarro'mar ñetpa'
 atarr ahua mencat̃et tayoteñ ama't
 errponañohuen.

14 Ñaña ñeñt berrma'ttetsa pa'tatso'mar all ñetñapa' otenet:

—Ñeñtpa' attetepa'ch.

Ñaña añña ñeñt sherbene' Yompor ñeñt epoch çharrasheña ñeñt puechetsa pa'tats o' concorpa'rrtet all ma'yocheñet Yompor ñeñt ama arromñateshayaye.

6

Atto Cristopa' toran ñeñt cançherr allo echarr aþarettena Yompor po'libro

¹ Allempoñapa' nent Cristo ñeñt toma'ntenaya Carrnero attoch ñach tore' ñeñt cançherr allo echarr aþarettena Yompor po'libro. Allempoña ñapa' o' tore pa'terr ñeñt e'ñe ñanom allo ayomrraret ñeñt libro. Allempoña o' tore, añña pa'tatso'mar ñeñt berrma'ttetsa, puesheñarrñapa' eños. Nañapa' o' ne'muerrerr ñeñt atet eñen huomenc, po'ñoñpa' e'ñe atet e'morrtena ñerra'mrrate' çho tatstena. Ñeñtpa' atet oten:

—¡Aþon, pecue'!

² Naña necue'pa' nent pa'terr cahual atarr hual-laþnanen. Ñeñtña montenayapa' echenan pa'terr po'ca'not ñeñt orra'nen potot. Allñaapa' apet pa'terr choyo'mets ñeñtcha' choyo'metnoma. Nañapa' ahuo' o'ch quellara'yena' o'ch e'ñe a'mchechuan ñeñt e'moñe'tyen.

³ Allempo torerranerr ñeñt puepañ allo ayomrraret Yompor po'libro, nañapa' alla ne'muererr ñeñt puepañ berrma'tpa' o' alla eñorerrerr. Ñeñtpa'çho'ña ñeñtara atet oterrerr:

—¡Añon, pecue'!

⁴ Allempoñapa' čha'nerrerr po'poñ cahuall, ñeñtñaapa' atarr tsañnanen. Ñeñtña montenaya allñaapa' apet pa'terr espada atarr allpocha'p̄. Ñañaapa' o' muenateñet o'ch quellaratanna'tatan acheñenesha' arr patsro attočna muetsatanna'tatenanet. Attoña ñetpa' o'huañcha' muechet yečhenet arr patsro.

⁵ Allempo torerranerr ñeñt puema'pañ allo ayomrrare't Yompor po'libro ñañaapa' alla ne'muererr ñeñt puema'pañ berrma'tpa' o' alla eñorerrerr. Ñeñtpa'čo'ña ñeñtara atet oterrerr:

—¡Añon, pecue'!

Ñaña necuererrpa' nenterrerr po'poñ cahuall ñeñtñaapa' atarr quellueñnanen. Ñeñt montenayapa' orra'nenan pa'terr pesamets.

⁶ Allo'tsa'yen ñeñt berrma'ttetsapa' e'ñe all rročo'tpa' ne'muererr ñeñt atet e'morrterrerr ñoñets, ñeñtpa' atet oten ñoñets:

—Pa'terr kilo trigopa' nanquëpa'ch tsa'teterr ama't ñeñt pa'terr denario*, ñaña ma'pa kilo cebadapa' nanquëpa'ch tsa'terra. Tsa'terrepapa'ch ñaña pa'terr denario. Tarraña olivose' ñaña vinospa' chocmuepa'ch eñall, amach seprratam̄psatsetye.

⁷ Allempo torerranerr ñeñt puëpa'tatseñ allo ayomrrare't Yompor po'libro, ñañaapa' alla ne'muererr ñeñt puëpa'tatseñ berrma'tpa' o' alla eñorerrerr. Ñeñtpa'čo'ña ñeñtara atet oterrerr:

—¡Añon, pecue'!

* **6:6** Denariopa' quelle ñeñt allpon tsa'tenet pamtarr ñeñt taru-
asets all pa'nyo.

8 Naña necuererrpa' nenterrerr ñeñt paterr cahuall atarr shemashreḡnaneno puerramaḡnen. Ñeñt montenayapa' añ pa'so'cheñ Rromueñets. Ñeñt cotene' chenta'pa' añ toma'ntena ñeñtcha' aguëne' allohuen ñeñtcha' rromuets. Ñeñtḡpa' apareḡ llesens añecop attoch a'cllatatan shonte' acheñenesha' arr patso. Ama't pasheḡarr pats, allpon otenet un cuarto, allponcha' a'cllatatuerran acheñenesha'. Ñeñtḡpa' atetcha' a'cllatatanet, quellareñtsoterrcha', chaporrñatsoterrcha', atsnañtsoterrcha', orrterrach berr ñeñt atarr atsrre'mñañ ñeñt atarr bellac arr patso.

9 Allempoñapa' o' torerranerr ñeñt pa'mnareñ allo ayomrrareḡ Yompor po'libro, naña necuererrpa' allñaḡpa' nenterrerr altar ñeñt allecma a'crrateteḡ ñeñt eñmosaḡtetsa Yomporcop. E'ñe all patsot altaro all nent shonte' camuecñetsoçhno ñeñt amtsanatareḡtatseḡ all e'ñe pueserrpare'teñoḡet Yompor po'ñoñ atto a'meḡeteḡ ñaña atto ame'ñeñet Cristo.

10 Añña ñeñt camuecñetsoçhnopa' ñetñaḡpa' rrannartenetpa' oteñet Yompor:

—Yompor eḡpa atarr Partsoḡ, atarr ayemuetpo' atet ḡoteny. Esemḡpohuachca' pecoñchatuerña acheñenesha' all patsro, esemḡpohuachca' petsa'tateraña ñeñt acheñer yemtsanatayeḡ ñeñt patso'tsen. Añpa' allohua atet ot camuecñetsnesha'.

11 Ñetña puesheña'ttsetpa' apareḡtenet pa'shtam atarr huallama'tarer. Ñaña ñetñaḡpa' otareḡtet ato't e'ñe ameseta'. “O' mameshaña o'ch etso-tua allpon po'potantañecop semo'nasheñ ñeñtcha'

amtsanatareftertserr ñeñtes e'ñe attecma sesherebeñ Cristo."

¹² Allempo torerranerr ñeñt po'pechapueñ allo ayomrraref Yompor po'libro ñaña o' alla necuererrpa' nent ñaña cha puetalle'chena pats huomenc. Atsne'ñapa' o' checmet atef ñerra'mrrate' shetamuets ñeñt atarr quellue ñeñt chorrena ñeñt atarr llequëtsa. Arrorrñapa' o' cha tsama'tta atef ñerra'mrrate' errasats.

¹³ Rantochno ñaña ñeñt ento'tsa'yen allohuenpa' o'cha shorcha'tua o' cha'cha't patso. O'ch netma'ntacha atef ñerra'mrrate' parte ñeñt e'meret o'ch huomenquëshatpa' pue'merñapa' o'ch a'shore'tamipesue huomenquësha', ama't atarr emem pue'mer.†

¹⁴ Enetpa'cho'ña o' e'ñe chenca'hua atef ñerra'm papell eparetpa' o'huañcha' orrta. Ama't ora allpon aspentarerpa'cho'ña o' e'ñe rrote'tyesuahua ñopa'tets. Ñaña ora allohuen oñechno ñeñt rrochpe'chañechno ñeñtpa'cho'ña o' e'ñe rrote'tyesuahua.

¹⁵ Allempoñapa' allohuen acheñenesha' ñeñt ye'cha'yetsa añe patsropa' o' e'ñe e'potrra'tuet arrorofo'mar ñaña mapuetpono'mar ñeñt aspentarero'tsa'yen. Ama't allohuen am'cha'taretneshachno o' e'ñe e'potrra'tuet, ñaña allohuen ñeñt atarr sherba'yets, ñaña ñeñt ec'llayoretechno, ñaña ñeñt pa'm'cha'tareter pen solltar, ñaña ñeñt atarr ahuamencat entyetsa, ñaña ama't allohuen acheñ ñeñt ama esoye' enteneto ñeñt ataruasataref e'ñe atta, ama't ñaña allohuen ñeñt ama

† **6:13** Ñehua, Juanpa' añ toma'ntatena higo ñeñt puenarem penet all pa'nyo.

ataruasareteyaye ñeñt e'ñe cohueno'tsen, allohuenet e'ñe e'potrra'tuenet. ¹⁶ Allohuenetpa' chore'teñet aspenet ñaña mapuetačno atet otenet:

—Te'ñapa' yeñgatañperrepa' attotcha' e'poterrey attoch amach enterrye Parets ñeñt anets all po'conaño allochñapa' amach errotenot coñchatterrye Cristo ñeñt toma'ntenaya Carrnero.

¹⁷ Tarro'mar te'pa' o' chap añ yetro allempoch yoroçterra allempoch atsa'tataretterra allohuen acheñenesha'. Ama't eseshapa' amach errotenot ahuanotoño Yompor po'yoroçhenña.

7

Atto Israel po'ñreneñ ñeñtcha' ay-ato'ma'taretetyesta

¹ Allempoña napa' nent mellañoñenesha' pa'tatssheña. E'ñe allohuanen pats, ñeñt pa'tats po'topñaro'mar allñapa' all tomyen puesheña'tets mellañoñeñ ñeñt pa'tatssheña. Ñeñt pa'tatssheña ñetñapa' ñet epatare'tenet mōrr pa'tatsshemto'marot allot huapyena mōrr. Allochñapa' attoch amach atarr mōrrarsañpeno añ patser, ama't ñaña oñečno, ñaña ama't patrra tsachpa' amach mōrrarsañpeno. ² Allempoña napa' o' alla nenterrerr po'psheñeñ mellañoñeñ, arr orrtena allot huena atsne'. Ñapa' añ orren yapets ñeñt alloch yanatan allohuen ñeñt pueyochresha' pen Yompor ñeñt ama arromñateshayaye ama't ahuaa. Ñaña' rrana huomencpa' otan mellañoñenesha' ñeñt pa'tatssheño'mar ñeñt añecop ahuanencattenet

atfoch ñetcha' pomnaren pet pats ñaña oñechno.
 3 Ñeñtpa' atet otanet:

—Amach errof sepatsto añ pats ama't oñ ama't
 tsach ato'tña yeyato'ma'tueya' allohuen ñeñt
 torra'yetsa Yomporecop.

4 Allempoña ne'muerrerr ñeñt atet oteñet
 ñeñtcha' allpon ayato'ma'tarettatsa. Ciento
 cuarenta cuatro mil ñeñtpa' allpon otanet.
 Ñeñt ciento cuarenta cuatro mil acheñenesha'
 ñetpa' e'ñe po'poñe'ttsocmuet mereñtsoret.
 E'ñe ñeñta mereñtsorecmuet ñeñt čharrasheña
 puechena epa ñeñt pa'tañ pene' Israel ñeñt
 corratset' ahuat. 5 Ñehua, pate'tets mereñtsorpa'
 allponsheña ñeñtcha' ayato'ma'tarettatsa:
 Judána'tarpa' allo'tsencha' čharra' puechena
 epa mil acheñenesha'; Rubénna'tarpa'čo'ña
 allo'tsencha' čharra' puechena epa
 mil acheñenesha'; Gadna'tarpa'čo'ña
 allo'tsencha' čharra' puechena epa
 mil acheñenesha'; 6 Aserna'tarpa'čo'ña
 allo'tsencha' čharra' puechena epa mil
 acheñenesha'; Neftalína'tarpa'čo'ña čharra'
 puechena epa mil acheñenesha'; Man-
 asésna'tarpa'čo'ña čharra' puechena epa mil;
 7 Simeónna'tarpa'čo'ña čharra' puechena epa
 mil; Levína'tarpa'čo'ña čharra' puechena epa
 mil; Isacarna'tarpa'čo'ña čharra' puechena epa
 mil; 8 Zabulónna'tarpa'čo'ña čharra' puechena
 epa mil; Joséna'tarpa'čo'ña čharra' puechena epa
 mil; Benjamínna'tarpa'čo'ña čharra' puechena
 epa mil acheñenesha'.

Atto shonte' pa'namen acheñenesha' ñetpa' e'ñe

huallama'tarerochet pa'shtam

⁹ Allempoña napa' o' alla nenterrerr shonte' acheñenesha', nanac che'muechenet ama e'ñotuenteno ñeñt' allpon allo'tsen. Shonte' pa'namen acheñenesha'. Ñeñtpa' pa'namen anetsoť huačha'tyenet, shonte' pa'namen mereñtsoret ñeñt' huačhetsa all, shonte' pa'namen ñoñets e'ñe po'poñe'ttsocma eñosyenet. Ñetñapa' all tomčhenet e'ñe ñehuapoť allo'tsen Yompor po'conañ allo'tsen ñaña Cristo ñeñt' toma'ntenaya Carrnero. Ñetpa' e'ñe huallama'tarerochet pa'shtam. Pototetñapa' añ orra'yenet atet ñerra'm shequëpan. ¹⁰ Allohuenetpa' rranenet, otenet:

Yompor ñeñt' po'conaño'tsen ñapa' o' a'qeshpaterrey epuet ñaña Puechemer ñeñt' toma'ntenaya Carrnero.

¹¹ Ñeñt' berrma'ttetsa pa'tatso'mar ñaña ñeñt' sherbene' Yompor all, ñaña allohuen mellañoťeñnesha' ñeñt' tomčhets a'yohuen errapařen, ñetña allohuenetpa' e'ñe rročhtam̄pesueñet Yompor ñeñt' po'conaño'tsen. Ñeñt' mellañoťeñnesha' all rrema'rrartenet Yompor po'conaño atet ma'yocheñet Yompor.

¹² Ñeñtpa' atet aye'chočhtateññañet Yompor, ñeñtpa' atet otenet:

Attetepa'ch yocop ya'ye'chočhtatoñepa'ch, yeco-huentatoñepa'ch, amuepa'ch ahuañaño atto eñotañtena Yompor, yeparasyoso'chepa'ch, añcha'na'tpahuepa'ch yenteñ, amuepa'ch ahuañañaatto ñeñt' atto ahuamencattena Yompor, añcha'tarettepa'ch tayoteñ errponohuañen. Ñeñtpa' attetepa'ch.

13 Allempoña puesheñarr ñeñt̃ sherbene' Yompor, ñañaapa' a'p̃to'ten, atet̃ oten:

—Papa' ¿ama't̃ peñoteñeña eseshačhnote'ña ñeñt̃ chorrenaya huallama't̃arer, ñaña ama't̃ peñoteñe errofte'ña huačhenet?

14 Nañapa' atet̃ noch:

—Amaca'ye Nompore neñoteñe. Pate'ca'yeña eñotene'.

Ñañaapa' o' alla oterren:

—Añenesha' ñeñt̃ chorrenaya huallama't̃arer ñet̃ña ahuanterret allempo orrterra pa'namen muerochteñt̃sočno. Ñaña ñetpa' atto e'shohuaret̃tet po'chñaret e'ñe Cristo po'rroso, ñeñt̃ña ottetsa atet̃ ñerra'mrrate' ñetpa' o' atsama't̃aret̃tet pa'shtam attoch e'ñe cohuen a'huallama't̃ataret̃tet pa'shtamuet e'ñe cohuen.

15 Ñeñto'marña ñetpa' allo'tsa'yenet Yompor po'conaño. All chocma sherbeñet Yompor — ellapenete't̃, arepenete't̃ sherbatset all Yompor pa'paclo. Yomporña ñeñt̃ anets all po'conaño, ñachña e'ñe a'natenahuet e'ñe ñesho.

16 Ñetpa' amach muerochterrete'te pa'chporrñoñ ama't̃ po'ñpañoñ. Ñaña ñetpa' amach errotenoñ chemuerranete'te atsne' ñaña amach a'mñechaterranete'te ñaña huerate'. 17 Tarro'mar Cristo ñeñt̃ atma'ntataret̃ Carrnero ñeñt̃ allo'tsen all Yompor po'conaño, ñachña cohuanñpenahuet e'ñe atet̃ ñerra'mrrate' carrnero e'ñech cohuanñpeñ pamo'mte'. Ñapa' chapatanetcha' all poten oñ ñeñt̃cha' apahuet attoch correnet errponañohuen. Yomporña ñach a'huañam̃psahuet puellquëña ama't̃ ahuatapa' amach yahuerrete'te.

8

*Allempo Cristopa' toruan po'cančhroñ ñeñt
allo ayomrrarettena Yompor po'libro allempoñapa'
orrita ñaña puesheñarr mellañoñeñ ñeñt orrene'
po'pajo' orotaten*

¹ Allempoña Cristo ñeñt toma'ntenaya Carrnero, ñapa' allempo e'ñe toruan po'cančhroñ ñeñt allo ayomrraret Yompor po'libro, e'ñe muetsoñeñtua poctacma pue'ntaño tematuanen. ² Allempoña napa' alla nenterrerr mellañoñeñnesha' ñeñt cančherrsheña ñeñt tomčhets e'ñe all Yomporesho. Ñetña puesheña'ttset allpa' aparettet poctor. ³ Allempoña o' huapa po'psheñeñ mellañoñeñ. Huapapa' o' tomos all altaro. Añ altarpa' allecma a'crratenet tsach puese' ñeñtña atarr amostetsa all. Pamosoñña' ñeñt atarr eñmosa'ttetsa Yomporecop. Ñeñt mellañoñeñpa' añ orren pajo' orotaten allcha' nenan ñeñtcha' eñmosa'ttetsa. Ñeñt mellañoñeñpa' allña apet shonte' eñmosa' ñeñtcha' eñmosa'ttate' ñeñt atto ma'yochena Parets pueyochresha'. Ñeñtña eñmosa'ttetsapa' ñeñtcha' net altaro ñeñt ayečhcataret oro ñeñt e'ñe ñehuapo'tsen Yompor po'conaño. ⁴ Ñeñt orrampen mellañoñeñ eñmosa'tpa' cha amosoñe'chnen enonet allo'tsen Yompor, ñeñtña eñmosa'ttate' ñeñt atto ma'yochena Parets pueyochresha'. ⁵ Allempoña mellañoñeñpa' cheterran pajo'pa' o' esha'tan tso' puecallañshor ñeñt cheta' altarot e'ñe e'chorran tso' pajo. Allempoñapa' huapore'ch patso.

Chap patsopa' meratstosa, tatstosa, e'morrtsosa huomenc, pellatan pats.

Atto Juanpa' entan cancherrsheña mellañoñeñ ñeñt poctorets

6 Allempoña mellañoñeñ ñeñt cancherrsheña ñeñt epoctoreñarer puesheña'ttsetpa' o' echantye-set po'poctor o'ch a'toret.

7 Allempoña ñeñt ñanom mellañoñeñpa' o' poc-tora', poctora'huatsapa' orrta ñeñt ma'po'mar ñeñtcha' ahupore'tarettatsa patso. Ñeñtpa' añ hue' allotpa' ñaña tso' ñeñt tsetetsa errasatso. Atto ahupore'tarettatsa patso allempo chap patsopa' e'ñe a'huortatuosan ñeñt allo'tsen all chap patso. Tso'ñapa' errañaren e'ñe a'poyuosan ñeñt allpon tsachečno ñaña allpon ta'tečno ñeñt allo'tsa'yen ama't allohuanen pats allpon ñeñt otenet la tercera parte.

8 Allempoña po'psheñeñ mellañoñeñ ñeñt puepañpa' o' poctoreñerrerr. Poctora'huerrtserrpa' orrterrerr atet ñerra'm ñeñt nanac atarr aspenet. Ñeñtñapa' cha huorten. Ñeñt aspenetpa' ahupore'tarettatsa sa'po. O'ña chap oñopa' errañarenña oñpa' puenasa errasats allohuanen oñ ñeñt allpon otenet la tercera parte. 9 Ñaña ñeñt allpon yeçhetsa all oño errañaren, e'ñe colla'hua, allpon colla'huatsa ñeñt otenet la tercera parte. Ñaña ñeñt allohuen botečno ñeñt chope'chyets all oño errañaren e'ñe chenca'huet, allpon chenca'huatsa ñeñt otenet la tercera parte.

10-11 Allempoña po'psheñeñ mellañoñeñ ñeññ puema'pañpa' o' poctorerrerr. Poc-tora'huerrtserrpa' orrterrerr ranto ento ñeññ añecmuen atarremñ. Shora'nerrerr cha huerarere'tnena. Chap allo'tsa'yen po'ñesočno ñaña allot potayen oñečno errañaren arr patsro. Ñeñtpa' arrohua chap ñeññ allpon otenet la tercera parte. Ñeññ rantopa' añ pa'so'cheñ Peshrremñ. Chap allo'tsa'yen oñečno ñeñtpa' cha a'pesherretuosan oñečno errañaren arr patsro. Ñeñtpa' allponohua a'pesherrtatan oñečno ñeññ allpon otenet la tercera parte. Oñ po'peshrroña ñeñña a'cclatue'ña shonte' acheñenesha' all.

12 Allempoña po'psheñeñ mellañoñeñ ñeññ puepa'tatseñ o' poctorerrerr. Poc-tora'huerrtserrpa' allempocma çhote' errotetyesa atsne' ñaña arrorr ñaña rantočno, o' attaña checmetyeset. Ñetpa' allpon checmetyesets ñeññ allpon otenet la tercera parte. Ñeññ atto çhoyo'tenet yeto ñaña tsapopa' o'huañ atsnomyeset. Ñeññ allpon o'huañ çhoyo'tyeset yeto ñaña tsapo ñeñtpa' allpon otenet la tercera parte.

13 Allempoña napa' o' alla necuererrpa' allñapa' nenterrerr po'psheñeñ mellañoñeñ ñapueñ all anoma'mtena ento allpononet. Allñapa' ne'muerrerr ñeññ atet eñosnom huomenc. Panoma'mteñoŋpa' atet oten:

—Llequëñtsa-bee ñeññ allohuenacop ñeññ yeçha'yetsa añe patsro. O' mameshaña o'ch poctora'huerrerr po'poñ ma'psheño'mar mellañoñeñ.

9

Atto o' e'ñe ma'psheñaña mellañoñeñ ñeñicha' poctorerrtserr e'ñe allohuanen

¹ Allempoña po'psheñeñ mellañoñeñ ñeñt pa'mnareña' o' poctorerrerr. Pocrora'huerrtserrpa' nañapa' all nenterrerr ranto atarreni ñeñt shora'nmats entot o' e'ñe chap patso e'ñe atet orrtosa ñerra'm mellañoñeñ. Ñeñña mellañoñeñ allña'pa' apet paterr llave alloch toran allo e'tamñsaret arrorot ñeñt atarr o'pononet arrorotena pats. ² Ñaña'pa' o' toramñsan arrorot. Ñeñña arrorot allotña cha'nom amos shonte' atet ñerra'mrrate' cho chemue'chenet. Chepoten amos cha muene' emayenan ama't atsne', erracmañen chepoten, e'ñe chorren amos. ³ Atto atarr chepoten amospa' cha'nmacha'tatan ñaña allot ahuañchenclla nanac shonte', pamcha'tyesa erracmañen patso. Nehua, ñeñt ahuañchencllapa' o' apet attoch epotaña atet pena ñerra'mrrate' yellas ñeñt atarr epotañ. ⁴ Ahuañchencllaña'pa' atet otareña amach erroñ patstano ta'te' ñeñt patso'tsen, amach erroñ patstano ñaña tsach. Ama't ñaña allohuen ñeñt pa'namen chopyets aña patsro amach erroñ patsche. Añcha'ña erroñ pa' acheñ ñeñt ama ayato'ma'tareteyaye Yompor pueyotsaparo. ⁵ Ama muenacheto o'ch muetsan ama't patrra acheñ allempo. Ñeñt ahuañchencllapa' aña oteñet o'ch muerochtatan acheñ amnarma arrorr. Ñeñtpa' atetcha' atserrpanet atet atserrtena yellas ñerra'm cho epota'y. ⁶ Allempoña acheñenesha'pa' e'netcha' attoch rromuet tarraña amach erroñenoñ

rromueto. Ama'tcha' atarr ya'ñametare'tenetañpa' amach rromueto.

⁷ Ñeññ ahuañchenclla atet orrtena ñerra'mrrate' cahuall allempo o'ch natyeñet attoch quellara-chet. Poñpa' e'ñe atet orrtena ñerra'm choyo'mets ñeññ orotaten. Pa'clloyotpa' e'ñe atet orrtena ñerra'mrrate' acheñ. ⁸ Echē, pue'chpa' añecmuen atet ñerra'mrrate' coyanesha' pue'ch. Pa'spa' e'ñe atet orrtena ñerra'mrrate' ma'yarras. ⁹ Pa'tallpa' e'ñe atet orrtena ñerra'mrrate' asertall ñeññcha' moñenaya, amach etsoto allo saneñet. Ñaña ahuañchenclla ñerra'm esempo anomchenapa' e'ñech atet e'morrtena ñerra'mrrate' shonte' carro ma'moretets allempo matateñ cahuall huomenc attoch chapuet allcha' quellaroset. ¹⁰ Pa'sme'llpa' e'ñe atet orrtena ñerra'mrrate' yellas pa'sme'll allot epotañtena. Pa'sme'llotsen puepotañer allot atserrpenan acheñenesha'. E'ñech amnarmña arrorr muerochtatenanet. ¹¹ Ñeññ ahuañchenclla ñetpa'cho'ña añ pa'mcha'tareter penet mellañoñeñ ñeññ amcha'tarettetsa all allo'tsen arrorot ñeññ atarr arrorot o'pononet pats. Mellañoñeñ ñeññ pa'mcha'tareter pen ahuañchenclla, hebreaçhopa' añ socheñet Abadón; griegaçhoñapa' añ socheñet Apolión. Ñeññ epo'mar so'chñets ya yeñoño ñeññ yoten amtsanatañ.

¹² Allempopa' met ñeññ ñanom ñeññ allcatañtetsa, ñarraña señoçepa'ch palltena po'poñ epa ñeññcha' allcatañtertserr.

¹³ Allempoña po'psheñeñ mellañoñeñ ñeññ po'pechapueñ o' poctorerrerr. Poc-tora'huerrtserrpa' ñaña allpa' ne'muerrerr

ñoñets ñeñt e'morrtetsa altar pa'tatso'marot po'ucorot. Añ altar ñeñt ayečcataret oro, ñeñtpa' e'ñe ñehuapo'tsen Yompor po'conaño.

¹⁴ Ñeñña ñoñetspa' atet otenan mellaño'teñ ñeñt po'pechapueñ ñeñtara ñeñt o' poctora'huerrerr. Ñeñña ñoñetspa' atet otenan mellaño'teñ:

—Te'pa' o'ch pepyamper mellaño'teñnesha' pa'tatssheño'mar ñeñt ehuancarettsa all ñeñt atarr po'ñeso ñeñt pa'so'cheñ Eufrates.

¹⁵ Ñehua, ñeñt mellaño'teñ pa'tatssheño'maretpa' añecop añño'tarettenet all atomat o'ch čhap allempo onañcharet allempochña ñetpa' o'ch a'cllatueret shonte' acheñenesha'. Ñeñt ora allpon acheñenesha' ñeñt yeča'yetsa arr patsro allponcha' colla'huerrtsa ñeñt allpon otenet la tercera parte. Te'pa' o' e'ñe etsotua ñeñt atet onañcharet ñeñt hora, ñaña ñeñt yetro, ñaña ñeñt arorr-ro ñaña ñeñt chararo. Allempoña ñeñt mellaño'teñ pa'tatssheño'marpa' o' a'rroyaretterret.

¹⁶ Ñeñt mellaño'teñ pa'tatssheño'mar ñetña'pa' ahuanmet po'solltarer ñeñt monta'yesnetsa puecahualloro. Nañapa' ne'muen allpon ñeñt atet oten ñeñt allo'tsa'yen. Ñeñtpa' atarr aton shonte'. Ñeñt che'muechets all, allo'tsen doscientos millones solltarnesha'.

¹⁷ Ñeñt atet gatennet all nent ñaña cahuallečno, ñaña nent ñeñt atet orrtena ñeñt montenaya. Puesomapo'tpa' añ chorra'yenet asrom. Patanta'tetspa' añ chorra'yenet tsamamuenare', po'potantaña'pañ' añ chorra'yenet asollemamuenare', po'potantaña'pañ' añ chorra'yenet shemashremamuenare'. Ñaña

cahuallečno poñpa' atet orretyena ñerra'mrrate' ma'yarroto'. Puenamotñapa' allot cha'nen tso' huorte' epuet ñaña amos epuet ñaña ñeñt huoretnets shemashrepñeñen ñeñt otenet azufre. ¹⁸ Añña ñeñt cha'nets puenamot atsetaren ma'po'marpa' ñeñtpa' ñeñtña amtsañtetsa ñeñtcha' a'cllatuerre' shonte' acheñenesha' ñeñt allpon otenet la tercera parte. ¹⁹ Ña po'huamenc allo muetsenan acheñenesha' ama puenamotayaya atet peno, añña ama't pa'sme'llotpa'cho'ña amtsañtena. Tarro'mar pa'sme'llpa' shechpeto' ñeñt poso'sme'll pen. Ñeñtpa' alloña atserrpenan acheñenesha'.

²⁰ Allpon acheñenesha' ñeñt queshpatsa ñeñt ama muetsanato ñeñt amtsañtetsa ñetñapa' attera atpare'teñet Yompor. Ama cotape'cherreto cohuen attoch quechpuet ñeñt atet pätse'tyenet sosya'tsañ. Ñetpa' attera mueneñet o'ch ma'yochyet oneñeñečno ñeñt ama cohuenayaye. Ñaña ñetpa' attera mueneñet o'ch yeçcatatse'tyeset pa'namen ñeñtcha' ma'yochenet atet ñerra'm oro ñaña quellema't, ñaña bronce, ñaña mapue', ñaña tsach. Allohuenet ñeñt yeçcatyenet ñeñtña po'yomporer penet, ñeñtña ma'yochenet ama't ama enteno, ama't ama e'mueno, ama't ama chope'cheno. ²¹ Ñaña ama quechpueneto ñeñt atto muetsanna'tenet ñaña atto tsamñannenet ñaña atto nanac cañoresha'tenet ñaña atto etatsre'tanna'tyenet. Ora añechnopa' alloña ama cohuenaye' cotape'cheneto.

10

*Atto Juanpa' entan puesheñarr mellañoñeñ ñeñt
orrene' po'librotoll*

¹ Allempoña napa' o' alla nenterrerr po'psheñeñ mellañoñeñ ñeñt atarr ahuamencattetsa. Ñaña'papa' sohua'nena entot, e'ñe osot sohuanpena. Poñoñña'papa' añ arca'tampesnene' ayon. Pa'clloyotña'papa' e'ñe atet poptena ñerra'mrrate' atsne' choyo'tetsa. Pa'tac pa'chepohuen ora atet orrtena ñerra'mrrate' tso' huortets enonet.

² Sohua'nenapa' orra'nenan po'librotoll. Ñeñña librotollpa' e'ñe cohuen atoraret ñeñt rremuen potot. O' chap patsopa' pa'tacña po'cohuenrotpa' tomos oño, po'ptecañña ñeñt pue'hcoterotpa' tomos patso.

³ Allempoña tomospa' rranosa huomenc. Po'ñoñña'papa' e'ñe atet e'morrtosa ñerra'mrrate' ma'yarr tecoretsa. Atto rranosapa' e'ñe atet e'morrtena ñerra'mrrate' tecore' anapuene' ñeñt cançhroche'tats tecorena.

⁴ Allempoña e'morrta ñeñt cançherr tecore' napa' nemneñeñ o'ch nequellcañ ñeñt atet ne'm tecore', tarraña na allempopa' ne'muerrerr ñoñets all e'morrtena ento. Ñeñña ñoñetspa' atet otenen:

—Amach pequellcatsche ñeñt atet pe'mueñ tecore' chochña pa'nasocha.

⁵ Allempoña añ mellañoñeñ ñeñt tomosets oño ñaña patso, ñaña'papa' echantosana pot enonet po'cohuenrot. ⁶ Allña eñosospa' e'ñe huomenc nosan po'ñoñ Yompor pa'so'chño, ñeñtpa' atet otos:

—Yompor ñeñt ama arromñañeshayaye ñeñt yeçhcate' enet ñaña ora allpon ñeñt allo'tsa'yen

pue'ntaño, ñaña ñeñt̃ yečcate' pats ñaña ora allpon ñeñt̃ allo'tsa'yen po'patsño, ñaña ñeñt̃ yečcate' oñečno ñaña ora allpon ñeñt̃ allo'tsa'yen pueyečcatareso, ñaña'pa' entenen ñeñt̃ atet noten te' ñeñt̃pa' e'ñech po'ñočh atet perra. Te'pa' amach alla yecuame'tere'te atomatuanen. ⁷ Ñerra'm esempoch poctorerrerr po'psheñeñ mellaño'teñ ñeñt̃ po'cančhroñpa' allempochña e'ñe etsotuerra Yompor poctapña ñeñt̃ ama e'ñeye' eñotpahuoyaye ama't ahua'toteñ ama't allempo ñanom eñotatyesane't ñeñt̃cha' a'mta'yesaye't po'ñoñ ñeñt̃ara ñeñt̃ nanac torra'yestse't ñocop. Allohua ñeñt̃ atet eños mellaño'teñ.

⁸ Allempoña napa' o' alla ne'muerrerr ñoñets ñeñt̃ara ñeñt̃ atet ne'm ñorra' ñeñt̃ e'morrtetsa pue'ntaño't, alla oterrerr:

—Te'pa' o'ch peponemya mellaño'teñ ñeñt̃ tets oño ñaña patso o'ch pechtosñañ potot po'libro ñeñt̃ e'ñe cohuen atorare't.

⁹ Nañapa' ahuen allo'tsen mellaño'teñ, nečhap ñeshopa' notos:

—Te'pa' o'ch p̃apuen pelibrotoll.

Ñaña'pa' atet oten:

—Añca'ye peyore o'ch perre'. Penamo'tpa' atarrcha' nanac puetsarr pe'm̃ atet ñerra'm pets po'moñ, tarraña ñerra'm o'ch čhap p̃atopa' atarrcha' pesherr pe'm̃.

¹⁰ Allempoña napa' o' nechtosñañ po'libro pototpa' o' nerre'. Allempo nerruepa' nenamo'tña atarr puetsarr ne'm̃ atet ñerra'm pets po'moñ

tarraña allempo chap naŋopa' atarr pesherr ne'mñ.
 11 Allempoña napa' o' alla oterrneterr:

—Te'pa' añ pocte' o'ch alla peserrpare'terrerr ñeñtcha' atet etsotaterr Yompor esempohuañen. Añcha' peserrpare'tyes ñeñtcha' atet perra shonte' pa'namen acheñenesha' ñaña atetcha' perra pa'namen anetso'marnesha' ñaña atetcha' perra pa'namen mereñtsorečno ñeñt eñsyets po'poñe'ttsoçma ñoñtso ñaña atetcha' perra pa'namen añcha'taretečno.

11

Atto epsheña ñeñt pueyochresha' pen Paretspa' ñetcha'ña eñerrtset Yomporecop

1 Allempoña napa' apnet tepapets ñeñt atarr allpocha'p e'ñe atet ñerra'm carrots. Ñaña allpa' atet otnet:

—Te'pa' o'ch ahuep o'ch petpueññaña' Yompor pa'paquëll allo, ñaña altar ñeñt allo'tsen. Ñaña o'ch pe'ñotena' errosheña'te' ñeñt ma'yochetsa all. 2 Tarraña amach petpañpsatscheña ñeñt a'yote'tsa'yen cha'petot. Tarro'mar all ñetpa' aparettetcha' po'poñ acheñ ñeñt ama ame'ñetso. Ñetñaapa' aŋmama'terretcha' all anetso ñeñt anaret Partsocop. Pa'tatsoch çharrama puechena epña arorr allponmatcha' a'sosyateñet all ñeñt anarettetsa Partsocop. 3 Ñaña allempopa' o'ch nemñe epsheña ñeñt neyochresha' nepen. Nach ahuañencat pahuet attoch a'potet ñeñtcha' atet perra esempohuañen. Mil doscientos sesenta yet allponmatcha' serrpare'tennanet neñoñ. Puellquëñoñet chorretcha' pa'shtamashe'm.

Arrpa' allohua ñeñt atet otnet all Yompor pue'ntaño.

⁴ Ñehua, añ epsheño'mar ñeñtcha' eñerrets Yomporecop ñetpa' atma'ntatarettenet epcha olivoch ñaña epa all orratenet huerare ñeñt e'ñe tomchets all Yomporesho, ñeñtara Yompor ñeñt pomnaren pōhuene' allohuen acheñenesha' arr patsro. ⁵ Ñaña añ epsheña ñeñtcha' eñerrets Yomporecop, ñerra'm ama't esesha ñeñt muenene' o'ch errot pet añ epsheña, ñetñapa' puenamotpa' o'ch cha'nmatet tso' huorte' ñeñtcha' e'nue' ñeñt e'moñe'tenahuet. Ñeñto'mar yeñoteñ ñerra'm esesha' e'moñe'tenahuet, ñetñapa' e'ñech rromhuet poctacma. ⁶ Ñaña añ epsheña ñeñtcha' eñerrets Yomporecop, ñetpa' atarrcha' ahuaencatet. E'ñe ñet po'huamencot epatare'teñet o' entot attotcha' ama huateno e'ñech allponmat eñorenet Yomporecop. Ñaña e'ñe ñet po'huamencot oññapa' o'ch a'pnaseret errasats. Ñaña e'ñe ñet po'huamencotet o'ch chapaterret añ arr patsro pa'namen ñeñtcha' amtsañterrtsa. Ama't esempo allempo atet muenenet ñet, allempocmach atet pet. ⁷ Tarraña ñerra'm esepoch e'ñe e'nuet ñeñtcha' allpon eñoret arr patsro, allempoñapa' o'ch cha'nom ñaña ñeñt berrma'ttetsa ñeñt atarr bellac. Arro'tcha' cha'nom arrorotot ñeñt atarr o'pononet arrorotena pats. O'chña cha'nompa' o'ch quellarosan añ ñeñt epsheña ñeñtcha' eñerrets Yomporecop. Ñeñt berrma'ttetsa ñachña ganatsa o'ch muetsan añ ñeñt epsheña. ⁸⁻⁹ Añña epsheña ñeñt amtsaretpa' attach o'shshe'muet toño

allegma chopeñe'chen allohuen acheñenesha'. E'ñe ma'pamuet ñaña po'poñ pueshmet yet allach o'shshe'muena all atarr anetso, ñeñfara anetser Jerusaléñ all corso'tam̄pset Yepartseshar Jesucristo ahuat. Ñeñfña anetserpa' ñato' o'ch netma'ntacha ñerra'mrrate' ñeñf atef pete't anetso Sodoma ñaña anetso Egipto. Añña epsheña ñeñf amsaret attach o'shshe'muet all amach esesha' muenateto o'ch pampuet. Allñapa' allcha' huaçhena shonte' pa'namen acheñenesha' ñeñfcha' cohuanrrortene', shonte' pa'namen mereñtsoreçhno ñeñf eñosyets po'poñe'ttsocma ñoñtso. Shonte' pa'namen anetsoçhno allot huaçhena. ¹⁰ Acheñenesha' ñeñf yeçha'yetsa erraparen arr patsro ñetñapa' o'ch coshame'tam̄pesyet añ epsheña arromñañ. Atarrcha' nanac cosherret. Pocsheñeshoñetña ñetpa' o'ch es apanna'tyeset e'ñe atfa. Ñetpa' añecopcha'ña atarr coshenet tarro'mar o'rroma añ epsheña ñeñf atsrre'moçhen entenet ñeñf yore'tatenahuet po'chñaret e'ñe pueserrpare'teñoñet Yompor po'ñoñ. ¹¹ Allempoña o'ch met ma'pamuet ñaña po'poñ pueshmet yet, añña ñeñf epsheña machayo'tepa'tcha' alla tanterret tarro'mar Yomporña alla tantaterre'. Allohuen acheñenesha' ñeñf cohuanrrortene'pa' atarrep'a'tcha' nanac yorenet. ¹² Allempoña tanterret epsheño'maret, e'muet ñoñets ñeñf e'morrtetsa atarr huomenc entoñ. Ñoñetsñapa' atef otenanet:

—Sa'tap arr ento.

Ñetñapa' o'cho' a'tapuet, ospa' ñeñfña anmahuet

ento. ¹³ Cohuanrrortets ñeñt e'moñe'tenahuetpa' e'ñe allempocmaña pella pats huomenc. Allña anetsopa' shonte' matna't pocoll, allpon otenet la décima parte. Ñaña cancherr mil acheñenesha' ñeñt allpon colla'huatsa. Ñeñtña allpon queshpatsapa' atarr yorenet. Pueyorñoŕetpa' e'ñe allempocma añcha'na'tpo' eñchet Yompor ñeñt pue'ntaño'tsen. Allñapa' cohuentatoñet.

¹⁴ Allempopa' o' metuaña ñeñt puepañ ñeñt allcatañtetsa, tarraña señocheпа'ch palltena po'poñ paterr ñeñtcha' tecma allcatañtatsa ñeñtcha' puema'pañ.

Allempoch poctora'huerr mellañoŕeñ e'ñe allohuanen allempochña añcha'taretetuerra Yompor arr patsro

¹⁵ Allempoña po'psheñeñ mellañoŕeñ ñeñt po'canchrroñpa' o' poctorerrerr ñaña. Poctora'huerrtserppa' entoñapa' atarr huomenc e'morrterrerr ñeñt eñoretsa all ento. Ñeñtpa' atet otenet:

Ñeñt allpon añcha'taretetyetsa arr patsro te'ñapa' o'huañcha' allo'na añcha'taretetnenet tarro'mar ñeñt atto añcha'taretetyenetpa' ñeñtpa' allochña añcha'taretterra Yompor epuet ñaña Puechemer ñeñt Cristo. Ñeñtcha' atto añcha'taretterra Yomporpa' ñeñtpa' amach ahuañañaŕterro ama't errponaña.

¹⁶ Allempoña añ ñeñt epoch çharrasheña ñeñt puechetsa pa'tats ñeñt anorrçhets all e'ñe ñet po'conañeto allot sherbeñet Yompor all pue'ntaño,

ñetñapa' rrema'rrartenet Yomporeshonet atet ma'yocheñet Yompör. ¹⁷ Ñetñapa' atet otenet:

Pa Yompore ñeñteḡ atarr nanac Partsoḡ ñeñteḡ Yepartseshar yepeneḡ, ñeñteḡ čhocma eñalleḡ ama't ahuatoteñ ñaḡa ñeñteḡcha' alla huerrtserr po'pocheño aḡe patsro, yañapa' atarr yeparasyoso'teneḡ tarro'mar te'pa' o'ch alla ḡo'paterra ḡa pehuamenc attotcha' o'ch alla atarr ḡa'm'cha'tareḡterra.

¹⁸ Shonte' pa'namen acheñenesha', pa'namen anets allo'tsa'yenet, ñet pa'tsrr'e'mueñoḡetpa' e'ñe e'moñe'tuenpet, tarraña te'pa' o' čhap allempoch pecoñchatuerranet. Ñaḡa te'pa' o' čhap allempo onañchareḡ añecop ñeñt colla'huetsa ahuatoteñ allempoch peñotatuerranet ñeñt atet ḡa'yesete't. Añña ñeñt torra'yestse't atto a'mtonapete't peñoñ ñeñt e'ñe peyochresha' pepe't, te'ñapa' o' čhap allempoch petsa'tuerranet. Ama't allohuen ñeñt ḡame'ñaye't ḡa ama't ñeñt atarr asherben entyesete't ñaḡa ñeñt ama asherben entete'te, te'ñapa' o' čhap allempoch petsa'tuerranet allohuenet ñeñt ḡame'ñenaya ḡa. Ñaḡa te'pa' o' čhap allempoch e'ñe ḡa'chencatuer allohuen ñeñt a'chencatañtetsa aḡe patsro.

¹⁹ Allempoña aḡ Yompör pa'paquell ñeñt ento'tsenpa' e'ñe cohuen atorareḡtena. O'ponoña all nentoñ Yompör po'tsapot all čhocma aḡño'tenet ñeñt aquellcareḡ ñeñt a'pocstat Yompör yocop. Allña' meratstena, tatsllaren

ma'moreten huomenc, pellena pats ñaña atet huechen huomenc.

12

Atto Juanpa' entan puesheñarr coyanesha' ñeñt emaret, pue'maretollpa' ñeñtara Cristo, añañña' mueneñ o'ch añañpes pue'maretoll

¹ Allempoña all pue'ntañopa' all orrtena ñeñt ama't ahuata ama't puesheñaroteyapa' ama yentare. Ñeñtpa' ñeñtcha'ña yeñotaterre' ñeñtcha' atet perra esempohuañen. Allña' all orrtena puesheñarr coyanesha'; añ po'cashe'm pen atsne'. Pa'rrpoñapa' allo'tsen ñaña arrorr. Poñoñña' echoyo'met. Po'choyo'mopa' all orrtena charra' ranto puechena epa. ² Ñeñña coyanesharpa' a'chomen, o' chen allempoch eñalletatan pue'mar. Atto atsotenana pue'marpa' cha rranare'tena, atarr allpatateñ pue'mar. ³ Allempoña all pue'ntaño all orrtena po'poñ ñaña ñeñt ama't ahuatapa' ama yentare. Ñeñtpa' añ orrtetsa añañ ñeñt atarr añcha'nochen. Ñeñt añañpa' atarr añecmuen ñaña atarr tsama't orrtena. Poñpa' cancherrmaga. Cancherrmago'mar poñpa' e'ñe echoyo'metareroche'. Ñaña po'ucorpa' allo'tsen charra'. ⁴ Pa'sme'll ñeñt chetare'tnen alloña tarra'huanenanña shonte' rantochno e'ñe a'shore'tuaneñ patso. Ñeñt allpon ranto ñeñt ento'tsen, allpon a'shore'tuaret ñeñt otenet la tercera parte. Ñeñña añañpa' alla tomos e'ñe coyaneshesho ñeñt atsotenaya pue'mar all cohueñ ñerra'm o'ch eñalletatan pue'marpa' ñach añañpse'. ⁵ Allempoña

coyanesha'pa' o' eñalletatan pue'mar ñeñtpa' asheñorr. Allempo eñalletua ñeñt asheñorroñollpa' e'ñe allempocma a'tapachet Yompor po'conaño tarro'mar ñapa' ñach anare'tterrtsa ñeñtcha' añcha'tare'tterrtsa allohuen pa'namen acheñenesnacop. E'ñech po'yoro'chenñõ añcha'tare'tterranet, atet ñerra'mrrate' ñapa' a'sreperet o'ch añcha'no'chtana'terranet. ⁶ Allempoña coyanesha'pa' allorocma o' yeta o' chap allapar all amarato. Allña Yomporpa' e'ñe cohuen añño'tatoñ allcha' cohuanpeñet allcha' rrateñet allponmat yet ñeñt otenet mil doscientos sesenta yet.

Atto quellarenet Yompor pue'ntaño

⁷ Allempoña quellarenet Yompor pue'ntaño. Ñeñt pa'm'cha'tareter pen allohuen ñeñt e'ñe cohuen mellaño'teñnesha'pa' añ pa'so'cheñ Miguel. ⁸⁻⁹ Miguelñapa' all quellara po'm'llaño'teñnesharohuen. Quellareñet añyañ, añyaññapa' o' quellara ñaña pueyochreshohuen. Miguelpa' chetanna'tet parro epuet añyañ all Yompor pue'ntaño. Ñehua, ñeñt pueyochresha' pen añyañ ñeñtpa'cho'ña mellaño'teñnesha' tarraña ñeñt mellaño'teñnerpa' ama cohuenayaye. Tarraña añyañ atto quellaran Miguelpa' ñapa' ama gano. Ñeñto'marña añyañpa' huapore'chet entot pueyochreshohuen a'shorare'tterret patso. Attoña ahupore'tare'ttaña añyañ ama't atarr nanac añcha'no'cheneñ. Ñehua, añyañpa' ñeñt shechep ahuatoteñ ñeñtara yoten oneñet ñaña

ñeñt otenet Satanás ñeñt atarr ashcañtetsa ora errañaren añe patsro.

¹⁰ Allempoña napa' o' alla ne'muerrerr po'poñ ñoñets ñeñt atarr e'morrtetsa huomenc all Yompor pue'ntaño. Ñeñt ñoñetspa' atet oten:

—Te'ñapa' po'ñoçh o' çhap allempoch queshpa'huerra allohuen acheñenesha' ñeñt pueyochresha' pen Yompor, tarro'mar o'ch alla o'paterrana po'huamenc e'ñe poctacma o'ch alla añcha'tarettterra ñapueñ epuet Puechemer ñeñt Cristo ñeñt nen ña ñeñtcha' añcha'tarettapretenaya. Añ oneñet ñeñt çhocma atta toma'tamñesyene' masheñeshachno all Yomporesho yeto ama't ñaña tsapome'tets ñeñtñapa' o' ahupore'taretta.

¹¹ Ñeñt masheñeshachnor ñeñt ame'ñenaya Yompor, ñetñapa' o' e'ñe a'mchechueret oneñet ñeñt toma'tamñesyenahuet e'ñe atta. Añ a'mchechaterre' ñeñt atto Cristo rroma, ashataretta po'rras ñeñt toma'tnenaya Carrnero ñeñt muetsete't ochñartsocop. Ñaña añ a'mchechaterre' ñeñt atto masheñeshachno çhocma eñosyenet e'ñe cohuen ñeñt atet pena Cristo po'cohuenña. Ama't amue-roçhtataretetyenetpa' ñetpa' ama queçhpueñeto atto eñosyenet e'ñe cohuen Cristocop, tarro'mar ñetpa' ama mecha'teneto ama't mamesha o'ch rromuet e'ñe pame'ñeñotet Cristo. ¹² Atarr cosheñets Yompor pue'ntaño allohuenacop ñeñt allo'tsa'yen. Tarraña atarr llequëñets allohuenacop ñeñt yeçha'yetsa añe patsro ama't ñaña ñeñt oño'tsa'yen. Tarro'mar oneñetpa'

o' sohuam̄perranet e'ñe pa'tsrre'mueñesha'.
Ñapa' eñoteñ e'ñech mameshapa' o'ch alla
ahuapore'tare'terrerr.

*Atto añañpa' attera cotare'tenan coyanesha'
ñeñt o' eñalletatuan puechoyor*

13 Allempoña añ añañ ñeñtara oneñt
o' eñota ñapa' o' ahuapore'tare'ta entot, ña
pa'tsrre'mueño'tpa' o' alla cotare'terranerr
coyanesha' ñeñt o' eñalletatuan puechoyor
asheñorro'toll. 14 Tarraña coyanesha'pa' allempo
cotare'terrerr añañpa' ñeñtña coyanesha'pa'
o' apet eppa'ya pa'pue' ñeñt atesha' contor
pa'pue'. Ñeñt'pa' alloch anomam̄psana po'yallop
ñeñtara añañ o'ch sa'neñ o'ch chap bachayo all
amarato all añañ'teññañet ñocop e'ñe cohuen
allcha' cohuan̄peñet. E'ñech ma'pa char
ñaña po'poñerrerr pueshmet char, ñeñt'pa'
allponmatcha' rrachet all. 15 Allempoña añ
po'yalloppa' e'ñe puenamot cha'nmatan shonte'
oñ atet ñerra'mrrate' po'ñes apellchetsa. Ñapa' cha
otapañ ñeñt'cha' rremuerraya' coyanesha' ñeñt
cotare'ten attoch a'ño'shach. Tarraña ñeñt'pa' ama
attetache. 16 Ama't patspa' yenpan coyanesha',
attoña tara'nom all esha'tanña oñ e'ñe masohua
ñeñt allpon cha'nmat po'yallop puenamot.
17-18 Ñeñtña atarr atsrre'mate'ña añañ, ello alla
atarr e'moñe'terranerr coyanesha'. Allempoñapa'
ahuo' allo'tsa'yen po'potantañ coyanesha'
puechoyoresha' o'ch quellarosanet ñamet.
Tarro'mar ñetpa'cho'ña chocma ame'ñeñet

Yompor po'ñoñ ñeñt atet anaret ñaña chocma coteññañet Jesucristo poctaṗña.

13

Atto Juanpa' entan berrma't ñeñt atarr amcha'nochen ñeñt cha'nets oñoť

¹ Allempoña napa' natomos sa'patoṗño, allña' nenterrerr berrma't atarr amcha'nochen ñeñt cha'nmats oñoť. Poñpa' cancherrmaga, po'ucorpa' čharra'. Pate'tets po'ucorpa' e'ñe echoyo'metoche'. Puenmaga'ttso all aquellcareť sochatse'teñets ñeñt pa'namen sosya'tsañ allo achmare'teñet Yompor.

² Ñeñtña berrma't pue'moquēr e'ñe atet ñerra'mrrate' ma'yarr țarraña pa'tacña'pa' e'ñe atet ñerra'mrrate' orranatec. Puenampa' e'ñe atet ñerra'm

ma'ñorenam. Añañña'pa' ñeñt apue' po'huamenc, aṗ ñaña llesens attoch amcha'nočtaprecha all po'conaño.

³ Puenmagarr poñpa' all orrtena čha atserrpena nanac huomenc čha mettaguēn ñeñtcha' muetsayeñ țarraña ama rromo alla correrra. Ñeñto'marña allohuen acheñenesha' arr patsro ñetpa' atta cohuanrrorteñet čha otapuetañ ñato' čhach rroma, țarraña ama rromo. Ñeñt atto ama rromopa' acheñenesha'ña arr patsro ñeñtña ame'ñatenahuet.

Ñetpa' otenapuetañ ñato' ñeñt'e'ña Parets. ⁴ Ñeñto'marña acheñenesha' ma'yocheñet ma'yarrma't. Ñetpa' atet otanna'tyaset:

—Ama eñalle po'poñ ñeñt nanac ahuamencat atet ñerra'm añ ma'yarrma't ñeñt yenten.

Ama't e'ñe eseshapa' amate' errotenoť
a'mchechachetoña añ ñeññ atarr ahuamencat.

Ama't añaña'pa'cho'ña ñeññ ma'yochena
acheñenesha' tarro'mar añaña'pa' ña ahuamencat
pe' ma'yarrma't.

⁵ Añaña'pa' muenatenan ma'yarrma't o'ch
ommo'chatse'tyesa. Pommo'chatse'teñoťpa'
o'ch achmare'tenan Yompor. Ñaña muenatan
ma'yarrma't o'ch amcha'tareťta pa'tatsoch
charrama ñaña puechena epmā arrorr. ⁶ Ateť
pa ma'yarrma't achmare'tenan Yompor,
sochatse'teññañ pa'so'cheñ. Ñaña Yompor
pa'paquell ñaña allohuen ñeññ allpon allo'tsa'yen
pue'ntaño e'ñe achmare'tueñ. ⁷ Ñaña

muenateñ o'ch quellaran ñeññ pueyochresha'
pen Parets. Ñaña muenateñ o'ch ganana
Yompor pueyochresha'. Ñaña muenateñ o'ch
amcha'tareťta allohuenacop ñeññ pa'namen
acheñenesha', allpon ñeññ pa'namen mereñtsor
ñeññ e'ñe eñosyets po'poñe'ttsoema ñoñtso
ñeññ ora allpon allemeñ anetsomar. ⁸ Ora
allohuen acheñenesha' ñeññ añe patsro'tsa'yen
añach ma'yochenet ma'yarrma't tarro'mar
ñeññ acheñenesha'pa' ama aquellcareťeyayeto
pa'so'cheñ Cristo po'libro all aquellcareťtena
allohuen ñeññ corretsetach ñeññ ame'ñenaya Cristo
ñeññ amsareťtatsa ochñartsocop atet ñerra'm
carrnero. Ahuat allempo errte' ayečcatareťta
pats, Cristoña po'libropa' all aquellcareť
so'chñetsochno attochña ñetpa' corretsetach.

⁹ Ñerra'm esesha' e'mñotene' añ ñoñets,
chapoñepa'ch pueyočhro ñeññ atet yečhateney

añ ñoñets. Ñeñt ñoñetspa' atet oten:
 10 Ñerra'm esesha' rromanatene' po'potantañ
 attoch yottam̄psatanet, ñetpa'cho'ña ayot-
 tam̄psaretterretcha'. Ñaña ñerra'm esesha'
 muetsanatene' po'potantañ espado, ñetpa'cho'ña
 amsaretterretcha' espado. Ñeñto'mar añ ñeñt
 poctetsa yocop e'ñe yeyemteñoť Yompor o'ch
 ya'huanten acopoteñ ñerra'm es yehuapoya,
 allohueney ñeñtey o' pueyochresha' perrey
 Parets.

*Atto Juanpa' entan po'poñ berrma't ñeñt
 cha'nets o'ponot patsot*

11 Allempoña na allpa' nenterrerr po'poñ
 ñeñt berrma'ttetsa. Ñeñtpa' arrot cha'nom
 o'ponot patsot. Ñeñtñapa' e'ñe epa po'ucor
 atet ñerra'm carrnero po'ucor, tarraña ñeñtpa'
 atarr am̄cha'nochen eñen e'ñe atet eñen
 ñerra'mrrate' añañ eñoretsa. 12-13 Ñapa'cho'ña
 atarr am̄cha'tarettta e'ñe atet am̄cha'tarettena
 ma'yarrma't ñeñt ñanom nent ñeñt cha'nmats
 oñot. Allñapa' am̄cha'tarettapretenana ñeñt
 ma'yarrma'ttetsa all. Ñeñt cha'nmats o'ponot
 patsot ñeñtñapa' muenatenan allohuen
 acheñenesha' ñeñt aña patsro'tsa'yen o'ch
 ma'yochyet ñeñt ma'yarrma't. Ñeñtara
 ma'yarrma't ñeñt corrrrtsa e'ñe mamecma
 allempo mettaguën. Ñeñt atto mettaguën ñeñtcha'
 muetsayeñ tarraña ñapa' ama rromo. Añ berrma't
 ñeñt cha'nmats o'ponot patsotpa' ñerra'm esempo
 allo'tsen parro epuet ma'yarrma't ñaña' eñall
 attoch orrtatenan acheñeneshacop pa'namen ñeñt

ama puentareto ama't ahuata. Attoña a'shoran entot huorte' tso' ñeñña tso' huorte'pa' o' e'ñe chap patso allña'p' cohuanrrortatan shonte' acheñenesha'. ¹⁴ Ñeñña' allo shequënan shonte' acheñenesha' ñeñ añe patsro'tsen. Ñeñto'marña ñerra'm allempo otenan acheñenesha', o'ch seyeçcat ma'yarrma't, ñetña'p' e'ñech pocte' enteñet. Añ ñeñtara ma'yarrma't ñeñ metto'ten espada tarraña ñapa' e'ñe mamecma o' alla correrra. ¹⁵ Añña berrma't ñeñ cha'nmats o'ponot patso' ñeñña'p' muenateñet o'ch o'rrerratan ayeçcataret ñeñ toma'ntatenet ma'yarrma't. Allochña'p' attoch eñorana'tanet pueyeçcatar. Ñaña ma'yarrma'tpa' atet nanet po'ñoñ, ñeñtpa' atet oten: Ñerra'm esesha' ama ma'yochenaye ayeçcataret muetsanachetepa'ch. ¹⁶⁻¹⁷ Elloña'p' o'terranerr acheñenesha':

—Te'pa' o'ch seyaco'mta'tyesa soto' secohuenro' amapa' arr seto'mo'mar. Allcha' sena'yeson neso'cheñ amapa' sena'yeson ñeñ nenúmero nepen. Atet patan allohuen acheñenesha' ama't ñeñ ama esoshe'mayaye acheñ, ama't ñaña ñeñ atarr sherbets, ama't ñaña acheñ ñeñ atarr eçllayoret, ama't ñaña ñeñ atarr huocchañetets, ama't ñaña acheñ ñeñ e'ñe cohueno'tsen, ama't añ acheñer ñeñ ataruasataret e'ñe atfa. Allohuen acheñenesha' ñeñ ama ayaco'mta'tarete all neññañet ma'yarrma't pa'so'cheñ amapa' ñeñ po'número pen ma'yarrma't, ñetña'p' amach errotenot es pomueneto ñaña amach errotenot es rañteneto ñeñ muenenet ñet. ¹⁸ Ñehua, ñeñ allpon po'número pen ma'yarrma'tpa' ñeñtpa'

allo'tsen seiscientos sesenta seis. Ñeñtã número añ toma'ntena puesheñarr acheñ pa'so'cheñ ñeñtcha' ñanom orrterrtsa tsapatonef. Ñerra'm esesha'ch atarr es eñoterrets eñoterrñañetepa'ch pa'so'cheñ ñeñt atma'ntataret añ número.

14

Allempo Juanpa' entan Cristo ñeñt atma'ntataret Carrnero, all ten Siónaño epuet ñaña shonte' acheñenesha'

¹ Allempoña na cohuerrtsanerrpa' alla nentererr Cristo all ten Siónaño. All orrtena e'ñe atef orrtena ñerra'm Carrnero. All tom'chen ñaña shonte' acheñenesha'. Ñeñt acheñenesha'pa' allo'tsen ciento cuarenta cuatro mil acheñenesha' ñeñt emchorrenaya Cristo. Ñeñtña acheñenesha'pa' e'ñe ayato'ma'taretoche'. Pueto'muetopa' all na'yehñañet Cristo pa'so'cheñ ñeñt atma'ntataret Carrnero, ñaña Pompor pa'so'cheñ ñeñtara ya Yeyomporer. ² Allñapa' ne'muen ñeñt huomenc e'morrtetsa, arrof huena entof. Atarr huomenc e'morrtena atef ñerra'm all etsase'tena shonte' oñechno ñeñt atarr huomenc ma'moretets. Po'ma'moreteñapa' atarr huomenc e'morrtena cha ottena ñerra'm cho tecor-rraren huomenc ñeñt yoten tatsllare'. Ñeñt ma'moretets all añepa't ma'moretets ñeñt shontetsa acheñenesha' all añepa't a'ma'moretenet arpa. ³ Allñapa' cohuentatenet morreñets ñeñt e'ñe etserra morreñets all Yompor po'conaño. Allo'tsen ñaña pa'tatso'mar ñeñt berrma'ttetsa, ñaña allo'tsa'yen ñeñt sherbene' Yompor ñeñt epoch charra' ñeñt puechetsa pa'tatssheña. Ama't

e'ñe puesheñarrapa' ama eseshaye' yechenayeña añ morreñets ñeñĩ etserra. Añña eñotene' ñeñĩ ciento cuarenta cuatro mil acheñenesha' ñeñĩ a'queshpatarettetsa añe patsroť. ⁴ Ñetpa' ama a'sosyateneto atto yorayeñet coyanesha' țarro'mar ñetpa' e'ñe cohuen correnet. Ñetpa' añ e'ñe cohuen cotenet Cristo ñeñĩ toma'ntenaya Carrnero. All ama't erra muene' sen Cristo, ñetñapa' e'ñech coťa'neñet cohuen. Ñetpa' e'ñe ñanom a'queshpatarettet attoña ñetpa' anarettenet atet ñerra'mrrate' ñeñĩ ñanom yapueñ Yompor ñeñĩ atarr cohuen, ñeñĩtara o'patena ñaña Cristo ñeñĩ atma'ntatareť Carrnero. ⁵ Ama't puesheñarroťetapa' ama shequēneto ama't e'ñe mamesha. Ñetpa' e'ñe cohuen orretyenet amach errotenoť otteñe'chareťterreto ama't ahuata all Yompor po'conaño.

Allempo Juanpa' enterranerr ma'psheña mellañoťeñ ñeñĩ eñosyesnets anoma'maťoť

⁶ Allempoña napa' alla nenterrerr po'poñ mellañoťeñ all anoma'mtena allpononet enonet. Ñapa' ñeñĩña serrpare'tatenahuet cohuen ñoñets ñeñĩ ama ahuañaño ñeñĩ alloch yequeshperra. Añ cohuen ñoñets ñeñĩcha' serrpare'tatan allohuen pa'namen acheñenesha' ñeñĩ yeťha'yetsa añe patsro, ama't ora allemeñ pa'namen anetsoťhno ñeñĩ pa'namen mereñtsoreťhno ñeñĩ eñosyets e'ñe po'poñe'ttsocma ñoñtso. ⁷ Ñeñĩ atto anoma'mtena all, eñosnen, atarr huomenc e'morrtena, ñeñĩpa' atet otnen:

—Semťcha'na'chepa'ch Yompor, ċhochña secohuentatoñ țarro'mar te'pa' o' ċhap allempoch en-

tyesas e'ñe puesheña'ttsos errotente' sepa'yena. Te'pa' ñachña sema'yocha ñeñt yečcate' enet ñaña ñeñt yečcate' pats, ñaña oñečno ama't allot potayen oñ.

⁸ Allempoñapa' alla coťa'nererr po'poñ mellañoñeñ ñeñt puepañ mellañoñeñ. Ñapa'cho'ña eñosnerrerr, ñeñtñapa' atet otnom:

—Te'pa' o' ahupore'tareta añ anets ñeñt atma'ntataret Babilonia ñeñt nanac atarr anets. Tarro'mar ñeñtpa' aña yečatyenan ora allpon po'poñečno anetsočno ñeñt atarr sosya'tsañečno ñeñt atet muenatse'tatyenanet ñet po'chets.

⁹ Allempoñapa' alla coťa'huererr po'poñ mellañoñeñ ñeñt puema'pañ. Ñapa'cho'ña eñosnerrerr, po'ñoñpa' atarr huomenc e'morrtena, ñeñtñapa' atet otnerrerr:

—Ñerra'm esesha' ma'yochenaya ma'yarrma't amapa' ayečcataret ñeñt toma'ntenaya ma'yarrma't, amapa' ñerra'm esesha' muenatenet o'ch yaco'mta'chet ma'yarrma't pueyotsaparo amapa' pueto'mo ayato'ma'tareta, ¹⁰ ñetñapa' a'coñchataretterretcha', tarro'mar Yomporña e'ñe po'yoročhenño'tpa' ñachña e'ñe coñchatuerrahuet e'ñe poctacma. Tso'pa' ñeñtcha'ña muerochtatuerrahuet ñaña ñeñt epuet huorten tso'pa' ñeñtpa' atarr shemasher ñeñt otenet azufre. Allcha' a'coñchataretterret, allotcha'ña cohueretña allohuen mellañoñeñnaneshachno ñeñt pueyochresha' pen Parets. Cohueretcha' ñaña Cristo ñeñt atma'ntataret Carrnero. ¹¹ Attoch achamaretterret, tso'ñapa' chepoten

pamosoñ enonet ñeñtña' amach ahuañaña' terro ama't errponaña. Amach huañerro ama't mamesha ñeñt atto a'coñchatare'tenet ama't yeto ama't ñaña tsapo. Tarro'mar ñetpa' aña ma'yochenet ma'yarrma't ñaña aye'chcataret ñeñt toma'ntenaya ña. Ñaña muenateñet acheñ o'ch yaco'mta'chet o'ch noñet pa'co'meto ma'yarrma't pa'so'cheñ amapa' pueto'mo. Arrpa' allohua ñeñt atet ot mellaño'teñ ñeñt anoma'mtetsa eno'mar.

¹² Ñeñto'marña allohueneñ ñeñteñ e'ñe pueyochresha' peney Parets ñeñteñ ame'ñenaya Yompor po'ñoñ ñeñt atet oteney ñeñteñ e'ñe yemtenaya Jesús, yocopña' añ poctetsa o'ch ya'huanta'huen e'ñe acopa ñeñt allpon pa'namen es yehuenoya.

¹³ Allempoña na allpa' ne'muerrerr ñoñets arro't huena entot, ñeñt'pa' atet oten:

—Te'pa' o'ch pequellca' añ ñoñets: “Te'ñapa' atarrcha' cosheñtso'tsa'yen allohuen ñeñtcha' rromayets e'ñe pame'ñeño'tet Yepartseshar Jesucristo.” Po'ño'ch atet oten Yompor Puecamquëñ, ñetpa' amesatare'tterretcha'. Te'pa' amach alla torrerrete'te tarro'mar ñeñt allpon o' torra'yenet añ patsro, ñeñt'pa' e'ñe eñotuare't all Yompor pue'ntaño.

Attoch çherr ñeñteñpo allempoch apçherret narmets ñeñt o' pomella'huen

¹⁴ Allempoña na cohuerrtsanerrpa' nenterrerr os atarr huallama't. Ñeñtña ospa' all anen puesheñarr ñeñt'pa' aña'pa't Jesús ñeñtara Ñeñt Acheñetosets arr patsro. Ñeñtña' echoyo'met,

ñeñña po'choyo'npa' oro ñeññ choyo'mtena. Pototñapa' orrenan cochell ñeññ atore'gorroñ ñeññ atarr nanac etsotañ ñeññ otenet hoz. ¹⁵ Allempoña Yompor pa'paclo'tpa' cha'nom po'psheññ mellañoñeñ. Ñaña'pa' otosan ñeññ anets oso. Po'ñoñña'pa' atarr huomenc e'morrtena, ñeññpa' atet otenan ñeññ anets oso:

—Pamat p̄occhello ñeññ pomellets allochña'pa' o'ch p̄a'yapa'che' tarro'mar o' chap ñeññeñpo allempo yap'chen ñeññ o' pomella'hua yenaremñ.

¹⁶ Allempoña ñeññ anets oso, ñaña'pa' o'cho' amatan ñeññ o' pomella'huen ora errap̄aren añe patsro. Ñaña'pa' o' a'yapa'chan allemñateñ ñeññ pomellets añe patsro.

¹⁷ Allempoña cha'nerrerr po'psheññ mellañoñeñ Yompor pa'paclo't ñeññ ento'tsen. Ñapa'cho'ña orrenan po'cchell ñeññ atarr nanac etsotañ. ¹⁸ Allempoña'pa' cha'nerrerr po'psheññ mellañoñeñ. Ñapa' arroñ huapa allo'tsen altar. Ñaña'pa' ñeññ ahuamencattetsa attoch pomnaren penan tso'. Ñaña'pa' otan ñeññ occhellet. Po'ñoñña'pa' atarr huomenc e'morrtena, ñeññpa' atet oten:

—Te'pa' o'ch p̄amat p̄occhello ñeññ atarr nanac etsotañ o'ch p̄ap'cha' allo puechnña'tets uva ñeññ añe patsro'tsen tarro'mar o' atarr nanac yen.

¹⁹ Ñeññña mellañoñeñ atet oteñetpa' atet'cho' p̄a. Allempoña amatan po'cchello uva ñeññ añe patsro'tsen o'cho' a'yapa'chach. A'yapa'chatuepa' o' shontanña uva all'cha' atmama'chet attoch cha'nmatoñet po'ñer. Ñeññña'pa' añ toma'tena atto Yompor po'yoro'chenño'tpa' atarrcha'

coñchatteran acheñenesha'. ²⁰ All atmama'teñet uva, pocollotpa' tama a'yente'tsen. Ñeñt atto cha'nen uva po'ñer ñeñtpa' añ toma'ntena o'ch chorrerr errasats arr patsro a'yohuen ñeñt allohuanen trescientos kilómetros ñaña enoneñ chapcha' e'ñe cahuall po'frenohua ñeñt chets e'ñe yelleca'nohua.

15

Allempo Juanpa' enterranerr cancherrsheña mellañoñeñ, ñetpa' o'ch orrtaterret ñeñtcha' amuerochtatañterrtsa

¹ Allempoña all ento napa' o' nenterrerr po'poñ ñeñt atarr yorochen ñeñt ama yentare ñeñtcha' yeñotaterre' ñeñtcha' atet perra esempo. Nenterrerr mellañoñeñnesha' cancherrsheña. Ñetñapa' allsensarettenet attoch orrtaterret ñeñtcha' amuerochtatañterrtsa. Puesheña'ttsetpa' orrtaterretcha' ñeñtcha' amuerochtatañterrtsa e'ñe po'poñe'ttsocma cancherrsheño'maret. Allempochña etsotuerra allohuen ñeñtcha' atto Yomporpa' yorochtater.

² Allña napa' nenterrerr ñeñt atet orrtetsa er-racmañen atet ñerra'mrrate' ñeñt añecmuen rerpat e'ñe atet huorten atet ñerra'm tso' huortets all. Allñapa' all tomchen allohuen acheñenesha' ñeñt e'ñe metana'tue' ora allpon ñeñt atet topatyenanet ma'yarrma't ñaña ñeñt pueyeçcater. Ñetpa' ama ayato'ma'tareteyayeto ma'yarrma't pueyotsaparo attoch noñet pa'so'cheñ amapa' ñaña po'número. All tomchenet e'ñe arpaçchet ñeñtpa' Yompor

apuenahuet. ³ Ñetña pueñtana'tueñoñtet allohuen topateñets morrechenet Moisés pueorreño ñeñt Moisés ñeñt atarr torratset Yomporecop. Pa'queshpatareteñoñtet morrechenet ñaña Cristo pueorreño ñeñt toma'tenaya Carrnero. Ñeñtpa' atet achoteñet Yompor:

Yompore, ñeñtep nanac Partsoþ þa ñeñteþ Yepartseshar yepen, atarr echarr es petsotatyen, atarr cochneshare' es peþa'yen. Pa ñeñteþ Pa'mcha'tareter pen allohuen pa'namen acheñenesha' ñeñteþ e'ñe pocte' es peþa'yen. Ñaña e'ñe po'ñoçh atet ñeñt allpon es þotyen.

⁴ Allohuen acheñenesha' e'ñe añcha'na'tpo' entenpet, Yompore. Ama't puesheñarrapa' ama eñalle ñeñt ama añcha'na'tpahuoye' pentenaye, Yompore. Allohuen acheñenesha'pa' e'ñe þapta cohuentatenapet, tarro'mar e'ñe þapta þa ñeñteþ atarr Partsoþ. Tarro'mar allohuen acheñenesha' ñeñt pa'namen anetsot huaçha'tetcha' pesho attoch ma'yochapet þa e'ñe þapuet tarro'mar ñetpa' o' taya çhapanet pueyoçhro atto þapa' e'ñe cohuen pocte' es peþa'yen.

⁵ Allempoña napa' cohuerrtsanerr nenterrñañerr Yompor pa'paquell ñeñt pue'ntaño'tsen. Ñeñña pocoll popellrarpa' e'ñe cohuen atorareñ. O'ponoñapa' allo'tsen all añño'tenet mapuettall ñeñt allo aquellcareñ Yompor po'ñoñ ñeñt atet anareñ ama't ahuañoteñ. ⁶ O'ponoña

Yompor pa'paclotpa' cha'nmaçherrerr ñeññ cançherrsheña mellañoñeñnesha'. Puesheña'ttset orrtaterretcha' ñeññcha' amueroçhtatañterrtsa e'ñe po'poñe'ttsoema cançherrsheño'maret. Añ chorra'yenet ñeññ atarr nanac cohuen ñeññ otenet lino ñeññ ama asosyatño ama't e'ñe mamesha. E'ñe cohuen poptama'tyena. Achanaretareret, po'chanaretpa' orotommuenare' ñeññ allo chana'yenet puesomapo. ⁷ Allempoña añ ñeññ pa'tatso'mar berrma't, pa'terrñapa' apa'yesan mellañoñeñnesha' cançherrsheño'mar pajo'. Apa'yesanet puesheña'ttset po'pajo' ñeññ orotaten. Ñeññña pajo'pa' all e'chorrayesare't alloch coñchaterran Yompor pa'namen acheñenesha' ñeññ añe patsro'tsen, ñeññara Yompor ñeññ ama arromñañeshayaye ama't errponaña ama't ahuata. ⁸ Allña Yompor pa'paclo e'ñe chorren amos. Ñeññña amospa' añepa't ottetsa Yompor po'cohuenña ñaña po'partsoña. Allñapa' ama't puesheñarrapa' ama muenateñeto o'ch be'toset all Yompor pa'paclo tarrempohuach esempoch orrtatan ñeññ cançherrsheña mellañoñeñnesha' mueroçhteñets. Allempochña be'tosçherret all Yompor pa'paclo.

16

Allempo Juanpa' enterranerr cançherrsheña mellañoñeñ ñeññ echene' po'pajotollesha' all na'yenet ñeññcha' amueroçhtatañterrtsa pa'namenot

¹ Allempoña napa' alla ne'muerrerr ñoñets ñeññ e'morrtetsa huomenc Yompor pa'paclo.

Ñeñña ñoñetspa' atet otenan mellañoñesha' ñeññ cancherrsheña, atet otenanet:

—Te'pa' o'ch sahuanna allcha' seyo'panat erraparen patso ñeññ sena'yen sepajotollesho ñeññ canchrro'mar attoch sorrtaoñ Yompor po'yorochenña.

² Allempoña puesheñarr ñanom mellañoñepa' o'cho' ahuo'. Allña'pa' yo'posan ñeññ po'pajotollo'tsen patso. Allempo chap patsopa' ñeññña'pa' orrtatan puetsarñats ñeññ ama amapochatatañe ñeññpa' ama eñalle pa'par alloch partet attoch metuerranet. Ñeññpa' aña a'ptsarsat ñeññ ayato'ma'taretyetsa ma'yarrma't pueyotsaparo ñaña ñeññ ma'yochenaya ayeçcataret ñeññ toma'ntatenet ma'yarrma't.

³ Allempoña po'psheñeñ ñeññ puepañ mellañoñepa' o'cho' ahuererr o'ch yo'puenana' oño ñeññ po'pajotollo'tsen. Allempo yo'pos oño all atarr sa'po, oñña'pa' cha errassastach, e'ñe atet orrta ñerra'mrrate' arromña't po'rras. Ñeññña'pa' e'ñe a'cllatuosan allohuen ñeññ allpon yeçhetsa all oño'mar.

⁴ Allempoña ñeññ puema'pañ mellañoñepa' o' ahuererr ñaña o'ch yo'puenana' ontapo ñeññ po'pajotollo'tsen ñaña allot potayen oñ. Ñeñña allempo ayo'paretta oño cha a'pnasatosan oñ errasats.

⁵ Allempoña napa' ne'muen ñeññ atet otenan mellañoñeñ Yompor. Ñehua, ñeñña mellañoñepa' atarr ahuaencat attoch pomnaren penan ora allohuen oñechno. Ñeñña mellañoñepa' atet otenan Yompor:

—E'ñe pocte' Nompore ñeñt atet pecoñchatyenanet, ña ñeñteþ chocma eñalleþ ama't ahuatoteñpa' ñeñteþ atarr nanac Partsoþ. ⁶ Tarro'mar acheñenesha' ñeñt pe'moñe'tene'pa' chocma muetsanatennapet ñeñt peyochresha' pepen ñama ñeñt a'mta'yene' peñoñ, chocma shatyeññañet po'rras. Te'ña ñapa' o' ñonerranet errasats. Ñeñt'pa' e'ñe pocte' tarro'mar ñetpa' añ o' þohuet ñeñt ama pocteye' penteno ña.

⁷ Allempoña e'morrterrerr ñoñets arr e'morrta altarot, ñeñt'ña' atet oten:

—Attesha' Yompore, ña ñeñteþ atarr nanac Partsoþ ñeñteþ Yepartseshar yepen. Ñeñt atto pentyenanet ñeñt'pa' e'ñe po'ñoçh atet, e'ñe pocte' ñeñt atet o' pecoñchaterranet.

⁸ Allempoña po'psheñeñ mellañoñeñ ñeñt puepa'tatseñ o' yo'puerranerr ñeñt po'pajotollo'tsen. E'ñe arr yo'pue' allo'tsen ñeñt yeçhoyo'tamþene'. Ñeñt'cha' ahuamencat pe' atsne' attoçh chemuerran acheñenesha' atet ñerra'm tso'. ⁹ Acheñenesha' ama't atarr e'tomuenanetañña atsne'pa' tarraña ama es queçhpuenayeña ñeñt atet correnet sosya'tsañeçhno. Ama eseshaye' cotape'cherraye cohuen Yomporecop attoçh cohuentateññañet Yompor. Elloña ñet'ña' atarr nanac achmare'teññañet Yompor pa'so'cheñ ama't ñeñt atarr ahuamencattetsa atto çhapatanet ñeñt'cha' mueroçhtaterrahuet.

¹⁰ Allempoña po'psheñeñ mellañoñeñ ñeñt pa'mnareñ, ñapa'çho'ña o' yo'puerranerr ñeñt po'pajotollo'tsen. E'ñe arr yo'pue'

ma'yarrma't po'conaño all amcha'tare'ttena. Ñeñña all amcha'tare'ttenapa' cha a'checmetue. Acheñenesha'ña allpa' epaye' muerochtatanet pa'namen atserrpeñets. Ñeñt atserrpeñetspa' cha muellatstame'tatyesanet, a'chañeñe'chatyesanet atserr. ¹¹ Tarraña ñetpa' ama't atet o' a'pare'ttetañpa' ama que'hpuenetoña ñeñt atet p'atse'tyenet sosya'tsañe'chno. Elloña ñetpa' allo'na achmare'tneñet Yompor ñeñt ento'tsen ñeñt atto atserrpenanet puetsarñats.

¹² Allempoña ñeñt po'pechapueñ mel-laño'teñ, ñapa'cho'ña o' yo'puerranerr ñeñt po'pajotollo'tsen. Arr yo'pue' po'ñeso ñeñt añecmuen atarres ñeñt po'ñes añ pa'so'cheñ Eufrates. Yo'pose'pa' cha emasa'huosanña po'ñes ama't atarr añecmuen. Ñeñña allot masohuapa' ñeñta toñeterrets ñeñta pa'te'p perret allcha' oñem amcha'tare'te'chno ñeñtcha' huacha'ttsa allot huena atsne'.

¹³ Allempoña napa' nenterrerr añañ epuet ma'yarrma't epuet ñaña ñeñt a'mtene' ma'yarrma't po'ñoñ añe patsro tarraña ñeñt'pa' ashcaña. Ñetña e'ñe puenamotetpa' cha'nmatyaset puesheña'tets oneñe't ñeñt ama mapo'cho. Ñeñt oneñe'tpa' ma'psheña. Ñetña'pa' e'ñe atet orretyenet ñerra'mrrate' rrehuancro. ¹⁴⁻¹⁶ Tarraña ñeñt'pa' oneñe'tca'ye ñeñtcha' orrtaterre' ñeñt ama puentare allohuen a'cheñenesha' ñeñtcha' cohuanrrortaterrahuet. Ñetpa' o'ch chopeñe'chyerret erracmañen attoch ap'cheret allohuen ñeñt amcha'tare'tetyetsa añe patsro. Allochña'pa' attoch quellareret

Yompor ñeñt̃ atarr ahuamencat, attoch quellaret allempoch çherr ponañcho ñeñte yetroch yoroçhtater Yompor. Allohuen am̃cha'taretnesha' ñeñt̃cha' quellarerre' Yompor, arrcha' apçhataretterret anets ñeñt̃ pa'so'cheñ Armagedón, allotcha' quellareret Yompor. Añ Armagedónpa' ñeñt̃pa' hebreonesha' sochene' añ ñeñt̃ anetser. Ñehua, o'ch neyerpatasa ñeñt̃ atet̃ ote't̃ Yepartseshar Jesús, ñapa' atet̃ ote't̃: "Señoche'pa'ch napa' e'ñech machayo'ta nohuerra atet̃ ñerra'mrrate' eñet̃ amach esesha' eñotenaye esempoch huapa. Tarraña atarr cosheñtso'tsa'yen ñeñt̃ çhocma neñose'rtenaya ñeñto'marña ñetpa' e'ñe cohuen añño'tenet̃ pa'shtam ñeñt̃cha' chorra'nmuet̃ allochñapa' amach muelle'mco'ta çha'nmueto amach çha apencoçhterreto."

17 Allempoña po'psheñeñ mellaño'teñ ñeñt̃ pocançhrroñ, ñapa'çho'ña o' yo'puerranerr ñeñt̃ po'pajotollo'tsen. E'ñe arr yo'pue' m̃orresho. Allempocma e'morrta ñoñets ñeñt̃ huetsa Yompor po'conaño't̃ ñeñt̃ pa'paclo'tsen all pue'ntaño. Ñeñt̃ña ñoñetspa' atarr huomenc e'morrtena, ñeñt̃pa' atet̃ oten:

—Te'ña po'ñoçhpa' o' etsotuerra, huañerrcha' ñeñt̃ ahuatoteñ.

18 Allempoñapa' meramerta o' tatsllares, e'morrta ñaña ñeñt̃ ma'moretets, atarr huomenc e'morrtena. Puetalle'cha ñaña pats nanac huomenc ñeñt̃ ama't̃ ahuatapa' ama atet̃ pueçparo allempoteñ e'ñe pa'motroteñ eñalleta acheñenesha' arr patsro. 19 Añ ñeñt̃ atarr anets ñeñt̃ atma'ntataret̃ anets Babiloniapa' ñeñt̃ña

anetserpa' o' rrara'pes ma'pshem̃ta. Ama't ora allpon pa'namen anetsočhno añe patsro all shonta'yena pa'namen acheñenesha', ñetpa'cho'ña e'ñe ñegatañpesuahuet. Yomporpa' añcha' yerpaterranet ñeñt̃ allohuen allpon p̃atse'tyenet ñeñt̃ atarr sosya'tsañ all atarr anetso ñeñt̃ atma'ntatareġ Babilonia. Ñeñt̃ allpon allohuen allo'tsa'yenet e'ñe coñchatuerranet Yompor, o' e'ñe tsa'tatuerranet po'yoročhenño. ²⁰ Allempoña ama't ñeñt̃ rročhpe'chañečhno ñaña aspeñtečhno o' e'ñe chenca'huerra. ²¹ Shora'nom ñaña entof hue' ñeñt̃ atarr añecmuesheñ ateshamerr. Pate'tetspa' eñerrtena cuarenta kilo. Ñeñt̃ña e'ñe a'tpetse'tuose' allohuen acheñenesha'. Allempoña ñetpa' atarr achñare'teñet Yompor tarro'mar o' coñchaterranet atarr huomenc.

17

Attoch a'coñchatareġterra coyanesha' ecañoreshaġ ñeñt̃ toma'ntenaya anets Babilonia all ama esesha' yerpa'penayo Yompor

¹ Allempoña mellañoñeñ ñeñt̃ cančherrsheña ñeñt̃ echyene' po'pajotollesha', puesheñarrñapa' o' huapa. Huapa neshopa' otosen:

—Te'pa' o'ch p̃octa'n o'ch negatenpa' allcha' a'coñchatareġta añ coyanesha' ñeñt̃ atarr ecañoreshaġ ñeñt̃ ame'ñatenaya pa'namen añcha'tareġnesha' ñeñt̃ pa'namen anetso'tsa'yen e'ñe allohuanen čhen oñečhno añe patsro. Ñapa' po'conañ penan oñečhno all anen. ² Ñeñt̃ añcha'tareġetyetsa añe patsropa' pame'ñeñoġet ñetpa' e'ñe po'cañoreshacma peñet ñeñt̃ coyanesha'.

Allohuen ñeñt̃ añe patsro'tsen acheñenesha' e'ñe a'posa'tuenanet tarro'mar ñeñt̃ atto cañoresha'tenanet ñeñt̃pa' chochña a'posa'tenanet attoch e'ñe cohuen ame'ñeñet.

³ Allempoña ñeñt̃ mellañoñeñpa' arr anmuen amarato, e'ñe Yompor puecamquëñoñ anmuenet. Allña'pa' nentos puesheñarr coyanesha' ñeñt̃ anets berrma't pa'che'ño. Ñeñt̃ berrma'tpa' atarr añcha'nochen, atarr tsañnanen. Poñpa' cancherrmaga, po'ucorñapa' charra'. Ora pue'mocro'marpa' e'ñe aquellca'huare't allemeñ. Ñeñt̃ña quellecpa' allo sochatse'teñet Yompor. ⁴ Ñeñt̃ña coyanesha'pa' añ chorrena yetsñorromamuen epuet tsamamuen. Ñaña allo añño'tena ñeñt̃pa' atet ñerra'm orollmemen ñeñt̃ atarr cohuen, ñaña mapyellmetollesha' ñeñt̃ nanac poptallme'chyetsa ñeñt̃ nanac tsa'te' ñaña po'ser ñeñt̃ atarr cohuen orrtatene' ña. Potot orrenan po'pajo' orotaten. Ñeñt̃ pajo'pa' e'ñe e'chorrenan pa'namen sosya'tsañechno ñeñt̃ atarr yetsena'ten ñeñt̃ atto nanac cañoresha'ten. ⁵ Pueto'mpa' aquellcato'ma'tare't. Añ so'chñets ñeñt̃ quellquënet allpa' ñeñt̃pa' attoch eñotatanet ñeñt̃ ama e'ñeye' eñotpahuo, ñeñt̃pa' atet oten: "Añpa' ñeñt̃ toma'tenaya anets Babilonia ñeñt̃ nanac atarr anets ñeñt̃ara pachor pen ñaña allohuen ñeñt̃ atarr ecañoresha't ñaña pa'namen sosya'tsañechno ñeñt̃ atarr yetsena'tyen arr patsro'." ⁶ Allempoña ñeñt̃ coyanesha'pa' neñoch atarr posa'ten. Ñaña'pa' añ posa'tena errasats ñeñt̃ po'rras ñeñt̃ muetsanatete't ñeñt̃ pueyochresha'

pen Parets farro'mar ñapa' atarr cohuen entenan o'ch muetsachet ñeñt serrpare'tene' atto ame'ñeñet Jesús. Allempo neñch nañapa' atta necuana'ch ñeñt coyanesha'. ⁷ Naña allempo mellañoñeña' o' alla oterren:

—¿Eso'mare'tña atta pecuana'teñ? Te'pa' o'ch neñotatañ ñeñt toma'ntena añ coyanesha' ñaña ñeñt toma'ntena añ berrma't ñeñt allo anen ñeñt cançherrmaga poñ, po'ucorñapa' çarra'. ⁸ Añ berrma't ñeñt penten, ñeñtpa' añ toma'ntena ñeñt corratse't ahuañmo'cha te'pa' ama eñalle o' rroma. Tarraña o' mameshamerra o'ch alla tanterra o'ch ça'nerr arrotot. Tarraña ñeñtpa' mamecpach atet perra, ellochña o'ch alla rromuerrerr. Allempochña o'ch chenca e'ñe poc-tacma. Acheñenesha' ñeñt yeçha'yetsa añe patsro ñeñt ama ame'ñetso ñetñapa' atarrcha' cohuanrrorteret añ berrma't farro'mar ama puentareto ñeñt atet pena añ berrma't. Ama't ñeñt corratse't arr patsro, tarraña ahuañmo'chapa' o' rroma. Ama't o' rromhuañ tarraña o' alla orterrerr. Ñeñto'marña acheñenesha'pa' atarr cohuanrrortene't. Ñehua, ñeñt cohuanrrortene'pa' ama aquellcareteyaye pa'so'cheñ Yompor po'libro all aquellcarettena pa'so'chñeçhno ñeñt pueyochresha' pen Yompor; ñetñapa' corretsetach erponañohuen. Ñeñt ama ame'ñetso ama aquellcareteyayeto pa'so'cheñ ahuatoteñ allempoteñ e'ñe errte' ayeçhcataretetsa pats.

⁹ Te' ñeñtcha' neñotatappa' o'ch poctape'ch e'ñe cohuen esheccha' peñot ñeñt atet toma'ntena añ berrma't poñeçhno. Ñeñt penten

cançherrmāga poñ, ñeñt̃pa' añ toma'ntena
 cançherrpena aspenet̃ all yeçhena añ coyanesha'.
 10 Toma'ntenana ñãña cançherrsheña ñeñt̃
 añcha'tarettetsa añe patsro. Tarraña
 amnarsheñapa' o'huañ añcha'tareta. Te'pa'
 o' puesheñarraña añcha'tarettetsa. Tarraña
 puesheñarrmeñ palltena ama orrtena'. Tarraña
 esempoch orrtapa' amach atarr atomat
 añcha'taretto. 11 Ñãña añ berrma't ñeñt̃
 toma'ntenaya puesheñarr añcha'taret̃ ñeñt̃
 corratset̃ ahuañmo'cha te'pa' o' rroma. Ama't o'
 rromañpa' tarraña ñeñt̃ara o'ch alla orrterra o'ch
 alla añcha'taretterrerr ñeñt̃cha' posocsheñterre'
 ñeñt̃ cançherrsheña añcha'taret̃ ñeñt̃ o' colla'hua.
 Tarraña ñapa'cho'ña çhocmach rromuerrerr
 allempoch chenca e'ñe poctacma. Ñehua,
 ñapa' ñeñt̃ara ñeñt̃ añcha'tarettatset̃ ñãña
 ahuañmo'cha allempo cançherrsheñtete't̃.

12 Ñãña añ berrma't ñeñt̃ çharra' po'ucor ñeñt̃
 penten, ñeñt̃pa' añ toma'ntena çharrasheña
 añcha'taretnesha', tarraña ñetpa' ama
 añcha'tarettteneta' tarro'mar ama orrteneta'.
 Tarraña esempoch orrterret allempochña
 añcha'tarettapreteret berrma't e'ñe mame'.
 13 Ñetpa' e'ñech patr̃ra cotape'chenet̃ ñeñt̃ atet̃
 cotape'chen berrma't, o'ch neñet̃ berrma't
 ñeñt̃cha' pa'm̃cha'tareter perret. Ñeñt̃pa'
 atto yenpueñet̃ attoch ahuañmenca't̃ peñet̃
 berrma't. 14 Ñet̃ña' pue'moñe'teñoñet̃ Cristo
 ñeñt̃ toma'ntenaya Carrnero quellareret̃cha'.
 Tarraña Cristo ñeñt̃ toma'ntenaya Carrnero
 ñach a'mchechuerrahuet tarro'mar ñapa'

atarr ahuamencat. Ama't ora allpon ñeñt ayochreshatetyetsa, Cristoñapa' e'ñe Pa'yochreshater ñohueñet allohuenet, ñaña ama't ora allpon ñeñt añcha'taretetyetsa, ñetpa'cho'ña e'ñe Pa'mcha'tareter ñohueñet allohuenet. Ñaña ñeñt epuet parro yemtena, ñetpa' Yompor acerrahuet ñeñt chore'ten ña ñeñt atarr yemtenaya ña.

¹⁵ Allempoña añ mellañoñeñ alla oterrerr, ñeñtpa' atet oten:

—Ñaña añ oñechno ñeñt penten ñeñt allo anen coyanesha' ñeñt atarr ecañoresha't, ñeñtpa' añ toma'ntena shonte' pa'namen acheñenesha' ñaña pa'namen anetsochno all yecha'yenet ñaña po'poñe'ttsocma ñoñets ñeñt allo eñosyenet. ¹⁶ Ñaña añ berrma't ñeñt penten çharra' po'ucor ñeñt toma'ntenaya çharrasheña añcha'taretnesha', ñetñapa' tsena'chetcha' ñeñt coyanesha', a'ypo'ñeretcha' e'ñe muelle'mcot. E'nuerrñañetcha' e'ñe ña po'chets allempochna chamueret tso. ¹⁷ Yomporpa' ña nene' allohuen añcha'taretnesha' pueyoçhreto attoch ñetpa' e'ñech patrra cotape'chenet ñeñt atet cotape'chen berrma't, attoch yenpueñet esheccha' ahuamencat peñet berrma't. Allochñapa' attoch etsotateññañet Yompor po'ñoñ ñeñt atet oten. ¹⁸ Ñaña añ coyanesha' ñeñt penten ñapa' añ toma'ntena ñeñt atarr nanac anets ñeñt pomnaren pene' allohuen ñeñt añcha'taretetyetsa allemeñ anetso'mar ñeñt añe patsro.

18

*Atto allohuen eçllayoretenesha'pa'
ya'na'teretcha' ñeñt anetser Babilonia o'
ahuapore'tareterra*

¹ Allempoña o' alla nenterrerr po'psheñeñ mellañoñeñ ñeñt sohua'netsa entoť, ñeñtñapa' atarr ahuamencat. O' e'ñe çhap patsopa' a'puetarsañpsosan pats e'ñe ña po'popteñoť.
² Ñañapa' rranosa huomenc, ñeñt'pa' atet otos:

—Te'ñapa' o' a'ypo'ñareťterra añ anetser ñeñt atma'ntataret Babilonia ñeñt atarr añecmuen anets. Te'pa' añeçpach sherberr allcha' shonterra pa'namen oneñeteçhno ñeñt atarr apoçhenare' ñaña allcha' shonterra pa'namen oteçhno ñeñt atarr yetsena'tyen. ³ Tarro'mar añ coyanesha' ñeñt toma'ntenaya anets Babilonia, ñapa' ahuañmo'cha e'ñe po'cañoreshacma pete't allohuenet ñeñt añcha'taretetyetsa añe patsro. Allohuen ñeñt añe patsro'tsen acheñenesha' e'ñe a'posa'tuanete't tarro'mar ñeñt atto cañoresha'tanete't ñeñt'pa' çhoch a'posa'tanete't. Ñaña allohuen ñeñt allpon pomatsre'tyestse't, ñaña atarr eçllayorettatahuete't tarro'mar ñapa' shonte' esocmañen muenatse'tyese't.

⁴ Allempoña o' alla ne'muerrerr po'poñ ñoñets ñeñt e'morrtetsa entoť, ñeñt'pa' atet oten:

—Ñeñtes neyochresha' nepen, te'pa' o'ch sesa'neñ añ anets ñeñt atma'ntataret coyanesha'. Amach socshapretatsche ña po'chñar te't sa'na mueroçhtapretenaya. ⁵ Tarro'mar ña po'chñarpa' allo'na sen atonetnomtsa nanac.

Yomporpa' e'ñe eñoteññañ po'chñar ñeñt allpon pa'yese't. ⁶ Te'pa' atsa'tatare'tterrepa'ch allpon ñeñt atto errot pa'yese't po'potantañ. Ñehua, ama't epoche'tats atsa'tatare'tterrepa'ch allpon ñeñt atto es patse'tyese't. Ñeñt atto allpon llecatyese't po'potantañ, ñapa' epoche'tatsepa'ch atsa'tatare'tterra llequëntso. ⁷ Ñeñt allpon coshatse'tyese't, te'ñapa' ñeñtepa'chña allpon llecaterrayer. Ñeñt allpon ehyese't, te'ñapa' ñeñtepa'chña allpon mueroçhtaterre'. Tarro'mar ña ahuañmo'chpa' pommo'cheño't atet ote't pueyoçhro: "Napa' atto nanen na neconaño'pa' atarr na'mcha'tare'ttena. Napa' ama añeyayno ñeñt rretorrnesha'. Na ama't ahua'tapa' amach nellquërro tarro'mar amach es nemueroçhtaterraye." ⁸ Tarraña ama't atet ommo'chenañpa' mamerrerrpa' o'ch çhapaña ñeñtcha' mueroçhtaterre' pa'namen mueroçhteñets – rromueñets, llequëñets ñaña muecheñets. Ñapa' a'poyatateretcha' tso. Tarro'mar Yompor ñeñt Yepartseshar yepen ñapa' ñeñt atarr Parets ñachña coñchaterre'.

⁹ Ñeñt añcha'tare'teçhno ora erraparen añe patsro, ñetña e'ñe puellquëño'tetpa' ya'na'teretcha' ñerra'm esempo enterrñañet pamosoñ ñeñt atto poyen. Ñeñtara añcha'tare'tnesha' ñeñt e'ñe po'cañoreshacma pe't ahuañmo'cha ñeñt parroçma epuet atarr coshete't. ¹⁰ Ñetpa' pueyorño'tetpa' cohuanrrorteretcha' a'yo't tarro'mar atarrcha' yorenet ñeñt atto o' a'coñchatare'tterra. Ñet puellquëño'tetpa' atetcha' otet:

—Atarr llequëñets-bee, ama't ñeñt atarr añecmuen anetser ñeñt atarr ahuamencať, machayoťa o' cherrñaña ñeñtcha' coñchaterre'.

11 Ñaña allpon ñeñt pomatsre'tyetsa errařaren añe patsro, ñetpa'cho'ña e'ñe puellquëñoťet ya'na'teñet, tarro'mar te'pa' ama eñalle ñeñtcha' rañta'yesahuet ñeñt pomyenet.

12 Tarro'mar ñet ñeñt po'checom penetpa' shonte' esocmañen pa'namen — oro, ñaña asrečno ñaña mapyetoľlesha' ñeñt poptame'te' nanac tsa'te', ñaña serets ñeñt otenet perla, ñaña shetamtsočno ñeñt atarr cochnesharer — yetsñorromamuenare', tsamamuenarer, sedamamuen.

Shonte' ñaña pa'namen tsachečno ñeñt atarr eñmosaťečno, ñaña marfil ñeñt elefantas ñeñt allot yeħcatyenet pa'namen, ñaña pa'namen ñeñt yeħcatyenet tsachoť ñeñt atarr nanac tsa'te', ñaña ñeñt yeħcatyenet bronsoť ñaña hierroť ñaña mapyoť ñeñt otenet mármol.

13 Ñaña ñeñt pa'namen po'checom penet atet ñerra'm ñeñt otenet canela ñaña pa'namen aspanaťollesha' ñeñt eñmosaťare' ñaña tsachese' ñeñtpa'cho'ña eñmosaťare' ñerra'm esempo a'crrateñet e'ñe atet ñerra'm ñeñt otenet mirra ñaña incienso. Allotpa' po'poñečno checmañatsočno ñeñtpa' añ vinos, olivose', harina ñeñt atarr cohuen ñaña trigo. Ñaña po'poñečno ñeñt pomyenet ñeñtpa' añ huacshečno, carrneročno, cahuallečno ñaña carroťollesha' ñeñt matatyen cahuallečno. Ñaña allpa' ama't acheñ pomueñet ñeñtcha' taruasatenet e'ñe atťa. Ñeñt acheñerpa' allña

pomueññañet pocreña ñeñt atto correna arr patsro. ¹⁴ Ñeñt pomatsre'tyetsa allpa' ñetñapa' serrpare'tenet, cha ottenet ñerra'mrrate' cho es oteñet ñeñt anetser, ñeñtpa' atet oteñet:

—Ñeñt allpon atarr p̄ayom̄a'yese't atet ñerra'm puetsarr ñeñt atarr ayom̄a'po' te'ñapa' ama eñalle o' huañerr. Ñaña ñeñt allpon nanac cohuen pentyese't ñeñt nanac coñnesha'tatse't, te'pa' o' chenca'huerra. Te'ñapa' ama't ahuatapa' amach alla pentere'te. Arrpa' allohua ñeñt atet oteñet ñeñt anetser.

¹⁵ Ñeñt allpon pomyenet allpa' ñetñapa' epaye' ganatanet nanac aton quelle. Tarraña ñet te'pa' po'yorñotet attach tomcha'tet a'yot allotcha' cohuerret ñeñt atet o' a'coñchatare'terra. Ñetñapa' epaye' ya'na'teñet e'ñe puellquëño'tetpa' ¹⁶ atet otenet:

—Llequëñtsa-bee añ atarr anets tarro'mar ñapa' o' atet perrate' ñeñt atarr añecmuen anetser ñeñt atet ñerra'mrrate' puesheñarr coyanesha' ñeñt nanac cohuen añño'tetsa. Añcha' chorrena ñeñt atarr coñnesha' yetsñorromamuen epuet ñaña tsamamuen ñaña ñapa' nenan oro, ñaña mapyetolleshma't ñeñt atarr coñnesha' poptallme'chyetsa ñaña nenan coñnesha' seretsoçhno. ¹⁷ Te'ñapa' e'ñe mamecmapa' o' e'ñe huañerr ñeñt atto atarr nanac esocmañen echyese't. Arrpa' allohua ñeñt atet ot ñeñt pomatsre'tetsa all.

Allempoña allohuen ñeñt po'taruas pene' bote ñeñt anmatsetene' checmañats all ñeñt anetsro, ñetpa'cho'ña o' alla tomcha'tet a'yot

— atet ñerra'm ñeñt pamo'mte' pen bote ñaña ñeñt achopeñañnesha' ñaña marineronesha' ñeñt taruaset all boto. ¹⁸ Ñetpa'cho'ña allohuenet all tomchenetpa' rrannartenet allempo enterrñañet pamosoñ ñeñt atto poyen ñeñt anetser. E'ñe puellquëñoñetpa' atet otenet:

—Ama eñalle po'poñ anetser ñeñt atarr cohuen atet ñerra'm añ anetser.

¹⁹ Allñapa' atarr yahuanrrortenet. Puellquëñoñetpa' pampato'tyeset patso. Rrannaretyesetpa' atet otyeset:

—Llequëñtsa-bee añ atarr anetser tarro'mar allohueney ñeñtey echyene' yebote ñeñt chocma yanene' oñopa' shonte' quelle ganatye't tarro'mar ñeñt anetserpa' shonte' echane't quelle nanac aton. Tarraña ama't atet pe'tpa' te'ñapa' e'ñe mamecmapa' o' e'ñe huañerr.

Atarrcha' cosheñtso'tsa'yen allohuen ñeñt pueyochresha' pen Parets

²⁰ Te'ña sapa' socshepa'ch ñeñtes pue'ntaño'tsenes ñaña allohuen ñeñtes pueyochresha' pen Parets ñaña allohuenes ñeñtes allsensaretes Yomporecop ñaña allohuenes ñeñtes a'mtene' Yompor po'ñoñ tarro'mar ñeñt atto Yompor o' coñchatteran ñeñt anetser, ñeñtpa' attoña o' chemnaterrsa sa.

²¹ Allempoña mellañoñeñ ñeñt atarr ahuaencatpa' ñañapa' chetan mapue' ñeñt atarr añecmuenmen atet ñerra'mrrate' ñeñt allocma es puetse'tenet ñeñtñapa' huapore'ch sa'po cha chencostsa poctacma. Allempoña ñeñt mellañoñeñpa' atet ot:

—Attecmach ahuapore'tare'terra añ atarr anetser ñeñtara ñeñt atma'ntatare't Babilonia. Amach orrterre'te ama't ahuata. ²² Te'ña allpa' amach es e'morrterrtse'te ñeñt atto toquënet arpa ñaña atto penclla'tenet ñaña ñeñt atto poctorare'tyenet po'pocoro. Ñaña ñeñt po'taruas paye't ñeñt es ye'chcayesaye't pa'namen esocmañen all, te'ña ama't ahuata amach orrterre'te. Ñaña atto e'morrte't allempo es puets'e'tete't allpa' te'ñapa' amach alla e'morrterre'te. E'ñe muetsoñeñtuerra. ²³ Ñaña ñeñt allo çoyo'tam'psete't, te'ñapa' amach alla çoyo'tam'perranete'te. Ñaña ñeñt coshame'tam'psaye't ñeñt sena'tetsa ñaña coyanesha', te'ñapa' amach alla e'morrtaterrete'te pocshamña. Ñaña allpon ñeñt pomatsre'tyesatse't all ñeñt atarr anetsro, ñetpa' atarr asherben entete't. Ora erra'paren añe patsropa' ama eñalle ñeñt atet sherbets. Ama't atarr asherben entyesetañe't tarraña çocma shecare'tyesete't allohuen pa'namen acheñenesha' ora erra'paren añ patsro. E'ñe atet es ame'ñatena amase'ñetpa' e'ñe attecma shecare'tenanet ñeñt anetser.

²⁴ Ñaña all anetsro, ñeñt'pa' all amtsanatarete't ñeñt a'mtaye't Yompor po'ñoñ ñaña allohuen ñeñt pueyochresha' pen Parets. Allña ashatarettete't po'rras ñaña ama't allohuen ñeñt amtsanatarettatse't ora erra'paren añe patsro, ñeñtara anetsrot alloña amtsanatarettete't.

19

¹ Allempoña o' alla ne'muerrerr ñeñt e'morrtetsa huomenc ento, shonte' acheñenesha'

e'ñe parrocmá rrannartenet, ñeñtñapa' atet otenet:

¡Aleluya! Aye'chočhtatpo'ch Yompör tarro'mar ñapa' ña ñapuet a'queshpatañtetsa, acohuentatpo'ch Yompör ñeñt ñapuet atarr ahua-mencatesha'.

² Ñaña ñeñt pocte' enten Yompör ñeñtpa' e'ñe pocte' attecma, ñaña allpon ñeñt atet oten ña, ñeñtpa' e'ñe po'ñočh attecma. Tarro'mar ñapa' o' coñchaterran coyanesha' ñeñt atarr ecañoreshařtetsa tarro'mar e'ñe ña po'chñarořpa' atarr a'sosyatenan acheñenesha' ora allohuen ñeñt yečha'yetsa añe patsro. Te'ña Yompörpa' o' e'ñe tsa'tatuera ñeñt allpon muetsanataño'ř ñeñt torra'yestse'ř ñocop.

³ Po'pocheñoñapa' alla oterreterr:

—¡Aleluya! Aye'chočhtatpo'ch Yompör tarro'mar te'pa' Yompör o' amosoñe'chaterran ñeñt atpare'taye'ř. Attoña o' chepoterr pamosoñ enonet; ñeñtpa' ama't ahuařapa' amach huañerro.

⁴ Allempoña añ epoch čharra' ñeñt puechetsa pa'tatssheña ñeñt sherbene' Yompör po'conaño, ñetñapa' concörpa'rrtenet epuet ñaña pa'tats ñeñt berrma'řtetsa. Allohuenet concörpa'rrtenet all Yompöresho. Allohuenetpa' ma'yocheñet Yompör all anen po'conaño. Ñetñapa' atet oteñet:

—Aye'chočhtatpaupepa'ch Yompore, attetepa'ch pöcop errponohuañen.

⁵ Allempoña all Yompör po'conañořpa' allotña e'morrterrerr po'poñ ñoñets, ñeñtpa' atet oten:

Sa'ye'chočhtatoñepa'ch Yompor, allohuenes ñeñtes torra'yetsa ñocop, ama't sa ñeñtes atarr sherbets ama't saña ñeñtes ama tama sherbetso. Ama't allohuenes erra'tseneste' ñeñtes atarr am'cha'na'tpo' entene' Yomporpa' te'ña'pa' sa'ye'chočhtatoñepa'chña.

Atto Cristopa' e'ñe cohuen aguërran allohuen ñeñt ame'ñenaya ña ñeñt atma'ntataret atet ñerra'mrrate' ña puetapor penahuet

⁶ Allempoña napa' o' alla ne'muerrerr shonte' acheñenesha' rrannartenet, atarr huomenc e'morrtena atet ñerra'mrrate' all etsase'tena shonte' oñ atarrcha' huomenc ma'moreten. Po'ma'moreteññapa' cha ottena ñerra'mrrate' cho tecor-rraren. Acheñenesha'ña ñeñt rrannartetsapa' ñetñapa' atet otenet:

Aye'chočhtatpo'ch Yompor tarro'mar te'pa' o' chap allempoch am'cha'taretterra ña e'ñe ñapueñ ñeñtara Yepartseshar ñeñt atarr ahua mencatesha'.

⁷ Te'ña'pa' yocsherrepa'ch, yocshame'tam'perepa'ch, yecohuentaterrñañepa'ch tarro'mar te'pa' o' chap allempoch yocshame'tam'pesya Cristo ñeñt atma'ntataret Carrnero. Te'ña'pa' o' chap allempoch sena'ta. Ñaña ñeñt coyanesha' ñeñtcha' puetapor pa', ñaña'pa' o' e'ñe añño'tare'tta.

⁸ Ñaña'pa' o' apet ñaña ñeñtcha' chorra ñeñt atarr cohuen huallama't atarr cočnesha' sheta muets ñeñt otenet lino ñeñt ama asosy-

atño ama't e'ñe mamesha, atterach pop-tame'tena.

Ñehua, añ shetamuets ñeñt otenet lino ñeñt ama a'sosyatpahuoyaye ama't e'ñe mamesha, ñeñtpa' añ toma'ntena ñeñt atto e'ñe cohuenare' es pa'yen ñeñt pueyochresha' pen Parets. Ñetña' añ toma'ntenet Cristo puetapor penahuet.

⁹ Allempoña mellañoñeña' alla oterrerr:

—Te'pa' o'ch pequellquerrerr añ ñoñets ñeñt noteneḡ, ñeñtpa' atet ot: “Atarr cosheñtso'tsen allohuen ñeñt ahua'ñareñtetsa o'ch rrallme'chaprechet allcha' coshame'tampeñet Cristo ñeñt atma'ntatareñ Carrnero ñeñt sena'tatsa.”

Mellañoñeña' alla oterrerr:

—Ora allpon ñeñt atet oteney Yompor arrpa' ñeñtpa' e'ñe po'ñoçh atet.

¹⁰ Nañapa' neconcorposa mellañoñeñ pa'rrpo ñeñt neserrpare'tatene' o'ch nema'yochyañ, tarraña ñapa' atet oten:

—Napa' amach pema'yochatsetno, napa' añana ñeñten petorrapretenaya Yomporecop ñaña allohuen pemo'nasheñneshaçhno ñeñt serrpare'tene' atto ame'ñeñet Jesús. Papa' añcha'ña pema'yocha Yompor ñapueñ.

Tarro'mar allohuen ñeñt a'mtene' Yompor po'ñoñ, e'ñe ña Puecamquëñoñpa' añ serrpare'tenet ñeñt atto yame'ñeña Jesús.

Cristo ñeñt montenaya cahuall ñeñt atarr hual-lapñanen

¹¹ Allempoña po'pocheño'pa' alla nenterrerr atorareñ enet. Allña' allo'tsen cahuall ñeñt atarr

huallaḡnanen. Ñeñt̃ montenaya cahualpa' añ socheñet, Ñeñt̃ atarr Ayemuetpotetsa ñaña ñeñt̃ e'ñe Po'ñoçh Yompor Po'ñoñ. Tarro'mar ñapa' erra'tsen pocte' ent o'ch coñchach, ñeñt̃ña ñocoppa' e'ñe pocte'. Ñaña ñerra'm ña quellaratahuet ñeñt̃pa'cho'ña e'ñe pocte' ñocop. ¹² Pa'clloyotñapa' atarr nanac a'rrechatañ atet̃ ñerra'mrrate' tso' po'huorter. Poñoñapa' shonte' po'choyo'm̃ ñeñt̃ choyo'm̃tena. Allñapa' anaret̃ ñaña pa'so'cheñ ñeñt̃pa' e'ñe ñapta eñoteñ. ¹³ Pa'shtampa' año e'çhomaret errasatso. Ñaña añ socheñet Yompor Po'ñoñ. ¹⁴ Ñaña ñeñt̃ allpon pa'çllarañneshar pen all pue'ntaño, ñetñapa' coteñet chenta' monta'yesnenet ñamet puecahualloro ñeñt̃ atarr huallaḡnarren. Ñetpa'cho'ña ñeñt̃ pa'shtam penet atarr huallama'tarer. Ñeñt̃ shetamuetspa' atarr cohuen ñeñt̃ otenet lino ñeñt̃ ama sosyatetso ama't mamesha. ¹⁵ Ñeñt̃ anenahuet, e'ñe puenamo't all orrtena cochell ñeñt̃ atarr etsotañtareñ. Ñeñt̃ cochellpa' añecop sherben alloch ame'ñatuerrana ora allpon pa'namen acheñenesha' arr patsro. Allochñapa' po'yoroçhenño'tpa' o'ch añcha'taret̃terranet atet̃ ñerra'mrrate' ñapa' a'sreperet̃ o'ch añcha'noçhtana'terranet. Ñaña ñach coñchaterrahuet. O'ch netma'ntacha atet̃ ñerra'mrrate' ñach aḡmama'te' uva esheccha' çha'nom po'ñer. Ñeñt̃ atet̃ aḡmama'teñet uvapa' añ toma'ntena atto Yompor ñeñt̃ atarr ahuamenca't e'ñe ña po'yoroçhenño'tpa' atarrcha' coñchaterran acheñenesha' ñeñt̃ aḡpare'tetsa. ¹⁶ Ñaña pa'shtamo e'ñe pa'tapacoptaro allñapa' all aquellcare't ñoñets ñeñt̃cha' atet̃ enteñet

Cristo, ñeñtpa' atet oten ñoñets: “Allohuen ñeñt amcha'taretečno añmapa' ñeñña e'ñe Pa'mcha'tareter pohueñet allohuenet. Ñaña allohuen ñeñt ayochreshatečno añmapa' ñeñña e'ñe Pa'yochreshater pohuenet allohuenet.”

¹⁷ Allempoña napa' o' alla nenterrerr mellañoñeñ ñeñt tets all ñeñt yeçhoyo'tam̄pene'. Ñañaapa' atarr huomenc eñen, çhore'tenan allohuen tse'mačno ñeñt anomcha'tyetsa eno. Ñeññaapa' atet otenanet:

—Sehuaçha'ta allohuenes o'ch sapçha arr o'ch serren po'chets ñeñt atarr aton rratenes Yompor. ¹⁸ Attoch serroñ po'chtsočno shonte' acheñenesha' ñeñt amcha'taretyetsa, ñaña shonte' ñeñt capitanatyets, ñaña shonte' ñeñt atarr ahuamencat entyenet. Serroñ ñaña shonte' cahuallečno po'chets ñaña añ po'chets ñeñt montenaya. Ama't shonte' pa'namen acheñenesha' o'ch serroñ po'chets ama't ñeñt acheñer ñeñt atarr sherbets ñaña ama't ñeñt ama sherbetso, ama't ñeñt e'ñe cohueno'tsen acheñ, ama't ñaña ñeñt ataruasataret e'ñe atfa — o'ch e'ñe serruanet po'chets allohuenet.

¹⁹ Allempoña napa' o' alla nenterrerr ma'yarrma't epuet ñaña allohuen amcha'taretečno ora erraparen ñeñt añe patsro'tsen epuet ñaña allohuen ñeñt pa'çllarañneshar pen. Ñetpa' añecop apçhenet allochñaapa' o'ch quellareñet ñeñt montenaya puecahuallor ñeñt atarr huallañnanen ñaña epuet ora allpon ñeñt pa'çllarañneshar pen ña.

²⁰ Allempoña quellaranna'tet ma'yarrma'tñaapa'

ĉha rremuet epuet ñaña ñeñt̃ a'mtene' e'ñe ña po'ñoñ tarraña ñeñtpa' ashcaña. Añ ñeñt̃ ashcañerpa' e'ñe ma'yarrma't̃ po'huamencoť gatenan acheñenesha' ñeñt̃ ama puentareto. Ñeñtpa' alloña shequēnan acheñenesha' attoch ame'ñeñet. Ñeñt̃ña acheñenesha'pa' o' e'ñe yato'matuanet ma'yarrma't̃ pueyotsaparo. Ñetñapa' aña ma'yochenet ayeĉhcataret ñeñt̃ toma'ntatenet ma'yarrma't̃. Allempoña rremuet ma'yarrma't̃ epuet ñaña ñeñt̃ a'mtene' po'ñoñ allempoñapa' ahuapore'tarettet epsheño'maret e'ñe betareret all parraren tso' erraĉaren. Ñeñt̃ tso'pa' atarr shemasher huorten. ²¹ Po'potantañeĉhnoña ñeñt̃ epuet quellarañ ma'yarrma't̃ ñetpa'ĉho'ña o' e'ñe amtsanatareťetuet. Año amtsanatareťet cochllo ñeñt̃ puenamo'tsen ñeñt̃ montenaya puecahuallor ñeñt̃ atarr huallaĉnanen. Allempoña ñeñt̃ allohuen tse'maĉhno epaye' ochare'ĉ po'ĉhets allempo rret añ po'ĉhets ñeñt̃ o' e'ñe amtsanatareťetua.

20

Attoch ĉherr allempoch mellapoterra

¹ Allempoña o' alla nenterrerr po'psheñeñ mellañoťeñ ñeñt̃ sohua'netsa entoť. Ñaña pototpa' añ orren llave alloch toramĉsan arroroť ñeñt̃ atarr o'pononet arroroťtena pats. Potoťñapa' orrenan ñaña cadena ñeñt̃ atarr añecmuen cadena. ² Ñeñt̃ña mellañoťeñpa' rremosan añyañ. Añyañpa' ñeñt̃ara sheĉeĉ ñeñt̃ ahuatoťeñ ñeñt̃ara yoten oneñeť ñaña ñeñt̃ otenet Satanás. Atto

rremue'pa' allempoñapa' huanquë'. Ñeñt atto ehuanca'rettapa' e'ñech errponañohuen char ñeñt otenet mil char, atterach ehuanca'rettena. ³ Allempo huanca'huepa' o' huapore'ch o'pono arroroto. Allña yottam'pes o' noñ alloch e'ñe echarr p'am'pes. Allochñapa' amach alla shecare'terranerro allohuen pa'namen acheñenesha' arr patsro. Ñehua, ñerra'm o'ch çhap mil charpa' allempoñapa' o'ch alla a'rroyeret. Tarraña ñerra'm o'ch alla a'rroyeretpa' ñeñt'pa' mamecpach a'rroyeretterra.

4 Allempoña o' alla nenterrerr ñeñt anorrçha'tyets po'conaño'mar. Ñetñapa' allsensaretet attoch ñetpa' o'ch am'cha'taretetyenet. Ñaña napa' o' e'ñe nentuerrñañ puecamquëñeçhno allohuen ñeñt apecha'tanata'rettatset' e'ñe pueserrpare'teño'et Yepartseshar Jesús ñeñt atto a'poñoñete't Yompor po'ñoñ. Ñaña ñetpa' ama muenete'te o'ch ayato'ma'taretet ma'yarrma't pueyotsaparo ama't pa'co'metotetapa' ama ayaco'mta'taretete'te. Ñetpa' ama ma'yochyete'te ma'yarrma't ama't ayeçhcataret' ñeñt toma'ntenaya ña ama esesha' ma'yochaye'te. Ñaña ñetpa' ama muenete'te o'ch ayato'ma'taretet ma'yarrma't pueyotsaparo ama't pa'co'metotetapa' ama ayaco'mta'taretete'te. Ñetña allpa' corretseta all am'cha'tarettapreteñet Cristo shonte' char allpon ñeñt otenet mil char. ⁵ Ñetñapa' ñanmuetcha' atantataretterret. Tarraña po'potantañeçhno arromñañnesha' ñetña allpa' ama allo'tseneto

tarro'mar ñetpa' ama atantatare'eyayeto tarrempohuach allempoch cherr mil char. 6 Atarr cosheñtso'tsen allohuen ñeñt e'ñe pueyochresha' pen Parets tarro'mar ñetpa' ñanmuetcha' atantatare'tterret. Tarro'mar ñetpa' amach alla rromuerrete'te po'pocheño ñeñtcha' atet rromuerr po'potantañ ñeñtcha' chenquërrtsa e'ñe poctacma. Tarro'mar ñeñtcha' tanterrtsa ñanompa' ñetpa' amach erro'tenot o'pataneto po'pocheño rromueñets ñeñtara chenquëñets. Ñetpa' añcha'ña sherbenet Yompor epuet Puechemer Cristo. Ñetpa' Yompor po'corneshar penahuet, añcha'tare'ttapreteretcha' nanac aton shonte' char ñeñt mil char.

Atto Juanpa' entan oneñe't o' ahupore'taretta all parraren tso' errañaren

7 Allempoch metua añ mil charpa' allempochña a'rroyeret oneñe't all ayottam'psare'ttena mil charohua. 8 Ñaña'pa' o'ch auyes ora errañaren pa'namen anetso'mar arr patsro allcha' shecare'tyerran pa'namen acheñenesha'. O'ch shecare'terran Gog ñaña Magog attoch a'yapa'chaterranet o'ch quellaraterranet. Ñeñt atet yenteññañ ontap po'mñer atetcha' shonterran ñaña pa'namen acheñenesha' arr patsro, ñeñt ama e'ñotuapahuoyaye. 9 Atet nentanet ñetpa' ahuanmuet mopñarero'mar o'ch parratse'tet errañaren allcha' orretyeset. Ñetpa' arrentach ahuanenet Yompor pa'netsronet ñeñt atarr morrentena tarro'mar allpa' allo'tsa'yen ñeñt pueyochresha' pen ña. O' e'ñe arrotam'pesuosyet attoch rremanatoñet Yompor pueyochresha'.

Tarraña Yompor pue'ntañotpa' e'ñe allempocma a'shoranet tso' attoch e'ñe a'poyatatuanet. 10 Allempoña oneñeñ ñeññ shecare'tenahuetpa' o' huapore'teret ñaña all parraren tso' errañaren ñeññ huortets shemasher. Allo'tsa'yen ñaña ma'yarrma't epuet ñaña ñeññ a'mtene' po'ñoñ. Allñapa' allempoteñ a'coñchatare'tetuerret e'ñe parrocmá, yetome'tets, tsapome'tets ama't ahuata ñeñtpa' amach ahuañañat'erro ama't errponaña.

Ñeññ atto allohuen arromñatnesha'pa' tomcherretcha' Yompor po'conaño allñapa' allcha' entyesaretterret erro'tente' ñeññ atet pa'yesete't e'ñe puesheña'ttset

11 Allempoña o' nenterrerr atarr añecmuen conañ ñeññ atarr huallama't ñaña ñeññ anets all. Ñaña e'ñe po'partsoteño't a'chencatuan añ pats ñaña enet, o' e'ñe chenca'huerra poctacma. Ñocpuet ama eñalle allcha' a'puet ama't e'ñe coñe'ta. 12-13 Nent ñaña allohuen arromñatnesha' all tomchenet Yompor po'conaño. Ama't allohuen arromñatnesha' allo'tsa'yenet ama't ñeññ atarr sherba'yestse't ama't ñaña ñeññ ama asherboyenaye' entete'te. Ama't allpon omarrña'techno ñeññ omarrcha'tyestse't ahuatpa' ñetña ama't oño'tpa' o' alla tantrra'tuerret. Ama't allohuen arromñatnesha' ama't o' chapuet all o'patenanet rromueñets, allotña o' alla tantrra'tuerret allohuenet. Ñeñto'mar ñet te'pa' e'ñe Yompor po'conaño tomcha'tuenet allohuenet. Allempoña allpa' tore'tet shonte' libro, ñeñtña librorpa' all aquellca'huare't ñeñtcha' yerpaterrahuet ñeññ allpon atet

p̄atse'tyesete't e'ñe puesheña'ttset. Allempoña
 Yomporpa' all entan ñeñt̄ libro all aquellcare't
 ñeñt̄ ama cohuenaye' es petso. Ñeñto'marña
 ñapa' attoña otteñe'cherranet o'ch mueñanet
 coñcheñtso. Alotñapa' tore'tet po'poñ libro
 ñeñt̄ libropa' all aquellcare't añ pa'so'chñečno
 attochña ñetpa' corretsetach. ¹⁴⁻¹⁵ Allohuen
 ñeñt̄ ama enteññañeto pa'so'cheñ libro all
 aquellcare't añ pa'so'chñečno ñeñt̄ corretsetach,
 ñetñapa' asaprotare'ttet o'pono all parraren tso'
 erraḡaren. Ñeñtpa' attochña rromuerreterr
 po'pocheño ñeñt̄ puepocheñ rromueñets ñeñt̄ e'ñe
 poctacma chenquēñets. Ñaña añ rromueñets ñeñt̄
 o'patenaya arromñatečno ñeñt̄ara pa'netser
 pen rromueñets, ñeñtpa'cho'ña ahupore'tare'tta
 o'pono all parraren tso' erraḡaren.

21

*Atto Juanpa' entan po'poñ enet ñeñt̄ e'ñe etserra
 ñaña patspa'cho'ña o' etserraterr*

¹ Allempoña na ñeñten Juanan allpa' o' nenter-
 rerr po'poñ enet ñeñt̄ e'ñe etserra, patspa'cho'ña
 o' etserraterr. Tarro'mar ñeñt̄ atet yenten enet
 te' ñaña pats, ñeñtpa' o' e'ñe chenca'huerra o'
 huañerr. Ñeñt̄ etserra patspa' allña ama't sa'p
 ñeñt̄ yenten añecmuen ama eñalle. ² Nenterrerr
 ñaña Parets pa'netser ñeñt̄ara Jerusaléñ ñeñt̄
 o' etserraterr. Ñeñt̄ñapa' ento't a'suatare'tterra
 e'ñe Yomporeshot̄. Ñeñt̄ñapa' atarr cohuen or-
 rtena e'ñe atet orrtena ñerra'm puesheñarr coy-
 anesha' allempo some'tenapa' o'ch añño'tena e'ñe

coñheshot attochña puerrollarpa' atarrcha' cohuen enteñ. ³ Allempoña napa' o' alla ne'muerrerr all e'morrtena ñoñets ñeñt huetsa entoť e'ñe Yompor po'conañoť. Ñeñtñapa' atet oten:

—Te'pa' señoche'pa'ch, o' cherr allempoch yecherra Parets e'ñe parro epuet acheñenesha'. Ñeñtcha' e'ñe parro yecherra ñetpa' e'ñe pueyochreshoche' penanet Yompor. Ña ama't atarr Parets'pa' yecherrach epuet acheñenesha' ñeñt e'ñe Po'yomporer penet. ⁴ Te'ña Yomporpa' o' a'huañañperrnay yellquëña, te'ña ama't ahuatapa' amach alla yeyahuerre'te. Te' ama't ahuatapa' amach yerromuerre'te amach yellquërre'te. Te' ama't ahuatapa' amach eñalleterre'te yahueñets ama't ñaña atserrpeñets amach eñalle. Tarro'mar añechno ñeñt allpon yellcatyesaye't te'ñapa' o' e'ñe huañerr.

⁵ Allempoña Yompor ñeñt anets po'conaño'pa' alla eñorana'terrnerr, ñeñt'pa' atet oten:

—Te'ñapa' o'ch señoche, napa' o' netserrataterr ñeñt allohuen esocmañen eñall.

Allempoñapa' alla oterrerr:

—Te' pöcoppa' añ pocte' o'ch alla pequel-lquërrerr ora allohuen añechno tarro'mar añ ñoñets ñeñtcha' atarr seyemtena ñeñt'pa' e'ñe po'ñoche atet.

⁶ Allempoña ñapa' alla oterrerr:

—Te'ña po'ñoche'pa' o' e'ñe etsotuerra, o' huañerr ñeñt sentyese't ahuatoteñ. Napa' e'ñe pa'motroteñ eñallen atten ñerra'mrrate' quelled A ñeñt pa'moter pen alfabeto. Allempoteñña napa' chocma eñallen esempohuañencha' huañerr ñeñt allpon

eñall, napa' atten ñerra'mrrate' quellec Z ñeñt all puen alfabeto. Te'pa' allohuen ñeñt ama e'ñeye' coshetso pueyoçhro ñeñt çhocmach es e'nenet, nañapa' napanetcha' ñeñt alloch e'ñe eñmaterret. Tarro'mar atto ama cosheneto çha ottenet ñerra'mrrate' ñeñt atarr nanac oñpa'tets. Ñeñto'marña te' napa' notenes allohuenes ñeñtes oñpa'tetspa' napuerrescha' oñ ñeñt ama ahuañañaate ñeñt çhocma potets all. Ñeñtña oñ alloña sapa' corretsasach. Tarraña ñeñtñaapa' ama't coñe'tapa' amach setsa'tero. E'ñe atta napuenes. ⁷ Allohuen ñeñt metana'tue' pa'namen topateñtsoçhnopa' ñetñaapa' no'pataterranet ora añeçhno a'nateñets. Attoçña ñetpa' e'ñech Po'yomporer pennet, nañapa' e'ñech nechemerasha' neþohuenanet allohuenet. ⁸ Tarraña allohuen ñeñt ama name'ñenayo ñeñt echarrtetsa pueyoçhro, ñetñaapa' aña o'patenahuet all parraren tso' erraþaren, ñaña allohuen ñeñt etsotene' sosya'tsañeçhno ñeñt atarr atsena'tpo' ñaña ñeñt amtsañnesha' ñaña ñeñt cañoresha'tets, ñetpa'çho'ña allohuenetpa' aña o'patenahuet all parraren tso' erraþaren. Ñaña ñeñt amase'ñeçhno ñaña ñeñt po'yomporer pa'yene' ayeçhcatareteçhno ñaña allohuen ashcarñaateçhno, ñetpa'çho'ña aña o'patenahuet all parraren tso' erraþaren ñeñt huortets shemasher. Ñeñtapa' allcha' puepocheño rromuerret.

Atto Juanpa' entan Yompor pa'netser ñeñt so'hua'netsa ento' ñeñtara ñeñt soçhetsa Jerusalén

9 Allempoña ñeñt cancherrsheña mellañoñesha' ñeñt echyesaye't po'pajotollesha' all e'chorrayesarette't ñeñt allot e'ñe orrtatuerret allohuanen muerochteñets, puesheñarrña mellañoñeña' o' huapapa' otosen:

—Apon o'ch p̄octa'n o'ch negatenpa' ñeñtcha' pueťapor perr Cristo ñeñt atma'ntatareť Carrnero.

10 Allempoña napa' o' alla chorraterrnerr Yompor Puecamquẽñ ñeñtña nanmue' a'yo allo'tsen ñeñt atarr añecmuen aspenet. Alloñña napa' nentapoñ Parets pa'netser ñeñt sohua'netsa entot e'ñe Yomporeshot ñeñtara ñeñt Jerusalẽñ. 11 Ñeñtña anetserpa' cha popuetnena atarr cochnesha' atet cohuentena Yompor po'cohuenña. Po'popteña e'ñe atet ñerra'mrrate' mapue' ñeñt atarr poptame'te' ñeñt mapyer otenet jaspe ñeñt nanac amorrentareť. Ñeñtpa' e'ñe ora orrtatuenan allohuen ñeñt allo'tsa'yen e'ñe all. 12 Ñeñt anetserpa' e'ñe aconcha'tam̄psareť a'yohuen. Ñeñt allo aconcha'tam̄psareťpa' atarr añecmuen enonet. Ñaña allo'tsen charra' puechena epa yetarr allot be'tenet. E'ñe pate'tets yetarr allo'tsa'yen ñaña puesheña'tets mellañoñeñ ñeñt cohuan̄pene' yetarr. Pate'tets yetarropa' all aquellca'yeseť añ pa'so'chñechno Israel po'mreneñ ñeñt charrasheña puechena epa. 13 Ñeñt conchet, allot huena atsne' allo'tsen ma'pa yetarr. Ñaña allenet emuena atsne'pa' allo'tsen ñaña ma'pa yetarr. Tenotenita'npa'cho'ña allo'tsen ma'pa yetarr. Topotenita'npa'cho'ña allo'tsen ma'pa yetarr. 14 Ñeñt conchtar allo

echarr aḗparettena pa'rrḗpapa' e'ñe allohuenpa' allo'tsen ḗcharra' puechena epa mapue' ñeñt̃ allo echarrtateñet. Ñaña pate'tets mapue' allo echarrtateñet conḗhetpa' all aquellca'yeseḗet añ pa'so'chñechno ñeñt̃ ḗharrasheña puechena epa ñeñt̃pa' ñeñt̃ puellsensarnesha' Cristo ñeñt̃ atma'ntatareḗ Carrnero.

15 Mellañoḗeñ ñeñt̃ neserrpare'tatene' ñañaapa' echenan tepapets ñeñt̃ oropepen allo tepuenan Parets pa'netser ñaña allo aconḗa'tamḗpsareḗ ñaña pueyottarohuen.

16 Mellañoḗeñ atto tepuenan Yompor pa'netser e'ñe allponeshacma tepa'hue allemḗateñ — onnatonet ñaña pa'llpocha'peronet ñaña enonet e'ñe allponeshacma ḗha'nmach — dos mil doscientos kilómetro allemḗateñ. 17 Allempoña tepan ñaña conḗhet po'ḗateña ñeñt̃ñaapa' allo'tsen sesenta cuatro metro. Ñehua, mellañoḗeñ e'ñe atet es tepa'yen atet es yetpa'yen yaña ñeñtey arromḗatey.

18 Ñaña añ conḗhetpa' añ ayeḗhcatareḗ mapue' ñeñt̃ atarr cohuen aspanamemeno poptame'tyena ñeñt̃ otenet jaspe. Pa'netserñaapa' añ ayeḗhcatareḗ oro — ora allohuenpa' e'ñe oroche'. Añ oropa' atarr nanac cohuen ñeñt̃pa' e'ñe orrtatuenan pa'namen ñeñt̃ allpon allo'tsa'yen. E'ñe atet ñerra'mrrate' rerpat ñeñt̃ atarr cohuen e'ñech orrtatuenan allohuen pa'namen ñeñt̃ allo'tsa'yen. 19 Ñehua, añ econach allo orratenet conḗhet, ñeñt̃ econach puecllo'ya'tetspa' atsetareno poptena ñeñt̃ allo a'cohuentateñet. Ñeñt̃ ñanom econach

puecllo'yarr allñapa' añ ana'yesaret atarr
 cohuen poptame'te' aspanamemenatollesha'
 ñeñt otenet jaspe. Ñeñt puepuecllo'yañ econach
 allñapa' añ ana'yesaret atarr cohuen poptame'te'
 asollememenaretollesha' ñeñt otenet zafiro.
 Ñeñt econach puema'puecllo'yañ allñapa'
 añ ana'yesaret atarr cohuen poptame'te'
 huallamemenatollesha' ñeñt otenet ágata.
 Ñeñt puepa'tatseclo'yañ econach allñapa'
 añ ana'yesaret atarr cohuen poptame'te'
 aspanamemenatollesha' ñeñt otenet esmeralda.
 20 Ñeñt econach pa'mnarecllo'yañ allñapa' añ
 ana'yesaret ñeñt atarr cohuen pa'namenot
 poptame'tyena ñeñt otenet ónice. Ñeñt
 po'pechapuecllo'yañ econach allñapa' añ
 ana'yesaret atarr cohuen poptame'te'
 tsamemenatollesha' ñeñt otenet cornalina.
 Ñeñt econach po'cancherrecllo'yañ allñapa'
 añ ana'yesaret atarr cohuen poptame'te'
 shemashrememenatollesha' ñeñt otenet
 crisólito. Ñeñt econach po'psoclo'yañ allñapa'
 añ ana'yesaret atarr cohuen poptame'te'
 aspanamemenatollesho asolleten ñeñt otenet
 berilo. Ñeñt econach pue'sconeclo'yañ allñapa'
 añ ana'yesaret atarr cohuen poptame'te'
 e'ñe shemashrememenatollesha' ñeñt otenet
 topacio. Ñeñt econach po'charraclo'yañ
 allñapa' añ ana'yesaret atarr cohuen poptame'te'
 ama e'ñeye' aspanamemenaretolleshayaye
 ñeñt otenet crisoprasa. Ñeñt econach
 po'charraclo'yañ puechena puecllo'yarr allñapa'
 añ ana'yesaret atarr cohuen poptame'te'

asollememenma'tetollesha' ñeñt̃ otenet jacinto. Ñeñt̃ econach po'charraclo'yañ puechena epueccllo'ya allña'pa' añ ana'yesare't atarr cohuen poptame'te' yetsñorromemenatollesha' ñeñt̃ otenet amatista. ²¹ Allohuen yetarročhno ñeñt̃ čharra' puechena epa e'ñe cohuen huallatrren atet ñerra'm chem̃peshtall o'pono'tpa' atarrcha' huallatllellen ñeñt̃ otenet perla. Pa'te'tets yetarr e'ñe pa'trra perla ayečhcatare't. Ñaña añ calle ñeñt̃ all chopeñe'chenet ñeñt̃pa' e'ñe oroche' ayečhcatare't atet ñerra'm rerpat ñeñt̃ e'ñe orrtatuene' ora ñeñt̃ allpon allo'tsa'yen all.

²² All Parets pa'netsro ama't pa'trra pocoll ama neñche ñeñt̃ all ma'yocheñet Yompor. Tarro'mar allpa' ama pallteno pocoll allcha' ma'yocheñet Yompor, tarro'mar ñeñt̃ nanac Parets ñeñt̃ Yepartseshar yepen ñapa' e'ñe allo'tsen all ñeñt̃cha' ma'yochena allohuen acheñenesha' epuet ñaña Puechemer Cristo ñeñt̃ atma'ntare't Carrnero. ²³ Ñaña Parets pa'netsro allpa' ama muenenano atsne' ama't arrorra ama mueneñeto ñeñt̃cha' čoyo'tetsa all. Tarro'mar Yompor ñeñt̃ atto poptena pa'tsnomueño'tpa' ñeñt̃ña čoyo'tetsa all epuet ñaña Puechemer Cristo ñeñt̃ña lamparñetets. Ñeñt̃ara Cristo ñeñt̃ atma'ntatare't Carrnero. ²⁴ Ñeñt̃ atto poptena Yompor pa'tsnomueño'tpa' ñeñt̃ña a'puetarsam̃pene' erracmañen allohuen pa'namen acheñenesha' attoña correnet e'ñe cohuen. Allohuen am̃cha'tare'tnesha' ñeñt̃ atto cohuentenet añe patsro, huapatueretcha' Parets pa'netsro alloch cohuentateññañet ñamet Parets

pa'netser. ²⁵ Ñeñt Parets pa'netser ñeñt pueyottar pen allot be'tenet, amach yottamperre'te e'ñech ellapene't atorare't. Allpa' ama't checmetapa' ama eñalle. ²⁶ Allohuen pa'namen acheñenesha' ñeñt amcha'na'tpotyetsa aña patsro ñeñt atto cohuenetyenet, huapatueretcha' Parets pa'netsro alloch cohuentateññañet ñamet Parets pa'netser. ²⁷ Allpa' ama't ahua'tapa' amach orrtateto ñeñt sosya'tsañe'chno tarro'mar allpa' ama't pueheñarrapa' ama be'teno ñeñt cotape'chene' sosya'tsañe'chno ñeñt atarr tsena'ten Yompor ñeñt atet ñerra'm ashcarña't. Allpa' aña be'tets ñeñt aquellcare't pa'so'chñe'chno Cristo po'libro attochña ñetpa' corretsetach.

22

¹ Allempoña mellaño'teñpa' o' alla gaterrnerr po'ñes. Ñeñtpa' arrot huena conañot allo'tsen Yompor epuet ñaña Puechemer Cristo ñeñt atma'ntatare't Carrnero. Ñeñt oñpa' atarr cohuen, atarr llancasaseno poptaso'tena. Oñ ñeñt atarr cohuen añ toma'ntena atto apueney Yompor attochña yapa' corretsayach e'ñe yocsheñeshocmañen errponohuañen. ² Ñeñt Parets pa'netsro e'ñe rrocho allecma chopeñe'chenet, allñapa' all oñen oñ. Ñeñt oñ emoto'mar popame'tar-ro all chopyen tsach. Ñeñtña tsachpa' atarr nanac me'ten, pueña'tets arrorrrpa' chocma me'ten. Paterr charpa' charroch me'ten puechena epa. Ñeñt pue'mer ñeñtcha' apuerrey Yompor añ toma'ntena alloch yocrrerra errponañohuen ñeñt ama ahuañaño ama't ahuaña. Ñaña pasopanerpa'

añecop sherben ñeñtcha' a'crraterre' allohuen pa'namen acheñenesha' e'ñe puecamquëño huenet. ³ Parets pa'netsropa' amach eñalleterro ama't patrra ñeñtcha' a'cmaretterrtsa. Tarro'mar Yompor epuet ñaña Puechemer Cristo ñeñt atma'ntatareġ Carrnero, ñetña partsotetset all po'conañeto. Ñaña allohueney ñeñtey torretsa Yomporecop e'ñech cohuen yesherberr yaña all. ⁴ Yentercha' Parets yecuacle'channerrach parro epay Yompor. Yeto'moña yapa' quellquërrancha' e'ñe ña pa'so'cheñ. ⁵ Allña pa' amach eñalleterro checmete'. Ñeñteycha' yeçherrtsa allpa' amach yemnerro ñeñtcha' yeçhoyo'tamġse'. Atto te'pa' çhocma yemnen lampareñ alloch yeçhoyo'tamġpena. Allempopa' amach yemnerro ñaña o'ch çhoyo'tamġpeney atsne', tarro'mar Yompor ñeñt Yepartseshar yepen, ñapa' ñaña pa'tsnomueña ñeñtcha' yeçhoyo'tamġperre' all. Ñaña yapa' ya'nġcha'tareġtapreterach allempoteñ errponohuañen.

Arrpa' all eñotateney Jesucristopa' ahuencha' huerra po'pocheño arr patsro

⁶ Allempoña mellañoñeñpa' o' alla oterrner, ñeñtġpa' atet oterrner:

—Ora allohuen añ ñoñetspa' e'ñech seyemcha tarro'mar ñeñtġpa' e'ñech po'ñoçh atet perra. Ñaña Yompor ñeñt Yepartseshar yepen ñaña pa' çhocma eñotatenan ñeñtcha' a'mġtene' po'ñoñ. Ñeñtara Yompor ama't te'pa' o' llesensan po'mġllañoñeñer ñeñtcha' gatyene' ñeñt torretsa ñocop ñeñtcha'

ahuen atet perra ama't esempo. ⁷ Ñaña Cristo ñapa' atet oten:

—Señochepa'ch napa' ahuencha' nohuerra.

Atarr cosheñtso'tsen allohuen ñeñt yemtenaya ora allpon añ ñoñets ñeñt aquellcaret all Yompor po'libro ñeñtcha' atet perra esempo. Arrpa' allohua huañ ñeñt atet eñotaten mellañoñeñ.

⁸ Na ñeñten Juananpa' naña e'muene' ñeñt ora allohuen añ ñoñets ñaña naña entene' ñeñt allpon gatyennet. Allempoña napa' neconcorposa e'ñe mellañoñeñ pa'rrpo ñeñt negatyene' ora allpon pa'namen esocmañen o'ch nema'yochyañ.

⁹ Ñaña' oten:

—Amach pema'yochatsetno na, tarro'mar napa'cho'ña e'ñe parropa' atta netorrapretenpa Yomporcop ñaña allohuen ñeñt pemo'nasheñeshachno pepen ñeñt a'mta'yene' Yompor po'ñoñ, epuet ñaña allohuen ñeñt atarr yemtenaya añ ñoñets ñeñt atet aquellcaret añ libro. Papa' Yomporña pema'yocha.

¹⁰ Allempoña ñeñt mellañoñeñpa' alla oterrerr:

—Ñato't cha pa'nasotena' añ ñeñt allpon Yompor po'ñoñ ñeñt o' pequellca'hua. Tarro'mar allpon ñeñt o' pequellca'hua ñeñtcha' atet perra esempo, te'ñapa' o' chapmoch allempoch attoch e'ñe etsotuerra esempohuañen.

¹¹ Tarraña e'ñe allempoteñ allohuen ñeñt ama cohuenaye' es petso ñeñtpa' allo'nepa'ch senet patse'tyeset ñeñt ama cohuenaye' enteno Yompor. Allohuenet ñeñt añach yeçhenet sosya'tsañeçhno, ñetpa' allo'nepa'ch senet yeçcatyesnomuet ñeñt atarr sosya'tsañeçhno. Tarraña allohuen ñeñt e'ñech

cohuen es p̄a'yenetpa' ñetñapa' allo'nepa'ch senet e'ñe cohuen es p̄a'yestset. Ñaña allohuen ñeñt̄ ma'yočhrenaya ñeñt̄ atto sherbeñet Parets, ñetpa'čho'ña allo'nepa'ch senet ma'yočhrenet ñeñt̄ atarr cohuen enten Parets. ¹² Ñaña Cristo ñapa' atet oten:

—Te'pa' señoche'pa'ch napa' ahuencha' nohuerra. Nehuapaterrnascha' ñeñt̄ no'patatensa alloch netsa'tuerrsa e'ñe puesheña'ttsos sa errotente' setorra'yese't. Tarraña o'ca'ye nehuapaterr ñaña alloch netsa'tatuera ñeñt̄ ama pocteye' es petso. ¹³ Napa' e'ñe pa'motroteñ eñallen, atten ñerra'mrrate' quelled A ñeñt̄ pa'moter pen alfabeto. Allempoteñña napa' čhocma eñallen esempohuañencha' huañerr ñeñt̄ allpon eñall, napa' atten ñerra'mrrate' quelled Z ñeñt̄ all puen alfabeto.

¹⁴ Atarr cosheñtso'tsen allohuen ñeñt̄ e'ñe pocte' enten Yompor o'ch tsomhuerrñañet Yompor puenaren alloch e'ñe correrret poctacma. Allempopa' amach alla rromuerrete'te. Ñeñt̄pa' ñeñt̄cha'ña e'ñe yoña'huerret ñesho. Ñehua, ñeñt̄ e'ñe pocte' enten Yompor ñeñt̄pa' allohuen ñeñt̄ e'ñe e'shohuaretterra po'chñar e'ñe pame'ñeñoŋet Cristo. Ñato' o'ch netma'ntacha atet: Ñetpa' o' e'ñe tsama'tuerret pa'shtamuet attoch e'ñe pocte' entanet Yompor o'ch be'toset yetarro esheccha' čhapuet Yompor pa'netsro. ¹⁵ Tarraña allohuen ñeñt̄ ama ame'ñenayo Cristo ñetñapa' a'yoŋe'tsa'yenetach Yompor pa'netsrot. Atet ñerra'm amase'ñeŋečhno, ñaña ñeñt̄ ecañoreshaŋečhno, ñaña ñeñt̄ amtsañečhno ñaña

allohuen ñeñt̃ po'yomporer pene' ayečhcatareť
ñaña allohuen ñeñt̃ cohuen entene' allohuen
shequēntsočhno. Ñetpa' e'ñe ñeñta eñotenet o'ch
shecare'chet acheñenesha'.

¹⁶ Allempoña Jesúsapa' alla oterrerr, ñeñt̃pa' atet
ot:

—Napa' naña ñeñten llesensene' nemillañoñeñer
ñeñt̃ o' eñotaterres ora añečhno, allohuenes
ñeñtes e'ñe same'ñeñoten na sapa' čhocma
sapčha'yena allemeñ anetso'mar. Napa' ñeñten
alloť huapa amčha'tareť David, elloñapa' o' alla
po'mřeneñ perrnerr naña. Ñaña napa' atten
ñerra'mrrate' ranto ñeñt̃ atarr atarremñ ñeñt̃ atarr
huomenc atsnets o'ch puetarenmoch. Attoña
na'puetarsampeñ allohuen acheñenesha'.

¹⁷ Allohuen ñeñt̃ pueyochresha' pen Parets
ñetpa' atma'ntatareťtenet atet ñerra'mrrate'
Cristo puetapor penahuet. Attoña ñet Parets
Puecamquēnoť oteñet Cristo:

—Apon.

Ñaña allohuenes ñeñtes e'mñotene' o'ch soch
saña Cristo:

—Apon.

Ñaña allohuenet ñeñt̃ oñpa'tets ñeñt̃ ama
eñmatetso pueyočhreto ñeñt̃ čhocma es e'nyenet,
ñetpa'čho'ña huapuetepa'. Yoretepa' añ oñ,
allochñapa' ñetpa'čho'ña corretsetach. Ñeñt̃ oñpa'
e'ñech atta apareťtet, amach es tsa'tayo ama't e'ñe
coñe'ta.

¹⁸ Na te'pa' o'ch noctape'chach allohuen ñeñt̃
e'mñotene' añ ñoñets all oteney ñeñt̃cha' atet perra
esempo. O'ch notanet: Ñerra'm esesha' aton-
tatene' ñet počtapñet ñeñt̃ ama atteye' otenye

añ ñoñets, Yomporñapa' o'ch atontatanet ñocpuet ñeñtcha' muerochtaterrahuet ñeñt atet o' aquellca'huareta añ libro. ¹⁹ Ñaña ñerra'm esesha' cha a'chencatenan ama't patrra ñoñets ñeñt allpon aquellca'huareta añ libro, Yomporñapa' amach muenataneto o'ch es o'patapreteret all aquellcaretena libro allpon ñeñtñapa' corretsetach. Ñaña ñetpa' amach be'tosapo'tampereto Parets pa'netsro ñeñt atet o' aquellca'huareta añ libro.

²⁰ Ñeñtara Jesús ñeñt yeñotatyene' ora añechno, ñañaapa' alla oterrerr:

—Napa' po'ñoçhcha' ahuen nohuerrerr po'pocheño.

Yañapa' allohueney yoteñ:

—Apon Yepartseshare Jesucristo. Ñeñtapa' attetepa'ch yocop.

²¹ Yepartsesharepa'chña Jesucristo sa'natenaya e'ñe allohuenes. Ñeñtapa' attetepa'ch Nompore allohuenacpay. Arrpa' e'ñe allohua puen Yompor po'ñoñ.

**Yompor Po'ñoñ ñeññ attō Yepartseshar
Jesuscristo e'ñe etserra a'poctaterrnay
Yomprosho
New Testament in Yanasha' (PE:ame:Yanasha')**

copyright © 2008 Wycliffe Bible Translators, Inc.

Language: Yanasha'

Translation by: Wycliffe Bible Translators, Inc.

Yanasha'[ame], Peru

Copyright Information

© 2008, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Yanasha'

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 21 Feb 2024 from source files dated 29 Jan 2022

fa985bb4-fad0-5968-9ee4-626b89cba24f